



The  
Robert E. Gross  
Collection

A Memorial to the Founder  
of the

*Lockheed Aircraft  
Corporation*



Business Administration Library

*University of California*

Los Angeles

5-5-5

121/5

Chubb

155





LE *Plutarch*

# NOUVEAU CYNEE.

OU DISCOUVRS DES  
OCCASIONS ET  
moyens d'establir vne paix ge-  
nerale & la liberte du com-  
merce par tout le monde.

Em. Cr. P.



A P A R I S.

Chez IACQUES VILLERY, au Palais sur  
le perron Royal.

---

M. DC. XXIII.

AVEC PRIVILEGE DV ROY.





# P R E F A C E.

**C** E liure feroit volontiers le tour de la terre habitable , afin d'estre veu de tous les Roys , & ne craindrait point aucune disgrâce , ayant la verité pour escorte, & le merite de son subiect, qui luy doit servir de lettres de recommandation & de creance. L'Auteur ne ressemble pas à l'ingenieur Dinocrate , qui avoit de beaux desseins , & releuez , mais inutiles. Il porte les vœux & desirs des gens de bien , il presente vn aduis salutaire , dont l'execution depend de ceux qui tiennent le ressort des affaires du monde. Il ne taxe personne : il flatte

## P R E F A C E.

encore moins, & on ne peut dire qu'il se soit fourvoyé du chemin de la verité, pour l'amour de son pays ou de sa religion, bien que ces deux caracteres soient tellement gravez dans son ame, que la mort mesmes n'est pas capable de les effacer. Son but n'est pas de decider les controuerses, ny de faire vn Panegyrique ou inuectiue. Il laisse ces discours aux Theologiens & orateurs, & tous-  
 ses fois desireroit qu'ils employassent leur eloquence & plume doree en ceste matiere si noble & importante. Plusieurs triomphent d'expliquer les mysteres de la religion, & de les prouuer contre les mescreans par authoritez irreprochables. Cela est bon: mais il faut  
 auant toute chose desraciner le vice le plus commun & qui est la source de tous les autres, à sçauoir l'inhumanité. Car l'heresie ne se trouue pas en tout âge ny en toutes nations. L'atheisme est encore plus rare, & n'y a hōme si brutal

## P R E F A C E.

*on opiniaſtre qui regardant le ciel ne ſoit  
 cōtrainct de cōfeſſer vne diuinité. Nous  
 voyons vne infinité d'hommes, qui ne  
 s'eſtiment obligez de croire ſinon ce que  
 la raiſon leur monſtre, par le moyen de  
 laquelle ils recognoiſſent bien vn Dieu,  
 mais ils ne peuvent conſentir aux au-  
 tres articles de la foy, pource qu'ils n'en  
 ſont eſclaircis par ceſte lumiere naturelle  
 laquelle doit regler, diſent-ils, toutes  
 perſuaſions, & opinions, non pas y eſtre  
 aſſubiectie. Neantmoins ils n'oſeroient  
 ſe deſcouvrir & s'accommodent exte-  
 rieurement à la creance & couſtume de  
 leur pays, de peur d'eſtre deſcrieZ cōme  
 atheiſtes, encore que veritablement ils  
 ne le ſoient pas, & ſeroit plus à propos  
 de les nommer incredules, d'autant  
 qu'ils ne ſuiuent que la raiſon, & meſ-  
 priſent la foy theologale comme ſi c'e-  
 ſtoit vne vertu imaginaire. Le nombre  
 de telles gens s'augmente tous les iours.  
 Car on ne croit plus ayſement aux eſ-*

## P R E F A C E.

crits ny aux paroles, & plusieurs re-  
 goient des propositions pour indubita-  
 bles en leur ieunesse, qui leur sont par  
 apres fort suspectes, quand ils viennent  
 à faire vne reflexion en eux mesmes,  
 & à considerer l'oracle du Royal Pro-  
 phete: que tout homme est suiet  
 à mentir. C'est pourquoy les plus re-  
 nommez predicateurs voyans qu'une  
 doctrine si esloignee du sens commun à  
 peu d'effect pour esmouuoir les esprits  
 de nostre temps, n'ont rien de plus re-  
 commandable en leurs exhortations,  
 que la direction des mœurs, attendu  
 que c'est vne belle disposition à la pieté,  
 laquelle se loge plus facilement & de-  
 meure bien plus ferme en l'esprit d'un  
 homme de bien, qu'en celui d'un mes-  
 chant, qui ne croit en Dieu que par  
 boutade ou accoustumance. Peut-on  
 autrement iuger d'un médisant, trom-  
 peur, & meurtrier ordinaire? Est-il  
 vray semblable qu'ils croient un enfer,



## P R E F A C E.

qu'ils ayent bonne opinion de l'immortalité de l'ame. Quelque mine qu'ils fassent, ils ne le persuaderont iamais: au contraire ils donneront subiect aux estrangers de reuoquer en doute le merite de leur creance. Les Tartares auoiēt resolu d'embrasser le Christianisme du temps de saint Loys, mais ils en perdirent l'enuie quad ils furent aduertis des meschancetez que commettoiēt les chrestiens. Sçauoir si leur cōsideration estoit receuable. ou non, c'est vne question que ie n'entame point. Tant y a que la religion ne se peut bien entretenir que par la preud'homme & vertu morale, à laquelle il faut exhorter les grands & les petits, les Roys & les peuples, sans s'arrestes si longuement à ces disputes scholastiques, qui font plus de bruit que de fruit. Ie sçay qu'il est besoing de refuter les heresies, mais ie n'en trouue point de plus grande, que l'erreur de ceux qui mettent la souueraine gloire en l'iniusti-

## P R E F A C E.

ce, & ne recognoissent rien de loüable que les armes. Esserons-nous de voir aucun aduancement en la religion, ou tranquillité en l'estat, tant que ceste damnable opinion sera receüe? Et neâtmoins on la laisse couler dans les esprits, on n'en parle non plus que si elle n'importoit aucunement : au contraire il semble qu'on l'approuue par vn silence & consentement tacite. Ce qui m'a occasionné de mettre au iour cest aduertissement & conseil pacifique, que le Lecteur trouuera nouveau, s'il considere la forme de son æconomie, & l'estendue de la matiere qu'il traiçte. La paix est vn subiect triuial, ie le confesse, mais on ne la pourchasse qu'à demy. Quelques vns y exhortent les Princes Chrestiens, afin que par leur vnion ils se fortifient contre leur ennemy commun: & mesmes vn fameux personnage a monstré les moyens d'exterminer les Turcs dans quatre ans ou enuiron, & plu-



## P R E F A C E.

*seurs autres belles conceptions qui  
 sont fort aysees à mettre par escrit.  
 Il y en a qui limitent encore plus leur  
 stile, ils donnent des inuentions pour  
 policer & enrichir leur pays, &  
 se soucient si peu des estrangers,  
 qu'ils estiment vne prudence politi-  
 que de semer parmy eux des diui-  
 sions, afin de iouyr d'un repos plus  
 asseuré. Mais ie suis bien d'un autre  
 aduis, & me semble quand on voit  
 brusler ou tomber la maison de son voi-  
 sin qu'on a subiect de crainte, autant  
 que de compassion, veu que la société  
 humaine est vn corps, dont tous les mem-  
 bres ont vne sympathie, de maniere  
 qu'il est impossible que les maladies de  
 l'un ne se communiquent aux autres.  
 Or ce petit liure contient vne police  
 vniuerselle, vtile indifferemment à  
 toutes nations, & agreable à ceux qui  
 ont quelque lumiere de raison, &  
 sentiment d'humanité. Quant aux*

# P R E F A C E.

autres, ie preuoy qu'ils ne liront point le present discours, ou qu'ils n'en tiendront compte, principalement ces ambitieux guerriers, qui nous appellent par mespris gens de plume & d'escritoire, & pour raualler nostre honneur, nous chantent ceste vieille maxime. Qu'il vaut mieux faire que dire. Ce que ie leur accorde librement, pourueu que les actions soient bonnes, & non brutales. Vn temps a esté que i'eusse autrement respondu à ces faiseurs là. Maintenant qu'ils se contentent de ceste interpretation. Je n'escriis point aux barbares & ignorans qui se scandalizeront de cest æuvre. Les esprits trop deliez n'y prendront point aussi de goust, & le compareront peut-estre à la Republique de Platon qui ne fut iamais qu'en l'Idée & imagination de son Auteur. Toutesfois ceste comparaison ne seroit pas propre, d'autant qu'on propose icy une chose non seulement possible, mais

# P R E F A C E.

aussi de laquelle les anciens ont eu l'ex-  
 perience. Sous l'Empire d'Auguste  
 toutes les nations estoient pacifiees. Et  
 du regne de François premier on a veu  
 fleurir la paix quelques années par tou-  
 te l'Europe. Qui nous empesche d'espé-  
 rer vn bien, dont les siècles passez ont  
 iouy? le croy qu'il n'y a rien si facile, que  
 cest affaire, si les Princes Chrestiens le  
 veulent entreprendre, & notamment  
 nostre Hercule François, Loys le  
 Iuste, dont le surnom me donne bon  
 augure. Il ne faut donc point dire que  
 les propositions qui se font de la paix  
 vniuerselle sont Chimeriques & mal  
 fondees. Chacun iugera de ce liure selon  
 son plaisir. J'espère qu'il trouuera  
 place dans le cabinet des grands, & que  
 les hommes iudicieux en feront estat,  
 malgré l'enuie.

*T. apud  
autoren*

*par sagand p.  
de la p. de la p.  
de la p. de la p.  
de la p. de la p.*

*Extraict du Priuilege du Roy.*

---

**P**Ar grace & Priuilege du Roy dō-  
né à Paris le 26. Nouembre. 1622.  
signé Hardy & sellé. Il est permis à Iac-  
ques Villery Libraire d'Imprimer vn  
liure intitulé, *Le Nouveau Cynee*, & de-  
fences à toutes personnes de le faire  
imprimer sans le congé & consente-  
ment dudit Villery, par l'espace de six  
ans entiers à compter du iour des pre-  
sentes comme plus amplement il est  
porté par ledit Priuilege.



LE

# NOVVEAV CYNEE: OV

DISCOVRS DES  
OCCASIONS ET MOYENS  
d'establir vne paix generale, &  
la liberté du commerce par  
tout le monde.

*Aux Monarques & Princes Souue-  
rains de ce temps.*



E ne deuois pas adresser  
ce discours au vulgaire,  
qui ne vit qu'à patron, &  
n'a aucune reigle en ses  
actions : encore moins  
aux hommes violens, qui se mocquent  
de toute honnesteté, & ne font estar  
que de la force. C'est de vos grâdeurs

A

que ce petit liure attend vn favorable accueil, c'est entre vos mains qu'il se iette *Tres-hauts, Tres-puissans & Inuincibles Monarques*. Je croy certes que vos maiestez n'ont besoing de nouveau conseil, & que Dieu vous ayant esleué à vn si haut degré d'honneur, vous en a donné pareillement le merite. Mais d'autant que les aduis provenans d'un esprit candide & non suspect, sont ordinairement bien receus, & qu'une fortune quoy qu'elle soit grande est subiette à changement, i'ay pensé qu'il ne feroit hors de saison de vous représenter avec toute humilité les moyens d'asseurer vostre estat par l'establissement d'une paix vniuerselle. S'il ne s'agissoit en cela de vostre interest particulier, celuy du public suffiroit pour vous exhorter d'auoir cōpassion du genre humain, qui d'une voix commune vous demande la paix, & vous coniure par la consideration de vous mesmes, d'arrester le cours de ses miseres, & de mettre fin aux abus que la fureur des armes a cy deuant produict. Ceste requeste est ciuile. Il est plus raisonnable d'y auoir esgard, qu'aux passions desreglees de



ces guerriers, qui à l'exemple des anciens Perses ne se figurent dans le tableau de leur esprit que des batailles & victoires, qui se parēt de la liuree d'une malediction, & mettent la souveraine gloire en l'iniustice, & oppression des hommes. Je ne m'amuseray point à declamer contre telles gens, dont le naturel est prodigieusement peruers. Il suffira de remarquer les causes de la guerre: on trouuera de quoy deplorer l'aneuglement de ceux qui exercent tāt de cruauté les vns contre les autres pour occasiōs si friuoles. Mais au préalable ie feray protestation de ne parler des tumultes & esmotions ciuiles, afin que les seditieux ne pensent pas trouuer vne Apologie pour maintenir leur reuolte, ny pretendre vne paix, dōt ils sont indignes s'ils ne recognoissent leur Souuerain, & s'ils ne renōcēt à leurs factions. Laisant donc à part ces mutineries dont nous parlerons en autre endroict, ie diray que les guerres estrangeres s'entreprennent pour l'honneur, ou pour le proffit, ou pour repARATION de quelque tort, ou bien pour l'exercice. On pourroit adiouster la

religion, si l'experience n'eust faict cognoistre qu'elle sert le plus souuent de pretexte. Je ne fais point aussi mentiõ de la necessité, laquelle a iadis contrainct plusieurs nations de sortir en troupe de leur pays, & chercher par force nouvelles demeures. De là viennent tant de colonies mentionnees dás les histoires: mais aujourd'huy ces débordemẽs de peuples sont rares, tellement que nous ne pouuons recognoistre d'autres fins & causes mouuantes de la guerre sinon les quatre cy dessus specifiees, dont la premiere est la plus commune, & semble la plus legitime. Car si le desir d'honneur est naturel à vne ame genereuse, il est bien seant qu'elle le cherche dans l'exercice des armes, puisque toute la gloire en depẽd selon le iugement commun, auquel ce seroit folie de contreuenir. Tous les peuples s'accordent en cela, & les coutumes tant anciennes que modernes ont tousiours deferé aux soldats le priuilege de noblessẽ & de commandement, en sorte que l'honneur des autres estats & perfections se termine au lustre esclatant de la vertu



militaire. La pluspart des Princes s'accommodant à c'est erreur ne prise riē que les armes. Ce mal n'est pas d'aujourd'huy. L'empereur Seuere cōmandoit à ses enfans d'enrichir les soldats & mespriser tout le reste. Et le Roy d'Albanie Pyrrhus interrogé à qui il laisseroit son Royaume, A celuy, dit-il, qui aura meilleure espee. Mais ces paroles sentent la barbarie & brutalité. Ausquelles nous pouuons opposer l'autorité de ce braue Roy Lacedemonien, qui estimoit plus la iustice que la valeur, disant que ceste vertu n'estoit aucunement necessaire quand la raison & preud'homme auoient lieu. Et de fait quelle apparence y a-il d'estimer tant vne chose, qui ne se vāte sinon de faire ce que les plus imbecilles animaux peuuent exécuter? Car de nuire & tuer cest vne chose facile.

Il ne faut pour c'est effect qu'un petit aspic, vne seule mouche. Ce qui deueroit suffire pour raualer l'arrogāce de ces fendās qui se glorifient d'en auoir tant tué és rencontres & batailles. C'est honneur, disent-ils, de supplanter son ennemy. Et auons-nous d'autres en-

nemis que les bestes farouches? Il y a vne amitié & parenté entre les hommes, fondée sur vne conformité de naturel & de figure. Chacun garde volontiers son pourtraict, & prend plaisir à la representation de ses lineamens insensible: Neantmoins nous n'espargnons point nos viues images: nous faisons trophée de ruiner nos semblables, ce pendant que nous quittons honteusement le champ de bataille aux Lyons, Tygres, Loups, & Serpens, nos ennemis naturels, que nous n'osons attendre ny attaquer sinon avec artifice, à la façon de ceux qui se sentans trop foibles ont recours aux finesces & subtilitez pour surprendre leur aduersaire. Que si ces animaux auoient entr'eux quelque intelligence, ils seroient bastans d'exterminer dans peu de temps les hommes. L'autan a autrefois depeuplé quelques regions d'Afrique: vne multitude de serpens a ruiné vne ville, & l'importunité des rats & grenouilles a chassé certaines nations de leur pays. Que sçauons-nous si Dieu ne se seruira point de tels instrumens pour punir encore nos iniquitez?

Vrayement il y a bien dequoy faire parade de son espee, puis qu'il faut si peu de chose pour nous mettre à bas. Nous auons grand subiect de nous preualoir de nostre force, puisqu'en icelle les bestes ont sur nous tant d'aduantage, que nous pouuons dire iustement que c'est la moindre des perfections humaines, & par consequent la vaillance vulgaire qui n'a autre fondement ny appuy que la force ne merite pas grande loüange. Je dis vaillance vulgaire, afin de la distinguer de ceste magnanimité, qui consiste en vne fermeté de courage, & mespris de toutes aduersitez. Ce sont les effects de la vraye vaillance, repousser l'iniure, & nō pas la faire: endurer genereusement la mort & tous autres accidens quand ils se presentent, & non pas les aller chercher, sous l'espoir d'une honneur ie ne scay quel, dont la vanité est en fin recogneuë par ceux qui en ont fait estat toute leur vie. Ne voyons nous pas les regrets qu'ils ont en mourant, de s'estre abandonnez au vent d'une folle opinion? Ils font alors de belles remonstrances accompagnes

d'un repentir . I'en ay veu quelques vns qui navrez d'un coup mortel faisoient protestation de prendre l'habit religieux, & vacquer à la deuotiõ le reste de leurs iours, au cas qu'ils reuinssent en cõualescence. Il est vray sēblable, que ceux qui meurēt aux combats ont de sēblables pēsees. La raisõ frappe à nostre porte à toute heure , & nous souffle incessāmēt aux oreilles. Il n'est plus temps de la recevoir quand il faut sortir de ce monde. Et en cecy nous voyons les malheur des hommes qui ne recognoissent leur faute qu'en extremite, & ne se rangent point à la raison , sinon lors qu'ils ne peuvent plus mal faire. L'opinion commune les mēne, l'accoustumance les reigle, & l'ambition les aveugle en telle sorte, qu'ils foulēt aux piedstout respect, ne se soucient de Dieu ny des hommes pourueu qu'ils fassent parler d'eux. Mais ils sont aucunesfois bien trompez. Car au lieu de trouuer la reputation qu'ils cherchēt & de mourir au liēt d'hōneur, ils tombent en vne honteuse seruitude & seruēt de iouet à leurs ennemis. Representons-nous la condition des prisonniers de guerre, les affrons & moc-

queries qu'un simple bourgeois ou manât de village ne voudroit endurer, & au bout de cela souuétefois vne corde, ou quelque autre mort pleine de tourment & ignominie. Neâtmoins ce sont les fruiets ordinaires de la guerre. Il n'y a Soldat, Gentilhomme, Capitaine, & chef d'armée qui ne soit subiet à ces inconueniens. Les plus grâds Roys & Empereurs n'ē sôt pas exēpts. Valerian, Baudouin, Tomābais, Baiazeth, Attabalippa, & autres qui finirēt miserablemēt leurs iours, ont laissé vne belle leçon aux Princes, pour apprendre qu'il y a plus de deshōneur à craindre, que de gloire à esperer en la guerre. Car le mal vient plus souuent que le bien: & si on estime folie de quitter le certain pour l'incertain, les Princes doibuent mesnager leur honneur, sās le mettre au hazard à l'appetit & suscitation de ceux qui les nourrissent d'esperāce, & leur proposent ce qu'ils peuvent acquerir, & non pas ce qu'ils peuvent perdre. Ils leur tracent le plan des conquestes futures, leur font veoir des arcs de triomphe, mais ils ne leur monstrent pas le ioug ignominieux



sous lequel ils se mettent en danger de passer. Ils leur chantent cette vieille maxime *Que la monarchie est vne belle sepulture, qu'elle vaut bien la peine qu'on se hazarde.* Ce qui seroit bon à dire à des particuliers ambitieux & desesperez, qui voudroient s'aggrandir au peril de leur vie. Mais les Princes qui ont desia commandement & autorité toute acquise, ne doibuent point s'exposer à l'inconstance de la fortune, qui se iouë des plus grands, & traaverse par accidēs inopinez les plus hautes entreprises. Et maintenant les affaires du monde sont en tel estat, qu'il n'y a si petite Seigneurie, laquelle ne soit capable par le moyē de ses alliāces de resister au plus puissant Roy de la terre. Vn sage Prince doncques ne s'aheurtera point contre l'estat d'un autre, de peur de briser le sien. Que si l'ambition le porte à prodiguer sa vie, & celle de ses subiects, à tout le moins qu'il espargne son honneur, pour lequel il se tourmente tant, qu'il regarde la honte & le dommage où se precipitēt ceux qui entreprennēt les guerres. Ils se mettēt à deux doigts près de leur ruine. Il ne faut qu'un pe.

tit vent pour les pousſer dans le gouffre de miſeres: & lors qu'ils penſeront eſtre en leur maiſon celeſte, au ſolſtice de proſperité, vn reuers de fortune les abbaifſera tout à coup, & de ſouuerains les rendra eſclaues. Les voila captifs, enchainez, & le bourreau en queue. Alors ils ſe voyent bien reculez de la gloire qu'ils ſ'imaginoient, & ont tout loifir de regreter la felicité dōt ils pouuoient paiſiblement iouiſſer, ſ'ils n'euffent eſté preoccupez d'une ambition deſmeſuree. Ce ne ſont point icy vaines conceptions que nous enfaisons. Les hiſtoires teſmoignent, & l'experience verifie que la guerre met pluſtoſt la reputation d'un Prince au hazard, qu'elle ne l'augmente. Et quand il pourroit acquerir autant d'honneur qu'eut iamais Cæſar, que l'empire de l'uniuers fuſt le pris de ſa victoire, ne ſeroit-ce pas vne cruauté d'y paruenir par vne voye ſi deteſtable? O que l'honneur eſt vne miſerable choſe ſ'il le faut acheter avec effuſion de ſang! J'adore ta memoire Othon Saluie, delices de tō ſiecle, vnique eſpoir & contentement des ſoldats Romains, qui volontaire-

ment sacrifioient leurs moiens & leur vie pour t'esleuer au throsne imperial, & te donnoient leurs armes pour gages d'une fidelle affection. Tu refusas leur offre, ayment mieux mourir simple gentilhomme, que de gagner la monarchie avec la perte de tant de bôz seruiteurs. Cest acte vaut tous les empires du monde. La posterité le prefera aux lauriers des Cæsars, pour ce que plusieurs imiteront ceux cy, mais ta genereuse bonté demeurera à jamais incôparable. Faut-il que les monarques s'establisent par massacres & boucherie? Abus. Ce ne sont pas voleurs, pour proceder en ceste façô. Ce sôt images de Dieu, tuteurs du peuple, destinez pour guerir nô pour blesser, pour bastir non pour destruire. Mais supposons que la guerre fut necessaire pour fonder les monarchies. Auourd'huy qu'elles sôt establies, il n'est plus besoing à ceux qui en ioüissent de réplir le monde de carnage. Que leur sert de se mettre en campagne, puis qu'ils ont sans coup ferir l'honneur de souverain commandement, qu'ils veulent chercher avec tant de peine, & peu d'apparence d'executer leur desseing?



Qu'ils se tiennent sur la defensiue. C'est beaucoup de conseruer vne monarchie : Et croyent fermement que l'honneur est fort engagé en la guerre, & le profit encore plus incertain. Car pour deux soldats qui s'y enrichiront, on en trouuera cinquante qui n'y gagneront que des coups ou des maladies incurables. Pour le regard des Princes, ils y espuisent leurs finances. Philippe 2. Roy d'Hespagne en sçauroit bien que dire, qui a employé tant de millions d'or avec si peu d'aduancemēt, que son exemple a serui d'instruction à son successeur pour rechercher vtilemēt la paix es lieux où il pouuoit faire inutilement la guerre. Celuy qui se peut vanter le plus de ses exploicts militaires, c'est le grand Seigneur: Car outre ce que tous subiects font profession des armes, ses entreprises ont réussi si heureusement, qu'il n'y a pour le present monarchie comparable à la siēne. Voyez neātmoins ce qu'il a gagné depuis plusieurs ans. Il n'a quasi fait que se defendre, & a esté reduit à des extremitéz par ses propres subiects, qui luy doiuent bien faire penser

à sa conseruation plustost qu'à vne  
nouuelle conquēte, & cōsiderer que si  
la force establit les monarchies, elle les  
peut aussi ruiner, veu mesmes qu'il sē-  
ble estre paruenue au plus haut degré  
de puissance & grandeur humaine.  
D'autre part les Chrestiens n'aduan-  
cent pas mieux leurs affaires: Et enco-  
re ont-ils ce malheur, que s'ils obtien-  
nēt quelque victoire, ils n'en iouissent  
pas long-tēps, au contraire les Turcs  
se maintiennent, & ne se laissent  
point aisemēt deffaisir de leurs posses-  
sions. Je confronte ces deux peuples,  
pour ce qu'ils sont par maniere de dire  
ennemis naturels, & ont diuisé presque  
tout le monde en deux parties, à cause  
de la diuersité de leur religiō, tellemēt  
que s'ils se pouuoient accorder, ce seroit  
vn grād acheminemēt pour la paix vni-  
uerselle. Car le Prince Chrestien se voy-  
ant en paix avec le Mahometan, s'accor-  
deroit encore plus volontiers avec vn  
autre de sa religion, & le grand Seig-  
neur estant d'accord avec les Chrest-  
iens se rendroit plus facile au Roy de  
Perse, ou de Tartarie. Quāt aux payēs  
& Iuifs, ie croy qu'ils ne refuseroient

point d'estre compris en vn traitté si general & au fort ils ne seroient pas suffisans pour empescher vn si bon effect. Toute la difficulté gist aux pretentions de quelques souuerains, qui ont esté spoliez de leur Seigneurie ou partie d'icelle: Et de là vient la troisieme occasion de guerre, lors que les Princes leuent les armes pour r'entrer en possessiõ de leurs anciës droits & se venger du tort qu'ils ont receu. Mais qui contempera l'origine des empires & royaumes, iugera que telles pretentions sont mal fondees. Car les Monarchies ne s'acquierēt pas cõme vn autre heritage. Elles viennent immediatement de Dieu, & sont establies par sa seule prouidence, qui donne les sceptres & les oste quand bon luy sēble, en ostant pareillement le moien de les recouurer. Dont plusieurs peuuēt donner suffisant tesmoignage: & sur tout l'Empereur Romain, Qui a plus de subiet de se plaindre que luy, veu quela plus part des royaumes d'aujour d'huy sont fondez sur les ruines desõ estat? Toutesfois il est contrainct de se contenter de ce peu qui luy reste, &

se ressouuenir, que comme l'Empire s'est iadis accreu & enrichi des despoil les du monde, il a aussi finalement serui de proye à toutes les nations qui en ont chacune emporté de bônes pieces. Il n'est besoing de nommer d'autres Princes, qui se sont en vain efforcez de recouurer ce qu'ils auoient perdu, & ont experimēté que les royaumes ont la façon des hommes particuliers leur naissance, accroissement, & declin. Il ne faut point icy se flatter, & dire que Dieu fauorise les causes iustes. Car c'est entrer trop auant au cabinet de sa prouidence, de s'asseurer qu'il nous fauorisera plustost qu'un autre. L'espoir de c'este faueur imaginaire a faict entreprendre des guerres à plusieurs qui presumoient de leur bon droit, & pensoient que Dieu se seruiroit d'eux pour exterminer vne puissance qu'ils appelloient iniuste & tyrannique. Ils se sont trouuez bien loing de leur compte, & pour vne lieue de pays qu'ils vouloient gagner sur les vsurpateurs, en ont perdu cinquante, & ont mis en danger leur estat: quelques vns y ont laissé l'honneur & la vie. C'est bien faict à  
vn Prin,

vn Prince de s'opposer valeureusemēt à celuy qui veut empieter son pays. Mais depuis qu'il en est totalemēt priué, & que pour sō impuissance il ne se peut rehabiliter, il doit ceder, ie ne diray pas aux hommes, mais à Dieu, qui est ialoux des Monarchies comme de ses plus beaux œuures, esquels il a graué l'image de sa maieté, les caracteres de sa vertu, & s'en declare protecteur par des effets visibles, principalement depuis qu'elles sont fortifiées d'vne longue possessiō. Ceux qui alors les attaquent, ne gagnent non plus que les anciens qui ont tasché de couper l'Hexamilo. Il n'est pas en la puissance des hommes de rompre vn ordre diuinement establi, comme celuy des Monarchies. Les Princes qui s'y trouuent interessez ou pour la ruine totale de leur estat ou pour la diminution d'iceluy, doiuent sçauoir que Dieu n'est pas tenu de continuer sa benediction en vn endroict. Que s'il a trāsferé leur sceptre à vne autre main, il a fait la mesme faueur à leurs predecesseurs, qu'il a releué de terre, leur donnant vne puissance absoluë, pour



en iouir tant qu'il luy plairoit & non autrement. Qu'ils ne se plaignent d'oc point d'un mal commun à tous estats, qu'ils n'accusent point vne vsurpatiō, que le temps, le bon-heur, & la volonte de Dieu authorisent: qu'ils retranschent leurs esperances inutiles, & le desir de vengeance qu'ils ne peuvent effectuer: Et quand ils le pourroient faire, ils deueroient prendre vne autre voye & auparauant que venir aux armes, se rapporter à l'arbitrage des Potentats & Seigneurs souuerains: Ce faisant ils gaigneroient l'amitié de leurs semblables, pour s'en preualoir contre leurs ennemis, au cas qu'ils ne voulussent se soubmettre au iugement d'un tiers. Or si vn Prince receuoit vn iuge qui voulust imperieusement s'ingerer de vuidier les differens, cela veritablement raueroit sa grandeur: mais d'accepter volontairement des arbitres, c'est vne chose iadis pratquee & qui se pratique encore par les Monarques. Que si on termine à l'amiable les querelles esmeues pour la possession des souueraines Principautez, on pourra plus aisement pacifier d'autres contestations &

debats qui suruiennēt entre les grands pour leurs limites, pensions, tributs & autres droicts de moindre importāce, comme aussi pour quelques actions ou paroles offensives qui causent souuent de cruelles guerres, faute d'vn tiers qui pourroit addoucir les affaires en moyennant quelque satisfaction honneste, pour contenter celuy qui auroit esté offensé. Et à cecy seruiroit grandemēt l'assemblee generale de laquelle nous parlerons cy apres. Voila donc la troisieme occasion de guerre assez refuttee. Reste la quatrieme, à laquelle ie confesse qu'il est plus difficile de remedier, attendu que les hommes sont naturellement impatiens de repos, & sur tout les gens de guerre. C'est pourquoy nous liions que tant de peuples autrefois se sont bannis volontairemēt de leur païs, pour aller chercher la guerre ailleurs, ne pouuans endurer que leur bras s'engourdisse avec leur generosité. Cela mesme a contrainct quelques Roys de licentier leurs subiects, leur permettant d'aller busquer fortune, de peur qu'ils n'imitassent ces anciēs Odryses qui entamoieēt à coups

d'espée leur propre corps, quand ils n'auoient point d'ennemis pour se battre. Les Allemans à mesme fin exerçoient leur ieunesse au brigandage pour luy faire passer le temps. Que feront donc auiourd'huy tant de vaillans hommes, qui ne peuuent sentir que la poudre à canon, ny mettre la main que sur le pommeau de leur espée, ny le pied que sur vn champ de bataille ou vne bresche, comme dit vn braue discoureur, qui ne se nomme point? La response à ceste demande est fort sommaire. Le monde n'est pas fait pour telles gens qui ne sçauēt que mal faire. La cour des Roys n'est pas leur vray seiour. Il les faut tous enuoyer aux Canibales & Sauvages, qui n'ôt riē de l'homme que la figure. Maudit naturel qui cherche le repos dās l'inquietude, l'honneur en l'infamie, & le passetemps en l'inhumanité! Reprimez (grands Monarques) reprimez ces monstrueux courages, ces esprits forcenez, qui ne suivent pas les Princes, mais leur fortune, qui les abandonnent au besoing, & souuentesfois les trahissent. Que peut-on esperer de ceux qui ne respic-



rent que le sang & le carnage? Il est certain que les soldats sont nécessaires à vn Prince, pour la tuition de sa personne & de son estat, mais quand il aura balancé le bien & le mal qu'il en reçoit, il trouuera qu'il est beaucoup plus dangereux de les estimer que de les abbaïsser. Car l'esprit d'un guerrier est ambitieux & violent, & ne regarde pas ce qu'il tient, mais ce qu'il peut obtenir. Ne voyons-nous pas des exemples de cecy au siecle passé & au nostre? Les Empereurs Romains se sont mal trouuez d'auoir tant deféré aux Soldats de leur garde. Les mutins donnoient, ou pour mieux dire, vendoient l'Empire, & l'ostoient à leur plaisir. Ils n'auoient pas si tost presté le serment de fidelité à leur maistre, qu'ils en estoient degoustez, & le massacroient cruellement pour substituer vn autre en sa place, qui estoit reçu à mesme cōdition que le premier, c'est à dire, il couroit fortune d'auoir vn pareil traitement quand il plairoit à ces bourreaux, qui prononçoient arrest de mort contre celuy auquel ils soubsmettoient leur vie.

Ainsi le grand Seigneur reçoit souvent la loy de ceux qui se disent les esclaves. Quelle pitié de voir vn Souuerain contrainct d'abandonner ses plus fideles seruiteurs à la volonté d'une troupe mutine, qui presente vne requeste les armes au poing, & menace audacieusement son Prince cōme s'il tenoit d'elle sa couronne impériale? C'est ce qui perdra les Othomans, & leur Empire ne sera iamais ruiné que par la puissance immodérée qu'ils ont donné & donnent encore aux Janissaires. Que s'ils vouloient receuoir vn conseil pacifique, & conspirer vnaniment avec les autres Monarques pour le repos public, ils n'endureroient point ces brauades, seroient mieux seruis, & ne dependroient aucunement des caprices des hommes turbulens, auxquels ils sont cōtraincts d'accorder tout. L'Empereur Probe considerant cecy disoit franchement, qu'il disposeroit les affaires en telle sorte, qu'on se passeroit bien de soldats. Grands Princes, il est en vous d'effectuer ceste sainte resolution. Tous les hommes en general, & vos peuples en particulier vous en

feront obligez. Il n'y a conqueste , qui vous puisse acquerir tât d'applaudissement ; il n'y a victoire qui merite tant de feux de ioye. Quel plus grand honneur pouuez - vous desirer que de voir sous vostre autorité publier la paix par tout le monde ? On marquera dans les Chroniques vostre nom en lettres d'or : on louera vostre regne, comme ayant esté le commencement ou le retour du siecle heureux. On ne parlera plus des conquestes d'Alexandre, des triomphes de Cesar , des stratagemes d'Annibal & Sertorie. La vanité de ces gens-là sera recogneüe qui ont fondé leur gloire sur meurtres & pilleries , dont ils deuroient plustost auoir emporté vn regret & honte perpetuelle. On fera veoir à la posterité ces braues Heros, qui aurót surmonté les monstres d'inhumanité & barbarie, auront rangé l'vniuers sous les loix de iustice, bref qui se seront monstrez vrayes images de la diuinité. Or ce beau tiltre ne s'acquiert point par saccagemēs, massacres, & actes d'hostilité, mais par vn doux gouuernemēt, puissance legitime & reglee , qui distingue

les Royaumes d'auec les brigandages & tyrannies pleines d'inquietude & de peu de duree. Car il ne faut pas estimer que la grandeur d'un Roy consiste en l'estendue de sa seigneurie. Agésilais le faisoit de ce qu'on qualifioit du nom de Grand le Roy de Perse. Comment peut-il estre plus grand que moy, disoit-il, s'il n'est plus iuste? La vraye grandeur d'un Souuerain gist en la prompte obeïssance de ses subiects, & ferme iouissance de son estat, ce qui ne luy peut arriuer tant qu'il s'engagera en vne guerre, laquelle apporte vne grande alteration aux volontez, avec diminution d'obeïssance & de respect: & tel commande à baguette en pleine paix qui est contrainct en temps de guerre de courtiser son vassal, & entretenir vn simple Soldat de belles promesses. Et à quelle fin ces honteuses submissions? Pour empieter sur vn voisin, pour se rendre redoutable. Si la grâdeur de vos courages vous appelle à vne fortune plus releuee, si elle ne peut acquiescer aux possessions presentes, à tout le moins imitez les aigles, qui par vne tacite conuen-

tion se prescriuent vn certain espace, dans lequel elles cherchēt leur proye, & ne passent point outre. Bornez vostre territoire à la mode du sage Numma, & suiuant son ordonnance sacrifiez au Dieu Terme sans effusion de sang. Auguste se comporta de ceste façon, & mit volontairement des bornes à son Empire limitant par ce moyen sa cupidité. Cest Empereur monstre bien comme il se faut seruir des gens de guerre. Car apres qu'il eust establi la paix, il mit bonnes garnisons sur les frontieres : outre ce il auoit deux flottes sur mer esquippees & bien garnies, pour les employer selon les occurrences. Et cecy seruira pour satisfaire à ceux qui disent que la valeur seroit abastardie par le moyen d'une paix generale. Je pourrois leur respondre que tout le mōde estāt d'accord on n'a que faire de s'aguerrir, & qu'il vaut mieux estre couïard que brutal & barbare. Mais les Romains donnoïēt bō ordre à cela, & s'empeschoïēt biē de deuenir lasches en tēps de paix. Ils s'exerçoiēt aux tournois, tiroient à la quintaine, representoient batailles

terrestres & nauales, afin de se disposer aux serieux combats , & notamment pour éuiter l'ennuy qu'apporte vne longue oisliuete. Car tout homme s'artedie, depuis qu'il n'exerce plus s'omestier. Voila pourquoy à vn soldat qui ne sçait faire autre chose que fraper , il est bon de donner quelque subiect, où il puisse desgourdir son bras, esprouuer sa force & dexterité, avec hōneur toutesfois, & sans meurtre. Et cōme ceux qui ayment quelque chose en voyent volontiers le pourtrait, aussi ceux qui demandent les combats sont biē ailes d'en veoir la representation. Que si tels ieux ne leur sont agreables s'ils se veulent battre à bon escient, les bestes fourniront assez dequoy passer ceste furieuse enuie. La chasse est vn exercice noble, & bien-seant aux gens de guerre, sur tout à ceux qui sont qualifiez. Le mets au rang des bestes les peuples sauages qui n'vsent point de raison. Ils donneront pareillement vn iuste subiet de guerre, aussi bien comme les pirates & voleurs qui ne font estat que de brigander. Voila enquoy les soldats peuuent estre legitimement



employez, & par ce moyen ils n'aurot occasion de se plaindre, attendu qu'ils seront tousiours necessaires pour la manutention de la paix, & conseruation des Princes, qui ne peuuent estre en seureté sans les armes, & partant ne doiuent mespriser ceux qui en font profession, au contraire les honorer de quelques priuileges & mesmes leur donner de quoy viure, afin de leur oster toute occasiõ de mescontentemẽt. Que si l'estat de leurs Finances ne pouuoit fournir à ceste liberalité, ils pourroient appliquer à cela deux remedes. Le premier est, congedier vne partie des gens de guerre, & retenir seulement les plus robustes & plus propres suiuant l'exemple de Iules Cesar, lequel diminua le trop grand nõbre de citoyens nourris aux despens de la Republique, & les reduisit au nombre de cent cinquante mil hommes. L'autre remede est de leuer vn impost particulier, pour l'entretenemẽt de la gendarmerie, à quoy tout le peuple contribueroit volontiers, & n'auroit point de regret, de s'incommoder vn peu, pour auoir la paix, & éuiter les oppressions & outra-

ges qu'il endure des Soldars quand ils sont mal payez. C'est le principal fruit de la paix , de regler des deportemens des gendarmes , mais c'est vne chose impossible , tant que leur paye sera retenüe ou differee. Or ce n'est pas tout de tenir en bride ces gens-là , & d'empescher que l'oïsiueté ne leur engendre vn desir de rémuër. Il faut prendre garde aux habitans des villes , qui ne sont pas moins difficiles à gouverner. Car les villageois sont la pluspart occupez & ne pensent qu'à leur mesnage. En vne ville on voit vn tas de faincans necessiteux , qui ne sçachans que faire, cherchent des querelles. Rome a esté fort trauaillee par ceste canaille, qui ne viuoit que de partialitez, & prestoit escorte de gayeté de cœur aux Magistrats seditieux pour piller, massacrer, & mettre tout en confusion. Pour obuier à ce mal, il est besoin de renouveler l'ancienne coustume des Atheniens & Aegyptiens, qui faisoient rendre compte à vn chacun de sa vie , & punissoient ceux qui demeuroient sans rien faire. Encore les Chinois n'endurent point les fai-

neans , recognoissans que c'est vne  
pepiniere des voleurs , assassins , & fa-  
ctieux. Le Prince Hipparque se faschoit  
quād il voyoit quelque hōme otioux,  
il l'exhortoit à travailler ; & afin qu'il  
n'eust aucune excuse , luy offroit des  
terres & des bœufs pour les labourer.  
L'agriculture & le trafic sont deux  
vacations necessaires , & ne sont pas  
moins honorables. En l'une & en l'au-  
tre paroissent le travail, le courage, l'in-  
dustrie, & preuoyāce d'un homme. Le  
labourage nourrit vn estat : le trafic  
l'aggrandit . Et c'est vn abus de pen-  
ser que ces mestiers soient mechani-  
ques ou qu'ils derogent à la Noblesse.  
Les Gentils-hommes Romains met-  
toict eux mesmes la main à la charruë,  
& auoient leurs facteurs en diuerses  
prouinces, par l'entremise desquels ils  
trafiquoient. Et mesme au temps pre-  
sent plusieurs Princes ont des vaisseaux  
sur mer , qu'ils enuoyent aux pays  
estranges , dont ils tirent vn grand  
profit. Certainement il ne faut de-  
nigrer le marchand , principalement  
celuy qui d'une resolution genereuse  
entreprend des voyages hazardeux ,

afin de s'enrichir luy & son pays . Il ne peut faire l'un sans l'autre , & le public estant composé des particuliers , il se ressent des richesses & de la pauvreté de ceux-cy. Or ce qui apporte des commoditez à vne Monarchie ce n'est point la multitude des prestres ministres, ny Religieux, iacoit que leur dignité soit grande & necessaire pour attirer la faueur du Ciel: ce ne sont point aussi les practiciens & officiers de iustice qui ne deuroient estre en si grand nombre comme ils sont en quelques endroiets. Bref il n'y a mestier comparable en vtilité à celuy du marchand, qui accroist legitimement ses moyens aux despens de son travail , & souuentefois au peril de sa vie , sans endommager n'y offenser personne : en quoy il est plus loüable que le soldat, dõt l'advancement ne depend que des despoüilles & ruines d'autrui . Et puisqu'il est question de bannir l'oisiveté, & diuertir les mauuaises pensées qu'elle cause ordinairement en l'esprit des faitneans , il n'y a meilleur expedient pour cela que la negotiation, à laquelle les Princes doiuent inuiter leurs sub-

iects par toute sorte d'artifices. Et cō-  
me Cyrus voulant abastardir les rebel-  
les de Lydie, leur fit subtilement fre-  
quêter les theatres, bordeaux, & caba-  
rets: aussi au contraire pour rendre vn  
peuple actif & laborieux il est necessai-  
re d'ouurir les boutiques, & conuier au  
trafic indifferemment les grands & les  
petits. Mais ny les vns ny les autres  
ne s'y addōneront pas volontiers tant  
qu'ils verront la condition des mar-  
chands si raualee, & qui pis est subiette  
à tant d'impositions. Il est raisonnable  
que le Prince tire quelques deniers sur  
les marchandises qu'on apporte & trās-  
porte hors de sa Seigneurie : mais il  
doibt en cela vser de moderation autāt  
qu'il luy sera possible, & principalemēt  
pour le fait des marchandises necessai-  
res à la vie, cōme bled, vin, sel, chairs,  
poissons, laines, toiles, & cuirs, afin que  
les marchands y trafiquent plus libre-  
ment, & que le peuple les aye à meil-  
leur pris, qui par ce moyen sera contēt,  
& au lieu de murmurer cōtre son Prin-  
ce, le reuerera comme vn astre salutai-  
re, ou Dieu terrestre, luy donnera mille  
benedictions & tesmoignages de sa



bienueillance, en telle sorte qu'il n'aura besoing de soldats, estant assés au dedans de son Royaume : & quant aux estrangers il s'en garētira par l'entretien de quelques compagnies d'ordonnance, encore qu'elles ne soient pas beaucoup requises, sinon pour latisfaire à la deffiance, si tant est que nous puissions obtenir vne paix vniuerselle, dont le plus beau fruct est l'establissement du commerce : & partāt les Monarques doiuent pourueoir, à ce que leurs subiects puissent sans aucune crainte trafiquer tant par mer que par terre : ce qu'un chacun pourra aisement faire en son estat particulier. Et pour bien commencer, faudroit prendre le soing non seulement des grosses riuieres, mais aussi des moindres, & rendre celles-cy capable de porter bateaux, attendu qu'en cela gist toute la commodité du commerce, si bien que ceux qui n'ont aucune riuiere, font venir des eaux par artifice, comme les Brabançons qui ont creusé vn canal depuis Bruxelles iusques à Lescout, afin de communiquer plus aisément avec ceux d'Anuers. On trouue assez de  
belles



belles riuieres en France, mais elles ne seruent qu'à noyer les prez & les heritages prochains, comme l'on remonstra au conseil du Roy Charles neufiesme, qui auoit resolu d'y pourueoir, si les troubles suruenus n'eussent rompu le dessein. Aussi depuis peu de temps on a proposé le moyẽ de ioindre quelques fleuues nauigables. L'argent & la peine seroient en cela bien employez. Mais il seroit plus vrile pour le trafic general, de ioindre deux mers : ce qui ne se peut faire que par trois moyens, iadis pratiquez avec plus de courage que d'effect : c'est à sçauoir en coupant vndestroit de terre qui soit entre deux mers : ou en conduisant vne tranchee d'un fleuve qui tombe dans vne mer, & ne soit pas esloigné de l'autre : ou bien ioindre par vne fosse deux riuieres, lesquelles s'embouchent separément en diuerses mers. Le premier moyen a esté pratiqué par le Roy Demetrius, & les Empereurs Iules, Caligula, Neron, qui ont tasché de couper l'Hexamilo, qui separe la mer Ægée d'auec l'Ionique, mais ils n'ont rien gaigné. Le second moyẽ fut employé

par Ptolomee qui fit vne fosse entre le Nil & la mer rouge, mais il ne poursuivit pas, ayāt esté aduerti que ceste mer estoit plus haute que l'Egypte, & par conséquent qu'elle noyeroit tout le pays. Apres la reuolution de plusieurs siecles les Soldans & les Turcs ont eu le mesme dessein, pour se faciliter le chemin aux Indes. Le dernier moyen pour ioindre les mers a plus heureusement reüssi à Charlemagne. Car il accoupla les riuieres d'Almona & de Radantia, en Franconie, dont l'une tombe dans le Danube & de là dans la mer mediterrance: l'autre se ioinct au Mein & au Rhein, & se rend finalement en l'Ocean d'Hollande: Ainsi on alloit éuiter beaucoup de destours qu'il faut faire, & vne infinité de hazards & incommoditez qu'on souffre pour passer d'une mer à l'autre. Mais lors qu'on estoit en ceste besongne, les pluyes furent si grandes, qu'elles comblèrent la fosse de boubier. Il seroit aisé de mettre fin à ce beau dessein, si la paix estoit en Allemagne. Il y a vn autre endroit, où ces deux mers se pourroient ioindre. Cest en Languedoc,

en tirant vne tranchee de l'Aude qui va par Narbone dans la mer Mediteranee, iusques à la Reige qui se mesle avec la Garonne, & entre dans l'Océan Aquitanique. Le Roy François premier proiettoit d'obliger ses subiets par ceste action qui ne luy eust pas moins apporté de reputation que ses victoires, si la mort ne luy eust enuié cest hōneur. De mesme façon il seroit aisé d'accourir le chemin de la mer Caspienne à la mer Maiour, en coupāt vne petite espace de terre depuis le Tane tombant au marais Meotide, & pont-Euxin, iusques à Volga qui se rēd à la mer Caspienne : car ces deux riuieres approchent en quelques endroits fort prez l'vne de l'autre. Cela rendroit le commerce de Moschouie & des Indes beaucoup plus facile & plus libre. Je confesse que telles entreprises sont grandes & penibles, mais aussi elles sont dignes des grands Monarques, lesquels ne doiuent employer le temps de paix qu'en actions esclatātes, releuees, & profitables au public, comme celle-cy, qui tendent à l'establisement & cōmodité du commerce.

Quel plaisir seroit-ce, de veoir les hōmes aller de part & d'autre librement, & communiquer ensemble sans aucun scrupule de pays, de ceremonies, ou d'autres diuersitez semblables, comme si la terre estoit, ainsi qu'elle est veritablement, vne cite commune à tous? Il n'y a que les lannages & voleurs qui puissent empescher vn si grand bien: mai il est vray semblable, que se voyās seuls, ils penseront à leur conscience. Que s'ils veulent cōtinuer leur façon de viure brutale, ils ne sont pas bastans pour resister à vn consentement general de tant de peuples, qui leur courront sus, & les iront bloquer, assaillir & tuer cōme pauures bestes dans leurs gistes. La guerre sera tousiours bonne contr'eux, si on ne les peut reduire à la raison. Et pour le regard des voleurs de terre, il est aisé de les dōpter, ou de viue force, ou par famine, en leur retranchant les viures, si d'auanture ils tiennent des lieux inaccessibles, comme ils ont en plusieurs endroiets. Les pirates sont plus difficiles à attraper, à cause de la large campagne de la mer, qui leur sert d'asyle & de refuge. Tou-

resfois pour en venir à bout , il y a deux moyens tous dissemblables : la liberalité & la force. Pompee pratiqua l'un & l'autre contre les Corsaires, qui tenoient en subiection la mer mediterraneë, & auoient reduict l'Italie en vne extreme necessité de viures. Car apres auoir esquipé vn bon nombre de vaisseaux, il leur donna la chasse, en deffit vne partie, contraignit le reste d'accepter les conditions qu'il leur proposa, & leur ayant osté les ports qu'ils occupoient, les escarta en diuers lieux, en leur baillant quelques terres pour s'entretenir, & ainsi rompit leur association, pendant laquelle ils s'estoient rendus inuincibles. Si les Roys & potentats d'aujourd'huy ont vne bonne intelligence ensemble, ils pourront en peu de temps nettoyer la mer de ces brigands. C'est vne honte que non seulement on les tolere, mais aussi on leur donne des lieux d'importâce pour retraicts, comme Alger en Barbarie. Le grand Seigneur tire peu de profit, & moins d'honneur de cela, & bien que telles gens luy peuuent rendre ser- uice, en vne occasion; il luy seroit tou-



resfois plus seant, de mettre en ses villes vne garnison de braues & genereux soldats, que de se declarer si ouuertement protecteur des Corsaires. Au surplus, la paix le dispensera de ceste subiection, & les autres Monarques employeront de leur part toute leur puissance, pour exterminer les voleurs. Mais ie ferois d'aduis, de tenter auparavant la voye de douceur, & leur offrir quelque honneste appointment. La pauureté cōtrainct plusieurs de mener vne vie illicite: ceste cause cessant, ils se soubsmettrent à la poliee cōmune. L'importance est de leur assigner pension, ou plustost des heritages. Il y a tāt de terres qui sont inuiles par faulte d'estre cultiuees: que si on les vouloit desfricher, elles suffiroient pour nourrir vne infinité de pauures. Il y a pareillemēt force lieux marescageux, dont on feroit de bonnes terres si les eaux en estoient escoulees. Ce qui occasionna les Romains de donner commissio a plusieurs Magistrats pour nettoyer & desseicher ceste grande palus qui est sur le chemin de Naples, mais ils se sont portez trop l'entement en



cest affaire, de sorte que ce quartier-là est encore aujourdhuy plein de bourbe, qui pourroit estre conuerti en bonnes prairies ou terres à bled, si les hommes y vouloient trauailler: Je diray le mesme des marescages & terres desertes de Languedoc, Prouence & autres cantons de ce Royaume, qui tesmoignent le mauuais meſnage, ou la negligence des François. S'il y a de la difficulté en cela, elle se peut surmonter par vne laborieuse perseuerance Rien n'est impossible à la main & industrie de l'homme. Les Ægyptiens ont employé tant de temps & d'argent à bastir leurs Pyramides, qui n'ont serui que d'ostentation: A plus forte raison doit-on s'efforcer de rendre la fertilité à ces campagnes steriles, pour le soulagemēt d'une infinité de pauures. Et au cas qu'elles ne fussent propres ny suffisantes pour accommoder les pirates, il faudroit leur achepter des terres de labour, & les ensaisiner d'icelles, à la charge de les entretenir en bon estat, & d'en payer vne petite rente par forme de recognoissance. Ceste largesse se feroit aux despens du

public, mais il en tireroit le profit. On achapte aucunes fois bien cherement la paix d'un ennemy. Pourquoy ne preuendroit-on pas les mauuais desseins de ces gens-là, qui denoncent la guerre à tout le monde, par vne liberalité honnestes, qui leur amolliroit le cœur, addouciroit le courage, & les reduiroit à vne vie tranquille. Il y a des naturels qui ne se peuent gagner autrement, & comme ces deux roches dont parle Plin, ne bougent de leur place, quand on les pousse rudement, mais en les touchant du bout du doigt on les esbranle; aussi plusieurs se rangent à la raison par douceur, qui ne fleschiroient aucunemēt sous la violence. Il n'y a point de plus belle victoire ny de plus asseuree, que celle de la courtoisie, & clemence. Vn Prince ne sera iamais blasmé quand il fera le profit de son peuple & le sien en quelque maniere que ce soit. L'Empereur Solyman fit vn traict de maistre politique, quand il rechercha d'accord Dragut & Barberousse Archipirates: il les receut en son Conseil, leur donna des gouuernemens & charges honorables,

afin d'auoir la paix en ses eſtats, bref de  
puiſſans ennemis en fit de bons amis.  
Ce moyen d'attirer les Corſaires à la  
vertu eſt louable, afin que par leur ex-  
emple les autres ſoient rangez à leur  
deuoir, & auſſi de peur que le deſeſpoir  
ne les incite à commettre de plus gran-  
des cruautez. Que ſi quelques vns  
veulent continuer leur volerie, il les  
faut pourſuiure, & chaſtier ſans aucune  
miſericorde: A ceſte fin chaque Prin-  
ce deuroit entretenir touſiours quel-  
ques vaiſſeaux pour cōbatre ces mon-  
ſtres marins. Auguſte pourueut dili-  
gēment à cela: Car outre les vaiſſeaux  
qu'il auoit au port d'Oſtie, de Freius, &  
ſur le Rhein, Danube, & Euphrate, il  
entretenoit deux grandes flottés, l'vne  
à Miſene qui gardoit les coſtes de Frā-  
ce, Heſpagne, Afrique, Aegypte, Sar-  
daigne & Sicile: l'autre à Rauenne qui  
couroit en Grece, & en l'Orient. Il ne  
tiendra qu'aux Monarques de ce tēps,  
que les chemins de la mer ne ſoient af-  
ſez ſez: C'eſt honneur & profit pour  
eux. Le Roy d'Heſpagne y met peine  
de ſon coſté. Car ſon Lieutenant de  
Goa, tous les ans vogue ſur l'Ocean

des Indes Orientales avec vne armee nauale, pour empescher les courses des Pirates : & à mesme fin il entretient bonne garnison, en la ville S. Dominique, qui pour la commodité de sa situation commande à toute la mer du nouveau monde. Les autres Roys peuuēt pareillement affranchir leurs costes de brigandages, & par ce moyen le commerce estant asleuré les hommes auront vne belle occasion de s'addonner au traficât par mer que par terre. Qu'il quelqu'un ne se sēt propre, ou s'il n'est enclin à la negotiation, il y a d'autres mestiers qui cōuiennent au menu peuple. Non que pour cela ils soient mesprisables : car l'architecture, la peinture, l'orfeurerie, l'horlogerie, l'ouurage des foyes, des toiles & autres arts que nous appellons mechaniques, ne cedent gueres en inuention ou subtilité aux arts liberaux, & en vtilité les surpassent. Occasion pourquoy il seroit bon pour encourager les artisans, de leur proposer recompense, & d'establiir en toutes les villes vn officier, qui receuroit les noms de ceux qui excelleroient en quelque art afin de les ap-

pointer suivant leur capacité, laquelle ils feroiēt veoir en presence des maistres ouuriers. Ceste Police esueilleroit les esprits, les retireroit de l'oisiueté, & leur feroit embrasser gayement vne vacation, sous l'esperoir d'estre pourueus en cas qu'ils s'acquittassent biē de leur charge: Et ce qui les encourageroit le plus, ce seroit de veoir le soing que le Magistrat auroit de leur profession attendu qu'il n'y a rien qui excite plus la vertu ou l'industrie, que la recompense donnee par autorité publique. On verroit alors vne belle contention entre les hommes de mesme qualité: chacun s'efforceroit à surpasser son compagnon, pour r'emporter le bruiet & l'attestation d'auoir bien faict en son mestier. Mais nous ne sommes sur le point de veoir vn tel ordre. Les arts sont mesprizez & en particulier & en general. Il n'y a presque moyen en ce siecle de paruenir à vne fortune mediocre par aucun honneste exercice. Vn hōme quelque industrie, quelque eminence de sçauoir, ou artifice qu'il aye en sa vacation, n'est non plus estimé



qu'un chetif apprenti, & ne sçait à qui il se doit adresser, pour gagner sa vie, s'il n'a autre support ou répondant que sa suffisance. A qui aura-il recours? A ces semblables? La jalouse les empêchera de luy vouloir du bien, & quand il feroit merueilles, il luy faut trouver argent pour se faire passer maître: autrement il ne luy sera permis de tenir boutique. Cela sans doute est capable d'aneantir tous les arts, & de rendre tant d'hommes faitneans, qui aiment mieux battre le pavé, servir d'estafiers & coupe-iarets, ou mendier, que de travailler, voyans le peu d'estat qu'on fait des bons ouvriers & ingénieux. Il faut donc avoir soing des arts mechaniques, & y apporter le reglement susdict, afin que le simple peuple s'y addonne sous l'esperance de profit, & d'entretien sortable à sa condition. Car Lycurgus n'avoit point raison de defendre les ouvrages de main, & le trafic à ses Citoyens, ne leur laissant que le bouclier & l'espee. C'estoit violenter la société humaine, & luy oster ses beaux ornemens, voire mesme la d'espoüiller des choses les plus ne-



cessaires. Son ordonnance estoit bonne pour la Republique des bestes, qui n'ont que les dents & les griffes. Numa fit plus sagement qui departit le peuple de Rome par confrairies, & en establit autāt qu'il y auoit de mestiers, recognoissant que le corps d'une ville estoit composé d'artisans & marchands, & que sans eux vn estat ne pouuoit subsister, & perdoit sa forme. Je vous laisse à penser en quelle peine nous serions, si nous n'auions point de laboureurs, vigneron, tisserands, tanneurs, forgerons, mareschaux, chirurgiens, teinturiers, massons, charpentiers, fondeurs, cordonniers, foulons, cardeurs, orfeures, potiers, tourneurs, & autres semblables ouuriers, de qui nous tenons non seulement nos commoditez, mais aussi la vie. De dire que telles vacations appartiennēt aux esclaves, cōme estimoit Lycurgus, cest vne impertinence, attendu qu'un homme prudent & accort ne mesprise iamais vne chose dont il ne se peut passer. Et à quel propos desdaigner les arts mechaniques, principalement celles qui monstrent vne dexterité, outre le profit & plaisir

qu'elles apportent? Au reste ce n'est pas l'estat qui honore l'homme, mais plustost l'homme qui fait honneur à son estat, comme disoit Epaminonde, lors qu'on luy bailla vne chetive commission, & peu conuenable à ses merites. Toutesfois les hommes qualifiez ou pour la noblesse de leur race, ou pour la subtilité de leur esprit, deuroient plustost s'occuper aux sciences, & sur tout à celles qui regardent l'vtilité de la vie, assauoir la Medecine & les Mathematiques. Pour le regard de celles-cy, on ne les peut trop recommander, si nous considerons l'estendue de leur obiet, & la grandeur de leur pratique, outre la certitude de leurs demonstrations, & la facilité qui conuioit iadis les enfans à les apprendre. Quant à la medecine, bien que plusieurs la denigrent, son vtilité est euidente, & pour vne raison qu'on pourra braquer contr'elle, il y en a cent qui luy serviront de contrebatte-rie pour la defendre. Iettons vn peu la veuë sur les autres sciēces. La Theologie surpasse nostre capacité. La Dialectique n'est que seruâte & portiere des

autres. La rhyfique est vne cognoiffance de nature, qui depēd de l'experience. La Rhetorique est superflue. La Iurifprudēce n'est pas plus neceffaire, & vn bon iugement naturel fuffit pour terminer les procez, fans auoir recours à vne milliaice de loix & decifions, qui enuelopent les caufes, au lieu de les demefler. La grammaire poēfie & hiftoire font plus fpecieufes que profitables. Tellement qu'en toutes les honeftes difciplines ces deux-là tiennent les premiers rangs, pour ce qui concerne l'vfage public, & partant doiuent eſtre recommandees, fans preiudice neantmoins des autres qui ſeruent de grand ornement. Voila les exercices aufquels les Princes pourrōt contraindre leurs ſubiects, afin qu'auans de quoy s'emploier, ils ne s'amufent à troubler le repos public: Et ainſi nous auons reietté les cauſes & pretextes de la guerre. Vne autre conſideration pourtant ſe preſente encore. C'eſt l'inimitié & ſ'il faut ainſi parler, l'antipathie qui ſe trouue entre pluſieurs peuples ou pour leurs vieilles querelles, ou pour la diuerſité de leur religion.

Car comment est-il possible, dira quel-  
qu'un, d'accorder des peuples qui sont  
si separez de volonté & d'affection, cō-  
me le Turc & le Persan, le François &  
l'Espagnol, le Chinois & le Tartare,  
le Chrestien & le Juif ou Mahometain?  
Je dis que telles inimitiez ne sont que  
politiques, & ne peuvent oster la con-  
iunction qui est & doibt estre entre les  
hommes. La distance des lieux, la sepa-  
ration des domiciles n'amoindrit point  
la proximité du sang. Elle ne peut non  
plus oster la similitude du naturel, vray  
fondement d'amitié & société huma-  
ine. Pourquoy moy qui suis François  
voudray-je du mal à un Anglois, Hes-  
pagnol, & Indien? Je ne le puis, quand  
ie considere qu'ils sont hommes com-  
me moy, que ie suis subiet comme eux  
à erreur & peché, & que toutes les na-  
tions sont associees par un lien natu-  
rel, & consequemment indissoluble.  
Qui fait qu'un homme ne peut reputer  
un autre estranger, si ce n'est en suivant  
l'opinion commune & inueteree qu'il  
a receu de ses predecesseurs. Je diray le  
mesme pour le regard des Religions qui  
passionnent tant les hommes, & les  
achar-

acharnent les vns contre les autres, si que vn Chrestien quand il rencontre vn Iuif ou Mahometain, pense estre contaminé de leur aspect, & s' imagine de veoir vn demon: d'autre part ceux-cy & les payens ont en pareil horreur les Chrestiens. Je mets en auant ces quatre Religions pource qu'elles sont les plus communes, & toutes les autres en dependent. Les Chrestiens blasme les Mahometains pour leurs superstitions & opinions ridicules. Ceux-cy accusent les Chrestiens de blasphemes & impieté, & n'en parlent iamais qu' avec mespris. Les payens se targuent de leur antiquité, & s'estiment heureux de perseuerer en leurs sacrifices. Les Iuifs se moquent de tout cela, & bien qu'ils soient hays & chassés de tout le monde, neantmoins ils tirent de là vn argument de benediction & faueur diuine, d'autant que parmy tant d'ennemis, au milieu de tant de persecutiōs ils se sont maintenus, & se maintiennent encore en despit des attaques & assauts qu'on leur dōne. Les Histoires loüent les Messeniens, de ce qu'estās refugiez en vn pays estrange, l'espace de trois



censans, ils n'ont aucunement changé leur langue ny anciennes coustumes. On se doibt bien plus estonner des Juifs, qui depuis iâ de siecles ont constamment perseueré en la creance de leurs peres. Or toutes ces Religions se fondent sur preuues, alleguent leurs miracles, & chacun presume que la siēne est la meilleure. Je n'ay pas entrepris de vuidier ce differend. Vn plus suffisant que moy y seroit bien empesché. Seulement ie diray qu'elles tendēt toutes à vne mesme fin, à sçauoir à la recognoissance & adoration de la diuinité. Que si aucunes ne choisissent pas le bon chemin, ou moyen legitime, c'est plustost par simplicité & mauuaise instruction, que par malice, & par consequent sont plus dignes de compassion que de haine. Qu'est-il besoin de se faire la guerre pour la diuersité des ceremonies? ie ne diray pas de Religio, veu que le principal poinct d'icelle gist en l'adoration de Dieu, qui demande plustost le cœur des hommes, que le culte exterieur & les sacrifices, dont on fait tant de Parades: Non que ie vueille cōclure au mespris des cere-



monies; mais ie dis que nous ne deuõs  
persecuter ceux qui ne veulent point  
embrasser les nostres. Par la loy de  
Moyse il est defendu de mesdire des  
Dieux estrangers, & dans le tẽple de Sa-  
lomon on receuoit indifferennẽt les  
offrandes des idolatres. Et maintenant  
les hõmes ruineroient volontiers ceux  
qui ne s'accordent pas à leur foy. Ils  
leur font leur procez, & les cõdamnent  
par leur discours nõ pas à des supplices  
cõmuns, mais à des peines eternelles.  
La pieté est vn trop bõ arbre pour pro-  
duire de si mauuais fruiçts, cõme sont  
les rancunes, inimitiez & mesdisances.  
Ceste vertu, cõme toutes autres, doit  
estre accõpagnee de prudence, de peur  
qu'il ne nous arriue cõme à Apulee, qui  
pensant se chāger en oiseau, se vit trās-  
formé en vn asne. Aussi tādīs que nous  
taschõs de mōter au ciel par l'ingrediẽt  
de la Religion, gardõs de tōber en vne  
stupidité & inhumanité brutale. Ie ne  
taxe personne, & ne specifie aucune re-  
ligion. Tant y a que plusieurs peuuent  
estre cõparez aux cõpagnons d'Vlysse,  
qui pẽsoiẽt auoir trouué vn riche tresor  
& ce n'estoit qu'vn balõ plein de vent.

La philautie aueugle vn chacun , & le metamorphose en vn second Narcisse , si bien qu'il se perd de l'amour de soy mesme : ce pendant la chanson pastorale se verifie :

*Souuent la chose laide à l'amant semble belle.*  
Encore si nous estions cõtens d'aimer nos coustumes , il n'y auroit pas subiect d'estonnement ny de plainte : mais en cecy nous sommes dissemblables aux autres amoureux , qui ne veulent point de corruaux. Nous au contraire voulôs que tout le monde embrasse nos persualions comme vne regle infailible. Ce vice est familier au simple populas, qui n'a iamais passé la banlieue de sa ville. Il croit que tous sont tenus de viure comme luy , & ne prise que ses coustumes , à la façon de ces niais d'Athenes, qui estimoient la Lune de leur pays meilleure que celle des autres. Les sages & diuins esprits penetrent bien plus loing, & considerent que l'harmonie du monde est composee de diuerses humeurs , & que ce qui est louable en vn lieu, n'est pas trouué bon par tout, comme disoit vn gentilhomme Persan a Themistocle. A ce

propos il me souuent de ce que raconte Ælian, qu'il y a deux villes au nouveau monde biẽ differentes en Police. En l'vne la iustice est obseruee, la paix est perpetuelle, & pource elle se nomme Pieuse. L'autre s'appelle Vaillante, dont les habitãs sont tousiours armez, & font incessammẽt la guerre, ne pouuans viure en repos. En tesmoignage dequoy ils traueserent autresfois l'Ocean pour conquerir ces pays : mais comme ils furent aduertis que les peuples de par deçà c'est à dire de l'Asie, Europe & Afrique s'addonnoient à la religion, ils ne daignerent passer outre, comme s'ils eussent eu honte d'auoir descouuert en vn peuple incogneu vne telle niaiserie. On dira de ce conte tout ce qu'on voudra. Il n'importe, pourueu qu'on recognoisse que les hõmes sont fort bigarrez, & que ce qui est honoré en vn endroict, est abominé ou moqué en vn autre. Ce qui occasionna à mon aduis quelques Philosophes de soutenir, que l'honnesteté & turpitude ne consistoit qu'en phantasie & police humaine. C'estoient des refueurs. Je le croy ainsi, specialement

en ce qui touche ceste proposition. Mais ce n'est pas tout de remarquer les vices de cestuy-cy & de cestuy-là : il faut considerer les nostres, & ne point imiter ceste fee, qui prenoit ses yeux quand elle entroit au logis de ses voisins, & arriuant en sa maison elle les pendoit a la porte. Que si la curiosité nous pousse à esplucher les deportemens d'autrui, pour le moins apres auoir contrerolé les defectuositez, iettons la veue sur ce qui se trouuera en luy de loüable. Ne faisons point comme les Ophiogenes : Ne suçcons point le venin des actions : Ny comme les mouches qui s'arrestēt plustost sur les lieux raboteux & infectez, que sur ceux qui sōt polis & purifiez. Je croy que ces gēs là qui ne suivent pas la vraye Religion sont impies, que leur creance est absurde & pleine de blasphemes. Si sont-ils pourtant hommes comme nous, formez au mesme moule, & par vn mesme ouurier : capables de raison, & des vertus morales qui les peuuent rendre dignes d'amitié & admiration, si on ne se laissoit preoccuper d'opiniaistreté & de presumption. Quittons ces deux auor,

rons de nostre esprit, ces enfans iume-  
aux de nostre imbecillité, qui fillent les  
yeux de l'entendement humain, & em-  
peschent l'effet des bonnes inclinatio<sup>ns</sup>  
que la nature nous donne. Represen-  
tons nous que la Religion ne consiste  
pas en paroles ny en actions d'apparē-  
ce. Il ne suffit pas de dire : J'ay la vraye  
foy, i'assiste aux sacrifices & prieres pu-  
bliques. Il faut estre homme de bien,  
auoir la charité, sans laquelle la foy est  
superflue. Celuy qui manque de ceste  
vertu, n'a pas la Religion biē emprain-  
te dans le cœur. Quelques vns seruent  
Dieu par hypocrisie : plusieurs y croy-  
ent par ouïr dire & par accoustuman-  
ce : mais quand on voit la deuotion  
conioincte avec vne douceur & chari-  
té, c'est signe d'une ame véritable-  
ment religieuse. La pieté est incom-  
patible avec les animositez. Si nous  
sommes au chemin de salut, à la bon-  
ne heure : essayons d'y amener ceux  
qui en sont dehors, par instruction, &  
bon exemple. Il n'y a point d'autres  
moyens d'arracher les erreurs &  
mauuaïses opinions que les hommes  
ont conçu des choses diuines.

Les mesdisances & detractiōs n'y font rien : la force y est inutile. Ne le sçavons-nous pas ? De verité ce seroit le meilleur , qu'il y eust vne seule forme d'adoration , pour ce que la diuersité du culte exterieur diuise les affections des peuples & les induit souuent à se partialiser. Et de fait les sages Princes s'opposent aux nouuelles Religions, qui veulent prendre pied : mais ils endurent celles qui ont desia pullulé , & tiennent ferme par la racine. Au premier cas ils sont poussez de zele , & au second la necessité les oblige, & la certitude de ceste maxime: Que la guerre diminuë la vraye Religion au lieu de l'aduancer, comme estant la source de toutes vilainies, impietez, blasphemes & Atheïsmes, qui trainent pareillemēt l'estat à perdition. Je ne diray point cōme Symmaque , qu'il n'importe par quelle maniere on descouure le secret de la diuinité : Encore moins veux ie soustenir que toutes Religions sont introduites par moyēs humains, comme a escrit vn Theologal de ce temps, grād defenseur au reste de l'Eglise Catholique. Qui est proprement les me-



surer toutes à vn mesme pied, & reuoluer les trois veritez en doubte, veu que tout homme est subiect à tromper & à se tromper. Certainement il y a vne confession de foy & forme de ceremonies plus receuable que les autres. Mais puisque cest vne grace surnaturelle, il faut qu'elle vienne de dieu, & non pas des hommes qui avec toutes leurs armes n'ont pas le pouuoir de faire croire le moindre article de leurs mysteres. Ils seront parauanture aller quelques vns au temple, à la Synagogue, & à la Mosquee, mais par telle violence ils les rendront Hypocrites, non pas fideles. Ceux doncques qui ont la vraye Religion, qu'ils remercient Dieu de ceste grace : & s'efforcent de la monstrer par bônes œures. Qu'ils ne pensent pas reduire imperieusement à leur volonté la creance des autres, en laquelle ils n'ont point d'interest, pourueu qu'ils se contiennent és bornes de modestie, & ne troublent point la feste de la tranquillité publique. C'est le but où il faut viser. Il n'appartient aux hommes de punir où corriger les defaux de la foy. C'est à faire celuy qui veoit

les cœurs & les plus secrettes pensées. Les fautes de la volonté sont punissables selon les loix Ciuiles : Celles de l'entendement à sçauoir les fausses opinions n'ont que Dieu pour iuge. Aussi ceux qui ont voulu remuer ceste corde n'y ont rien gagné. L'Empereur Charles cinquieme zelateur de la Religio s'il en fut oncques, voulut estouffer le Lutheranisme des sa naissance. Il employa pour cest effect les forces d'Hespagne, d'Italie, d'Allemagne & des Pays-bas. Il gagna des batailles sur les Protestans, prit leur chefs prisonniers, & donna tant d'eschech à ceste nouvelle secte, qu'elle estoit sur le point d'estre mattee. Incontinēt voicy vn reuers de fortune. Cest Antee qu'il auoit retrassé redouble sa vigueur de sa cheute. Vn nouveau ennemy luy vient sur les bras. Ses partisans se rebellent. Il est plus empesché apres sa victoire qu' auparauant: en somme il est contrainēt pour l'assurance de son estat d'accorder aux vaincus ce qu'ils demandoient, la liberte de conscience. Le mesme est arriué à nos Roys, qui ont tenté toutes les voyes à eux possi-

bles pour reünir leurs subiects à l'ancienne creance. Ils ont poutsuiui les ennemis d'icelle à feu & à sang, les ont matrassez en diuerfes rencontres. Au partir delà, ils ont recogneu qu'il estoit plus aisé d'entretenir deux Religions en paix, que d'en conseruer vne en guerre, & que telle desunion de foy ne preiudicioit point à l'vñion generale. Aussi nous voyons que les Turcs viuent paisiblement, bien qu'ils permettent l'exercice des Religions contraires à la Mahometane. Les Polonois ne se scandalisent point de ceste diuersité. Et le Roy d'Hespagne permet aux Indes la liberté de conscience. Cecy soit dict pour monstrier que la difference des Religions ne peut empescher la paix vniuerselle. Mais ce n'est assez de l'establir. Il est besoin de l'asseurer à perpetuité: ce qui est tres-difficile. Car pour faire vn accord, il ne faut qu'une bonne inspiratiõ qui touchera le cœur des Princes où la persuasion d'un homme d'autorité, qui les recõciliera ensemble: & souuẽt fois la necessité les y contraint, apres qu'ils se sõt hatasez. Mais il semble que la bõnasse ne peut estre de l'õgueduree en l'Ocean de nos affaires,

où les vents impetueux des ambitions excitent tant d'orages. Posez le cas que la paix aujourdhuy soit signee, qu'elle soit publiee en plein theatre du monde: Que sçauons-nous si la posterité en voudra emologuer les articles? Les volôtez sont muables, & les actiôs des hommes de ce temps n'obligent pas leurs successeurs. Pour clore le passage à ceste obiection, il suffit le rememorer de ce que nous auôs dit touchant les causes de la guerre, lesquelles n'estans pas considerables pour les raisons cy-dessus alleguees, il n'y a rië qui puisse occasionner la rupture d'vne paix. Neantmoins pour en prevenir les inconueniens, il seroit necessaire de choisir vne ville, où tous les Souuerains eussent perpetuellement leurs ambassadeurs, afin que les differës qui pourroient suruenir fussent vuidez par le iugement de toute l'assemblee. Les ambassadeurs de ceux qui seroient interessez exposeroient là les plaintes de leurs maistres, & les autres deputez en iugeroient sans passion. Et pour authentifier d'auantage le iugement, on prendroit aduis des grandes Republiques,

qui auroiēt aussi en ce mesme endroiēt leurs agens. Je dis grandes Republiques, comme celle des Venitiens & des Suisses, & nō pas ces petites Seigneuries, qui ne se peuuent maintenir d'elles mesmes, & dependent de la protection d'autrui. Que si quelqu'un cōtreuenoit à l'arrest d'une si notable cōpagnie, il encourroit la disgrace de tous les autres Princes, qui auroient beau moyen de le faire venir à la raison. Or le lieu le plus commode pour vne telle assemblee c'est le territoire de Venise, pource qu'il est cōme neutre & indifferent à tous Princes: ioinēt aussi qu'il est proche des plus signalees Monarchies de la terre, de celles du Pape, des deux Empereurs, & du Roy d'Hespagne. Il n'est pas loing de France, de Tartarie, Moschouie, Polongne, Angleterre, & Dannemarch. Quant à la Perse, la Chine, l'Ethiopie, & Indes orientales & occidentales, ce sont pays bien reculez, mais la nauigation supplée ceste incommodité, & pour vn si bon subiect, on ne doit point refuser vn long voyage. Tant y a que ie ne trouue au monde vn seiour plus pro-



pre à vn tel affaire que celuy là . Mais la difficulté est plus grande pour le rang, que l'on donnera ausdits Ambassadeurs, qui ne cederont pas volontiers l'un à l'autre: toutefois ie diray ce qui m'en semble . Non que ie m'estime capable d'un tel arbitrage , mais d'autant qu'il importe d'esclaircir ce point, pour le subiect que nous traitons. Chacun en pourra dire son aduis. Si ie suiuois mon affection, & que mes desirs eussent lieu, pour l'honneur que tout homme de bien doit à sa religion & à son pays , ie scay estant Catholique & François, ce que ie deurois opiner là dessus. Mais il n'est pas question de songer à soy seulement, il s'agit de procurer le bien de la société humaine, dont nous sommes les membres, de ne mescontenter personne, & donner à vn chacun le rang qu'il merite. Je parleray donc icy indifferemment, comme si i'auois este né en la republique imaginaire de Platon, ou en la region de les Idees . Que si quelque monarque trouue que i'ay donné trop d'aduantage aux autres à son preiudice , ie supplieray sa Maiesté



de croire que ie l'ay fait par ignorance de la grandeur, & qu'en cecy ie me suis accommodé à l'opinion la plus commune & apparente. Car ie m'asseure que peu de gens dénieront la preseaunce au Pape, tant à cause de l'honneur que luy deferent les Princes Chrestiens, & du deuoir qu'ils luy rendēt presque tous en faict de spiritualité, que pour le respect de l'ancienne Rome, de laquelle il est Seigneur temporel, & partant le premier lieu en toutes assemblees luy appartient ou à son Legat. Quant au second, s'il faut attribuer honneur aux Princes selō la majesté, puissance, & felicité de leur monarchie, ces qualitez se trouvent si releuees en l'Empereur des Turcs, que ceste seance ne luy peut estre déniee, attendu mesmes qu'il tient la ville de Constantinople, siege de l'Empire Oriental, qui va de pair à pair avec Rome : aussi elle en porte le nō. Ces considerations feront que l'Empereur Chrestien, qui par auanture luy voudroit contester ce droit, se contentera du troisieme rang, aussi volontiers cōme les autres monarques luy accordent librement ceste place.

Car encore que les Roys ne tiennent leur sceptre que de Dieu, que leur nom soit auguste, leur personne sacrée & inviolable, neantmoins le tiltre d'Empereur a esté de tout temps estimé plus specieux & redoutable. Dont-il appert que ceux-là se sont trompez, qui ont escrit que l'Empereur n'estoit qu'un simple chef n'ayant non plus d'autorité qu'un Duc de Venise, & que la souveraineré de l'Empire estoit iadis au senat & au peuple, & maintenant aux Estats d'Allemagne. Pour confirmer leur dire, ils alleguent l'exēple de deux ou trois Empereurs qui ont esté degradez. Mais cest argument n'est pas vallable, attendu que nous lisons plusieurs Roys avoir esté privez semblablement de leur sceptre, & neantmoins leurs successeurs sont recogneus pour Souverains. Que si quelques Empereurs ont soubsmis leur puissāce à l'assemblée des estats, s'ils ne font rien que par leur aduis il ne faut pas conclure qu'ils ayent perdu pour cela leur souveraineré, non plus que les Roys qui laissent examiner & verifier leurs edicts par leur Conseil ou Parlement.

Vne submission volontaire ne doit estre tiree en consequence. Et pour vn Prince qui s'est assubiecti par modestie ou nonchalance, on en peut alleguer vne douzaine, qui se sont portez autrement, & n'ont pas laissé raualer leur puissance. L'election de l'Empereur, le deuoir qu'il rend au Pape, ce sont ceremonies, qui ne diminuent point sa grandeur. Au surplus quand il est question de iuger d'une chose, il faut principalemēt considerer son origine & premiere institution, & non pas les mutations qui y sont suruenues. Or si nous prenons garde aux anciēns Empereurs, nous ne doubterons point qu'ils n'ayent esté Souuerains. Iules Cesar qui le premier a pris ce tiltre, disoit que la Republique n'estoit plus qu'un nom sans effect, & qu'il falloit tenir ce qu'il disoit pour loy inuiolable. Auguste n'estoit pas moins Souuerain, & mesmes le peuple luy ceda toute sa puissance. Je diray le semblable des autres Empereurs: Que s'ils prenoient auis du senat, ou iustifioient leurs actions, ce n'estoit par obligation, mais par modestie ou vraye ou simu-

lec. Et quelle plus grande marque de souveraineté voudroit on, que de commander absolument, disposer de tout à son plaisir, mesmement de la vie des subiects, donner des Royaumes, & n'estre comptable à personne? Les Empe-  
reurs ont ioui de tous ces droicts là, & s'ils ont laissé abastardir leur autorité, il ne s'en suit pas que le tiltre qu'ils portent estant considéré en sa nature, ne signifie qu'un Capitaine en chef, comme Bodin a voulu persuader. Je sçay bien que cela estoit veritable du temps de la liberté des Romains. Car alors un general d'armée estoit qualifié Empereur, notamment apres avoir emporté quelque signalée victoire, & n'usurpoit que pour un peu de temps ce tiltre qui luy seruoit de surnom. Mais Iules Cesar ayant supplanté ses ennemis, & s'estant emparé de Rome, releua bien ceste appellation, & prit le tiltre d'Empereur pour un prenom, afin de le rendre seigneurial: Ce qui luy acquit l'envie & haine de plusieurs, ainsi que les Historiens ont remarqué. Mais pour parler de nostre temps, les Roys n'auroient point d'honneur de ceder, comme ils font, à ce Prince, s'ils le recog-

noissoient simple Lieutenant ou subiect d'un autre. Les Roys de France y ont interest, qui ont tenu autrefois l'Empire, voire l'ont acquis au prix de leurs armes. Au moyen dequoy on ne leur peut debattre la precedence pour le moins par dessus les autres Roys, attendu qu'ils commandent à un peuple le plus renommé qui se trouue au monde. Car soit que nous parlions des anciens Gaulois, leurs conquestes sont notoires, & les peuplades qu'ils ont fait en plusieurs regions tesmoignent assez leur valeur. Soit que nous iettiōs les yeux sur les François qui leur ont succédé, leur nom est encore auourd'huy redoutable, & fameux plus que aucun autre parmy les nations estrangeres: Qui pour ceste cause quitteront volontiers le quatriesme lieu au Monarque d'un si beau Royaume. Apres luy ie ne feindray point de mettre le Roy d'Hespagne, qui en puissance & richesses, égale les plus grands Roys, & en estenduë de pays les surpasse. Le sixiesme lieu pourroit estre debatue entre les Roys de Perse, de la Chine, le Prete-lan, le Precop de



Tartarie, & le grand Duc de Moscho-  
uie. Neantmoins quand ie considere  
que les Perses ont eu iadis à leur tour  
la Monarchie du monde, & qu'encores  
aujourdhuy ils ont vne bonne partie  
de leur ancien domaine, i'estime qu'ils  
doiuent estre preferez aux Ethiopiens  
lesquels aussi semblent deuoir estre  
preferez aux Tartares, pource que  
l'Empire de ceux-cy n'est fondé que  
depuis trois ou quatre siecles: & celuy  
du Prete-Ian se peut vâter de son anti-  
quité, outre plusieurs choses qui le rē-  
dent recômandable. Le Roy de la Chi-  
ne apres le Tartare merite place au cō-  
sistoire des Souuerains, pour l'opulen-  
ce & encore plus pour la belle police  
de son Royaume. Le Duc ou Empe-  
reur de Moschouie l'égale ou le sur-  
passe en forces. Et les Roys de la grād  
Bretagne, de Pologne, de Dannemarc,  
de Suede, du Iapon, de Marroc, le  
grand Mogor, & autres Monarques  
tant des Indes que d'Afrique, ne doi-  
uent pas estre aux derniers rangs, tous  
braues Princes, qui se maintiennent  
d'eux mesmes & ne dependent de per-  
sonne, partant pourroient contester

---



le prix d'honneur avec leurs semblables : toutesfois pource qu'en toutes assemblees il faut garder vn ordre : ie n'en puis imaginer de meilleur & de plus raisonnable que celuy que i'ay proposé. Que si quelques Princes ne s'en contentent, qu'ils s'en rapportent au iugement des autres. Cela ne diminuera rien de leur autorité, au contraire on les estimera d'autant plus louables, qu'ils se soubsmettront volontairement à la raison. Car il ne faut point dire que la raison est au bout de l'espee. Ceste rodomontade appartient aux sauuages. Les anciens Gaulois s'en sont mal trouuez, quand ils responderent aux ambassadeurs Romains, que tout estoit aux plus forts. L'issuë funeste de leur entreprise, monstre bien que ceux qui rebutent la raison pour maistresse, tombent finalement en la puissance de leurs ennemis, qui les maistrisent bien autrement, & leur font sentir, que c'est de s'asseurer en telles brauades. Il semble qu'un Monarque quel qui soit, ne doibt faire difficulté de subir le iugement de tant de Souuerains, non seulement pour ce subiect,

mais aussi pour tout autre différent qu'il pourroit auoir à demeller avec ses semblables. Et si les opinions de l'assemblée des Princes où leurs deputez se trouuoient, ny parties, & en égale balance, cōme il peut arriuer, les deputez des Republiques qui auroient voix deliberatiue pourroient alors estre appelez, afin de terminer le debat par le cōtrepoids de leurs suffrages. Et d'autant que plusieurs Princes se trouuent egaux en maiesté, force, & opulēce, qui à ceste occasiō ne voudroient pas ceder l'un à l'autre, ie croy qu'en ce cas il seroit bon d'ordonner, cōme on faict en quelques endroiets, que le premier venu d'entre eux auroit la preſeance, ou le plus aagé, ou pour mieux faire, il faudroit imiter les Consuls Romains, qui cōmandoient chacun à son tour : aussi on partageroit la preſeance, qui seroit donnee successiuemēt a ceux qui cōtesteroient. Ce seroit le moyē de retrancher tout mescontentement, mais il ne seroit besoin de le pratiquer sinon que entre ceux qui auroient grāde appatēce de contester ensemble. Car il n'est pas raisonnable que le Roy d'une ville ou

d'une petite province entre en compromis pour la seance avec vn Roy de France ou d'Hespagne : encore moins vn Duc, Marquis, ou Côte, & m'asseure que les Duc des Florence, Lorraine, Sauoye, biẽ qu'ils soiẽt Souuerains, s'estimerõt neantmoins honorez d'auoir place en vne telle assemblée, apres ceux qui iouissent du tiltre de Roy, principalement ceux qui ne l'ont point vsurpé par ambitioẽ depuis peu de iours. Si donc ils ont à debatre la preface, cest contre ceux qui portẽt semblable qualité, à sçauoir Ducs, Marquis & Comtes, entre lesquels ie ne mettray point icy de difference, pource que iacoit que le Duc soit ordinairement estimé plus que les deux autres, toutefois il arriue souuent au contraire que le Comte ou Marquis a des Ducs qui releuent de luy, & partãt il n'est à propos de preferer l'vn à l'autre pour le regard du nom, mais bien pour autres considerations, comme pour la reputation, antiquité, puissance, estenduẽ de Monarchie, qui sont les principaux points où il cõuiẽt prendre garde en matiere d'honneur ou de preface.

Et suivant cela les Roys & Empereurs iugeront les differends entre lesdits Princes de moindre qualité, & leur assigneront à chacun leur place, laquelle ils accepteront, comme il est à presumer, de bonne volonté. Et qui seroit le Prince si téméraire qui oseroit desdire la compagnie de tous les Monarques du monde? Les villes de Grece se rapportoient à l'arrest des Amphictyons, & ceux qui ne leur obeissoient, enouroient l'indignation commune, non seulement du pays, mais aussi des estrangers: comme Philippe de Macedone fit paroistre aux Phocenses, & prit occasion de leur faire vne cruelle guerre, pource qu'ils auoient esté condamnez par les Amphictyons. Et les anciens Princes de Gaule, bien qu'ils eussent leur Seigneurie & souueraineté à part, passoient leurs differends par l'aduis des Druides, sur peine d'estre excommuniés & abominez de tout le peuple. Et toutefois iamais Conseil ne fut si auguste, ny assemblée si honorable, que celle dont nous parlons, laquelle seroit composée des ambassadeurs de tous les Monarques & Republiques Souueraines, qui seroient depositaires

& ostages de la paix publique. Et pour mieux l'autoriser, tous lesdits Princes iureroient de tenir pour loy inuiolable ce qui seroit ordonné par la pluralité des voix en ladicte assemblée, & de poursuiure par armes ceux qui s'y voudroient opposer. Ceste cōpagnie donc iugeroit les débats qui suruiendroient tant pour la preseance, que pour autre chose, maintiendrait les vns & les autres en bonne intelligence, iroit au deuant des mescontentemens, & les appaiseroit par la voye de douceur, si faire se pouuoit, ou en cas de necessité par la force. Au moyen de quoy là paix estant generallyment establie entre tous les Princes, il ne resteroit sinon que de l'entretenir particulièrement en chaque Monarchie: A quoy tous les Souuerains trauailleroient de leur part, & n'auroient pas beaucoup de difficulté à se faire obeïr de leur peuple, & le tenir en bride. Car ce qui contrainct les Monarques d'endurer de leurs subiects, c'est la crainte qu'ils ne s'associent des estrangers, ou que ceux-cy ne fassent profit des diuisions & querelles entre les subiects &



le Prince. Or ceste crainte seroit alors superflue, pource que par le moyen de la paix, chacun se contenteroit de sa Seigneurie, & ne songeroit à autre chose qu'à gouverner son peuple. Il seroit adoré des bons, les méchans trembleroient à son aspect. Il n'auroit que faire d'apprehender les rebellions & partialitez, dont-il viendroit à bout avec l'assistance des autres Souuerains, qui luy presteroient vn prompt secours, comme ayans tous interest au chastiment des rebelles. Et ainsi les Princes receuroiēt le principal fruit de la paix vniuerselle. Car ils ont beau faire en l'estat où ils sont. Qu'ils se fortifient d'alliance tant qu'ils voudront, qu'ils bastissent des citadelles, & s'arment de tous costez, ils auront tousiours de quoy craindre, s'ils ne conspirent vnanimemēt à vne cōcorde generale. Il ne faut qu'un Prince ennemy pour les deposseder, & non seulement vn voisin, mais bien souvent vn peuple reculé dont on se doubtoit le moins est capable de ruiner vne Monarchie. Le nom des Macedoniens estoit obscur & incogneu, iusques au tēps de Philippe & Alexan-



dre, qui assubiettirēt tout l'Orient. Les Gots s'estoient tenus clos & couverts en vn coing d'Allemagne, iusques au regne de Valentinian : lors ils cōmencerent à courir le pays avec vn tel succez, qu'ils firent en peu d'annees vne raffe de l'Empire Romain. Les Anglois n'estoient estimez non plus que des pirates au mesme temps, qui s'emparerēt neantmoins de la grand Bretagne. Il n'y a pas quatorze cens ans qu'on parle des François. Les Turcs se sont esueillez du temps de l'Empereur Basile, & plus encore sous Cōstantin le gladiateur. Les Tartares depuis trois ou quatre cens ans ont faict parler d'eux: Si lors que ces gens là sortirent de leur pays, la paix eust esté generale, on les eust bien empesché de s'estendre si auant, comme ils ont faict. On eust couru sur eux de toutes parts, & n'eussent pas esté bastans pour resister aux armes associees de l'vniuers. Mais ils se voyoient beau ieu parmy les diuisions des peuples, qui estoient bien aises de veoir ruiner leurs voisins, & les abandonnoient au besoing, faute d'alliance & amitié mutuelle.

Craignons qu'il ne nous arriue ce que nous auons fait aux autres. Nous ne cognoissons pas encore tous les païs de la terre habitable. Il y a peut-estre quelque peuple vers l'occident ou midi, qui nous taille de la besongne. Qui eust dict il y a cent cinquante ans aux Ameriquains, que des hommes barbus viendroient bientost conquerir leur païs; ils n'eussent tenu compte de cét aduertissemēt & s'en fussent moquez. En vn moment ils ont veu ce qu'ils n'auoient pas preueu, & auparauant que d'ouir le nom des Hespagnols ils en ont esprouué la puissance, ne plus ne ne moins qu'un esclair paroist deuant le grondement du tonnerre. La distance des lieux, la difficulté des chemins, la largeur de cét effroyable Océā qui leur seruoit de rempart naturel, ne les a seu garantir d'une ruine, qui seroit incroyable, si nous n'en apperceuions les effets. Cas estrange! De veoir trois cens hommes entrer en vn païs incogneu, abundant en richesses & en peuple y bastir des forts sans contredict, puis imposer la loy à tāt de milliarts d'hōmes, prēdre & tuer

leurs Roys, & finalement reduire vn second mode en miserable seruitude. cela surpasse toute creance. C'estoient des coyons, dirons-nous, qui n'auoient point de courage ny valeur. Tout beau. Les Histoires ne parlent pas ainsi d'eux: au contraire elles tesmoignent que la plus part de ces peuples estoit fort addonnee à l'exercice des armes. Et quand ils eussent esté foibles en toutes façons il est certain que Cortez avecques neuf cens Hespagnols n'estoit pas capable de vaincre ceux de Mexique, s'il n'eust esté fauorisé de leurs ennemis, qui l'assisterent de deux cens mil hommes, en sorte que les partialitez de ceux du pays ouurirent la porte aux estrangers, qui supplanterent les vns & les autres. Que si les estats de ce grand monde nouveau eussent esté pacifiques, si ceux qui y commandoient se fussent contentez de leur Seigneurie, ils iouïroient encore d'une pleine liberté. Mais ils ne pouuoient viure à leur aise, s'ils ne mangeoient les corps de leurs voisins: ils vouloient auoir l'honneur de les ranger sous leur obéissance, & esten-

dre leur Monarchie tant que leurs iavelots pourroient atteindre. Ceste ambition les a ruinés. Qui montre suffisamment, que rien ne peut assseurer vn Empire, sinon vne paix generale, de laquelle le principal ressort consiste en la limitation des Monarchies, afin que chaque Prince se contienne és limites des terres qu'il possede à present, & qu'il ne les outre passe pour aucunes pretentions. Et s'il se trouue offensé par vntel reglement, qu'il considere que les boines des Royaumes & Seigneuries sôt mises par la main de dieu, qui les oste & transfere quand & où bon luy semble : que si son pere ou ayeul a esté puissant, ses grands bis-ayeuls & ancestres plus esloignez ont mené vne vie priuee : partant qu'il ne songe point à recouurer ce que Dieu auoit presté à sa race pour vn temps : mais plustost a cōseruer ce qui luy reste qu'il n'hazarde point le certain pour l'incertain : bref, pour retourner à nostre propos, s'il a quelques occasions de se plaindre, qu'il s'adresse à ceste grande assemblee, comme au plus competent iuge qu'on scauroit ima-

giner. Voilà le principal moyen d'establiſſir la paix vniuerſelle, & duquel tous les autres dependent. C'eſt par là qu'on doit commencer. Car tant que les Souuerains feront bande à part, qu'ils n'aient aucune communication enſemble par l'entremiſe de leurs ambassadeurs, ils taſcheront de s'aggrandir à quelque prix que ce ſoit, & trouueront aſſez de pretexte pour empieter les vns ſur les autres. Mais s'ils ſe contentent de leur fortune preſente, s'ils donnent au public leurs pretentions, comme ils doiuent faire, s'ils s'vniffent au corps de ceſte aſſemblée, de laquelle ils ſont les membres, il n'y a rien qui puiſſe retarder vne bonne paix, ny la rompre. Ne faut point dire, que les meſchans l'empescheront, & qu'ils ſont en plus grand nombre que les gens de bien. Ceste proposition eſt fauſſe, & ſi elle eſtoit vraye, tout ſeroit perdu. Que ne fait vne meſchanceté quand elle a la force? Quand ie me remets deuant les yeux l'eſtat des affaires humaines, ie trouue que les hommes ſont diuiſez en trois parts



qui sont à peu près égales en nombre: Et ceste diuision se peut remarquer en chaque prouince, ville, & village où nous voyons quelques vns meschans, les autres gens de bien, & les autres imbecilles. Soubs le nom d'imbecilles ie comprends ceux qui sont foibles de corps & d'esprit, principalement les timides, lesquels ie separe d'avec les bons, pour autant que la timidité empesche vne infinité de vertueuses actions: c'est pourquoy vn ancien proverbe nous aduertit de ne point nous accoster des pusillanimes. Et de vray telles gens ne font ny bien ny mal, & se rangent tousiours du costé des plus forts. Quant aux meschans, ils n'osent faire paroistre leur mauuaise volonté, s'ils n'ont vn chef qui les autorise. C'est alors qu'ils se mettent en campagne: autrement leur effort comme celuy des voleurs est de peu de duree. Comment pourront-ils donc empescher vne paix, quand ils verront tous les Princes assisteés des gens de bien, qui ne leur manqueront iamais pour ce subiect, & outre du populas imbecille, qui ne demande pas moins le repos?

pos ? Sans doute les deux tiers emporteront l'autre , & vous verrez tous ces fierabras souples comme vn gand au commandement de leurs Monarques. Qu'on publie seulement la paix *De par le Roy* . Ces paroles leur feront tomber les armes des mains. Il y auroit peut-estre quelque difficulté de ramener à vne vie paisible les Turcs & les Tartares, qui ne font volontiers autre exercice que la guerre : mais ces peuples portent tant d'obeïssance à leurs Princes , que les voyans résolus à la paix , ils ne leur oseront contredire. Ces deux Monarques n'ont point d'occasion de faire la guerre, veu qu'ils ont vn si bel Empire. Et que feront-ils quand ils verront tous les autres Princes d'accord ? Non, non. Il n'est plus temps de s'imaginer des trophées. Il faut quitter ces meurs barbares , & monstrier au peuple le chemin d'humanité & vray honneur, afin qu'on ne viue plus d'vne façon brutale. Il faut faire regner la raison & iustice, & non pas la violence, qui ne conuient qu'aux bestes. On a esté par le passé prodigue de la vie des hōmes. On a veu vn deluge

uniuersel de leur sang , capable d'em-  
pourprer la mer & la terre. Baste. C'e-  
stoit vne saignee necessaire pour pur-  
ger le monde de ses humeurs vitieuses  
ou superflües , & Dieu se vouloit ser-  
uir de ce moyen, pour establir les Mo-  
narchies. Maintenant qu'elles sont ap-  
puyees sur les pilotis d'une lōgue pos-  
session, il ne les faut esbrāler, mais plu-  
stost les affermir par vne bonne paix.  
Le grand Solymā , donnoit liberalement des Royaumes, disant qu'il estoit  
rassasié de tant de gloire que la vertu  
de ses predecesseurs & la sienne luy  
auoit acquise. Peut-estre il auoit ap-  
pris cela de César , qui estoit attedié  
de triumphes , & n'en vouloit plus.  
Quoy que ce soit il faut se laisser de  
mal-faire. Remettons l'espee au four-  
reau. Il n'est pas question d'exercer  
des inimitiez immortelles. Nous a-  
uons excité assez d'orages. Il est  
temps de donner le calme & la sereni-  
té à ce grand Ocean, en y iettant l'hui-  
le de reconciliation parfaite. Cela de-  
pend des vos Majestez , Grands Mo-  
narques. Vous pouuez appaiser tous  
les troubles du monde , & ranger vos

peuples à l'obeïſſance des loix de nature, & des voſtres. Que demandez vous d'auantage ? La paix vous entretient en grandeur, en reſpect, & en ſeureté : au contraire la guerre diminue toutes ces choſes, & ſouuent les oſte tout à faiſt, avec l'honneur & la vie. Quant vous auriez ſubingué tout le monde, ce qui n'eſt iamais arriué à perſonne, & iamais n'arriuera, en fin vous ſeriez contraincts de vous reposer, attendu que la guerre ſe fait pour auoir la paix. Ce que vous feriez en la Monarchie de l'vniuers, faites-le en celle qui eſt entre vos mains. Vous voyez le peu de profit que vous faites par armes, & ſi vous gaignez quelque ville, dans peu de temps vous la perdez, ou bien vne autre qui valoit mieux : & ſouuent après auoir deſſaiſt vos ennemis, rauagé leurs terres, la neceſſité vous force d'entendre à vne paix, ou trefue, par faulte de viures, ou par vne maladie, qui depeuple vne armee, & faiſt perdre le fruiſt d'vne conquēſte laborieufe, laquelle couſte ordinairement plus cher, que ſi on l'euiſt acheptee à beaux

deniers cõtens. A ce propos il me sou-  
vient de celuy qui disoit au Roy de  
Portugal, lors qu'il deliberoit de passer  
en Afrique, que pour vne telle expe-  
dition, il falloit vn monde d'hommes,  
vn monde d'argët & de viures. C'estoit  
bien représenter en peu de mots les  
difficultez & hazards de la guerre.  
Octavian Auguste, le plus grand Mo-  
narque qui fut iamais, ne conseilloit  
point d'entreprendre vne guerre, s'il  
n'y auoit plus de profit en gagnant la  
viçtoire, que de dommage en la per-  
dant, & disoit que faire autrement  
c'estoit pescher avec vn hameçon d'or.  
C'est pourquoy les Scythes manderēt  
à Cyrus Roy de Perse, qu'ils s'eston-  
noient qu'un si riche Prince les atta-  
quoit de gayeté de cœur, sans auoir  
esté aucunement offensé, veu qu'il ha-  
zardoit en ce faisant son estat, pour  
auoir vn meschant pays, où il n'y auoit  
rien à gagner, passant qu'ils n'atten-  
droient point sa venue & qu'ils iroient  
volontiers au deuāt, puisqu'ils voyoient  
l'esperance d'un si beau butin : à quoy  
ils ne manquerent pas. Les Suisses fai-  
soient la meisme remonstrance au des-



nier Duc de Bourgongne. Si d'avanture vous nous surmontez, luy disoiẽt ces pauvres gens, vous n'en amendez pas beaucoup, attendu que les esperons de vos gensdarmes & les mors de bride de leurs cheuaux, valent plus que toute nostre cheuance. Cela doibt servir d'aduertissement à tous Princes, principalement aux plus puissans, de ne tenter point la fortune de la guerre, qui peut diminuer plustost leur Empire, que l'aggrandir. Qu'ils ne desirent donc point de nouvelles Seigneuries, de peur qu'ils ne perdent les presentes. Ils ont acquis vne felicité : Il ne reste que de la mesnager, à l'exemple d'Auguste, lequel ayant pacifié les troubles, se mit à faire de bonnes loix, & voyant qu'il estoit asseuré cõtre l'estranger, pourueut aux desordres qui pouuoient arriuer au dedans de son Empire. Car ce n'est pas assez d'empescher le mal de dehors : le domestique est plus à craindre. Apres donc que les Princes seront tous d'accord, chacun d'eux pouruoiera aux affaires de sa Monarchie, à ce que les deportemens de ses subiects n'enta-

ment poinct le corps de ceste vnion, que nous taschons moyenner. Ce faisant, non seulement il obligera le public, en trauaillant de sa part à l'entretien de la paix generale, mais aussi il assseurera son estat, preuenant par vne bonne police les inconueniens qu'apporte le desfreiglement des mœurs & licence effrenece. Je ferois du Philosophe, si ie mettois en auant les enseignemens notables sur ce subiect : mais il n'est besoin de retracer vn discours dont les liures sont remplis. Je toucheray seulement sept ou huit poincts, qui me semblent necessaires, pour contenir les peuples en leur debuoir, & leur oster toute occasion de tumulte : à sçauoir vn gouvernement moderé, punition des malefices, recompense des merites, nourriture des pauvres, reglement de procez, prouision publique de grains, recreation licite, & la Censure. Vn estat se porte bien, quand toutes ces choses s'y rencontrent : dont la premiere importe grandement, tant pour le salut du peuple, que pour celuy du Monarque. Car il ne peut estre assseuré en-

tre les subiects, s'il ne gagne leur affection par vn gouvernement réglé selon les loix de la raison naturelle, à laquelle tout hōme sans exception doit obeïssance. Et ceste submission ne derogé point à la souueraineté, au contraire elle affranchit vn homme des vices qui luy causent vne fascheuse seruitude. C'est regner, que de commander à ses cupiditez : Chacun peut gagner aisemēt vne telle monarchie, mais les Princes en doibuent estre d'autant plus soigneux, qu'ils ont vne puissance absolue. Theopompe Roy Lacedemonien n'auoit pas besoing d'establis des Ephores pour le contreroler. Il deuoit plustost se donner la loy, que de la receuoir de ceux qui pouuoient faillir autant que luy. L'autorité Royale ne depend d'aucun supérieur: Aussi elle demande vn naturel noble, vertueux, qui conforme son gouvernement à celuy du grand Souuerain, & ne preste point l'oreille à ces flatteurs, qui font à croire aux Princes que tout leur est permis, & les incitent à la tyrannie, comme si estre Empereur ou Roy n'estoit autre chose que piller,

massacrer, paillarder, & faire mal en toute assurance à la façon des voleurs. Le Monarque legitime ne se comporte pas ainsi, & considere que le plus grand honneur qui luy puisse arriver c'est s'abstenir de mal faire en ayant la puissance, & qu'il ne doit traiter ses subiects comme esclaves, ou pour le moins imiter les Parthes, qui cherissoient leurs seruiteurs comme leurs propres enfans. Ce qu'il fera en espargnant leur vie, leur honneur, & leur bien. On cognoist en l'usage de ces trois choses la difference entre le tyran & le Prince legitime. Cestuy-cy laisse iouir ses subiects paisiblement de leurs possessions : que s'il en tire du profit, c'est pour subuenir aux necessitez publiques, & non pas pour entretenir ses plaisirs. Il n'attente point sur leur vie, il ne fait point bresche à leur honneur en la personne de leurs femmes. Le Prince tyrannique se iouë de tout cela, & croit que sa felicité gist en la violence. En quoy il s'abuse. Car vn Empire violent ressemble aux torrens rapides qui ne font que passer, & celuy qui est moderé, à ces petites pluyes qui

arrousent doucement la terre, & durent longuement. Aussi vn bon Prince gaignant le cœur de ses subieçts n'a que faire de craindre de leur part. Le tyran est plein de deffiance, voyant qu'il est hay iustement des siens, qui cherchent occasion de s'en deffaire. Et c'est ce qui a ruiné en partie les Roys & Potentats des terres neufues, d'autant qu'ils tourmentoient leurs subieçts de couruees intolerables, & les gouvernoient comme bestes, occasion pourquoy ces pauvres malheureux ne firent pas beaucoup de resistance aux Hespagnols, qui leur donnoient esperance de meilleur traictement. Que le Prince se serue de ses subieçts avec le plus de moderation qu'il pourra, qu'il ne tourmente point leurs corps, dont-il a affaire, qu'il n'exige point des tributs insupportables, attendu qu'il ne peut auoir profit n'y honneur en la pauvreté de son peuple: qu'il chasse de sa cour les flatteurs & inuenteurs de subsides, qui corrompent la bonté naturelle des Monarques, & les mettent en mauuais mesnage avec leurs subieçts. C'est par ces gens-là qu'il faut commencer la



punition des malefices qui est le second expedient pour maintenir la paix. La douceur est bien requise en celuy qui commande, mais en icelle comme en toute autre chose il faut garder mediocrité: autrement elle est preiudiciable. Et afin de ne point abuser des paroles, ce n'est pas douceur que pardonner aux meschans: c'est cruauté, pource quel'impunité les rend audacieux, & fomente leur malice. Archidamidas voyant qu'on loüoit Charilaüs Roy de Sparte à cause de sa clemence, Comment seroit-il bon Prince, dit-il, veu qu'il n'est point ennemy des meschans? Il auoit raison. Car vn homme de bien naturellement abhorre le vice: Ce qui est notamment loüable en vn Monarque, comme en Alexandre Seuer, qui hayssoit tant les larrons, qu'il ne les pouuoit seulement regarder sans nausée. Et l'Empereur d'Orient Andronique, bien qu'il fut d'ailleurs reprehensible, auoit neantmoins ceste vertu de punir rigoureusement les crimes, & cōtenoit tout le monde en son deuoir, spécialement les gouuerneurs & officiers qui estoient contraincts de marcher droict, si bien que le peuple ne fut

iamais si content. Mais le faict de Iustin second est notable, lequel voyant les outrages que le peuple enduroit des grands, se resolut d'y remedier: à ceste fin crea vn grand Preuost, auquel il donna la Souueraine authorité de iustice. Cestuy-cy ne fut pas si tost entré en l'exercice de sa charge, qu'il fut aduerti de l'iniure qu'auoit faict vn Seigneur qualifié à vn pauvre homme. Il luy enuoya faire commandement de cōparoistre par deuant luy, & d'autant qu'il n'en tenoit compte, l'alla querir iusques dans le Palais: & encore qu'il fust à la table de l'Empereur, neantmoins à la veuë d'iceluy il emmena le criminel, & luy fit son procez, sans empeschement ou opposition quelconque. O si cela estoit pratiqué, qu'un Estat seroit heureux! qu'un Prince seroit aimé des siens, & honoré des estrangers! Ce n'est rien que d'auoir vn Royaume: si la iustice n'y est gardeë, si les principaux officiers ne sont rangez à leur deuoir, il perd son nō, & deuient vn brigandage. Ne sçauons nous pas que l'Empereur Romain a perdu presque toute sa Monarchie par la faute de ses Lieutenās, qui tyrānisoient ses subiects?

S'il les eust chastié, sur les iustes plain-  
tes qu'on faisoit d'eux, son Empire ne  
seroit reduict au petit pied comme il  
est a present. Qu'est-il besoin de nom-  
mer les autres, qui ont perdu les plus  
beaux fleurons de leur couronne par  
l'insolence de leurs officiers? Vn Prin-  
ce doit auoir l'œil sur les deportemēs  
de tous ses subiects, mais particuliere-  
ment il est responsable de ceux à qui il  
donne les grandes charges. Toutes  
leurs actions, bonnes ou mauuaises,  
luy sont imputees. Ceux-cy estans re-  
glez il est aisé de venir à bout du reste,  
& n'y a si meschant ny desesperé, qui  
ne trêble, quand il voit punir vn magi-  
strat, vn Capitaine, ou autres personnes  
de qualité. C'est le plus bel œuvre d'un  
Monarque de prendre en sa protection  
le menu peuple, & le garantir de l'op-  
pression des grands, qui abusent de  
leur force, & ne l'employent qu'à vio-  
lenter les plus foibles. Quant aux au-  
tres petits voleurs & meurtriers, il les  
faut aussi punir sans remission. Et d'au-  
tant qu'ils ont accoustumé apres auoir  
faict leur coup, de quitter le pays, il  
faudroit leur iouer vn pareil tour, que

fit Mahomet second au massacreur de  
Julian de Medicis, qui s'estoit retiré à  
Constantinople. Le grand Seigneur  
le renuoya lié & garotté à Florence.  
Par ce moyen les meschans seroient  
bien estōnez, voyans que tout le mon-  
de leur fermeroit la porte, & qu'ils  
n'auroient aucun asyle. Je sçay qu'il ne  
faut pas chasser les estrangers, & que  
c'est l'honneur d'un Monarque de re-  
cevoir amiablemēt ceux qui implorēt  
sa misericorde, & se mettent sous sa  
protection : mais cela se doibt entēdre  
des marchands, ou de ceux qui sont af-  
fligez, & poursuiuis à tort, non pas des  
traistres, seditieux & assassins, qui  
troublent le repos public, & tiennent  
le premier rang entre les meschans.  
Telles pestes sont indignes de com-  
passion. Et qui voudroit auoir de tels  
hostes ? Comment un Roy seroit-il  
assuré, s'il receuoit ceux qui auroient  
fait banqueroute à leur patrie ? I'en-  
tends les seditieux, en la punition des-  
quels tous les Monarques ont interest,  
tant s'en faut qu'ils leur doibuent don-  
ner aucun lieu de refuge. Autrement  
ils attirent un malheur sur leur estat, &

donnent occasion à leurs propres subiects de tramer hardimēt quelque nouveauté. Certainemēt il n'y a crime plus punissable que la sedition, ny qui aye besoin de plus de precautions, pour autant qu'elle est fort diuerse & a plusieurs visages. Tantost elle mōstre vne face riante, qui promet vne douce liberté, tantost elle se pare d'un habit Religieux, ou d'un masque de iustice. Auncefois elle n'a qu'une teste, & ailleurs (chose mōstrueuse) vous luy en voyez cent mille. Faut esclarcir les particularitez de ce mal, afin de luy appliquer plus aisement les remedes. Il est certain que toutes seditions se formēt ou par l'entreprise ambitieuse de quelque chef & conducteur remuant, ou par vne esmotion generale du peuple. Un particulier seditieux descouure son ambition directement, ou obliquement. Directement, lors que de viue force il veut empieter l'Estat, à quoy plusieurs occasions luy peuuent frayer chemin, notamment l'imbecillité de celuy qui cōmande. C'est ce qui a perdu Childeric le dernier des Merouingiens, qui fut confiné en un cloistre par



Pepin, du consentement des François, à cause de sa nonchalance. Pour vn mesme subiect Charles le simple a esté degradé, & sa posterité n'a pas esté plus heureuse. Le remede de ce mal depēd du Prince qui en est la cause. Qu'il se face aimer par sa bonté, respecter par sa vertu, il se garantira de toutes entreprises. Mais s'il se laisse emporter aux violentes passions de cupidité & de cholere, il court fortune, & encore plus s'il se rend contemptible par vne vie oisive & effeminee. Alors les estrangers luy feront la loy, ses subiects s'emanciperont de son obeissance, principalement ceux qui auront quelque credit & autorité, cōme il arriua aussi à nos Roys sur le declin de la race de Charlemagne, quand la France fut desmembree par l'ambitiō des gouuerneurs qui s'impatroniserent de leurs prouinces, abusans de la simplicité de leurs maistres. Et au mesme temps quelques Seigneurs d'Italie se cantonnerent, & s'approprierent les places où ils auoient cōmandement, cōme les Ducs de Beneuēt, de Friul & de Spolet: ce que les autres depuis ont fait à leur exemple,

au grand mespris & dommage des Empereurs. Il est vray que les affaires qu'ils auoient au pays de leur residence, avec la disgrâce des Papes, les empeschoient beaucoup de rembarer ces roitelets : car vn peuple reuelche & libertin est mal-aisé à tenir quand il ne voit point son Prince, & secouë le ioug à la premiere commodité qui se presente. Les Empereurs Grecs l'ont esprouué, qui ont esté contraincts d'abandonner l'Italie, & permettre à vn Goth Theodoric de s'en declarer Roy, ne pouuans la retenir pour eux. Les Roys de France & d'Allemagne apres la chasse des Lombards, n'y ont pas mieux faict leurs affaires, & ont cogneu que le sommet des Alpes estoit trop haut pour faire voler leur autorité par dessus : Que si par quelque vent de fortune elle a esté poussée iusques là, elle n'y a pas demeuré long temps. Pour confirmer ce propos de l'Historien, *Qu'il est plus malaise de garder vne prouince que de la subiuquer* : attendu que la conqueste ne gist qu'en la force. Mais la conseruation depend encore de la prudence des victorieux, d'vne

d'une felicité continuelle, & de la bonne affection des subiects, qui sont trois choses bien rares: principalement ceste derniere, en laquelle il n'y a pas beaucoup d'assurance, si la personne du Prince est esloignée de son peuple, cōme il aduient necessairement en vne grande Monarchie, dont les piéces ne sont pas iointes ensemble. Car il est mal-aylé d'aymer ou respecter vne chose qu'on ne voit point. Ce qui occasionna les Hespagnols d'offrir leur Royaume au Duc de Calabre, voyans que Charles cinquiesme leur legitime seigneur estoit disposé à cause de sa dignité Imperiale de resider en Allemagne. Et n'y a rien à mon aduis qui aye plus enhardy les Flamans & Hollandois de se mutiner contre Philippe second Roy d'Hespagne, que la crainte d'estre exposez à l'auarice & cruauté de ses Lieutenans. Ils consideroient que telles gens ont accoustumé de se licentier, quand ils se voyent esloignez de leur maistre, auquel ils font souuentes fois passer la plume par le bec. Occasion pourquoy le Roy d'Hespagne n'a point de Viceroy aux Indes qui y

demeure plus de trois ans , sçachant bien que l'homme affriandé à la domination , se laisse facilement emporter à l'entreprise d'une usurpation & defection manifeste. Dont il ne faut pas s'estonner , puis que l'ambition arme le fils contre le pere. Henry Roy d'Angleterre fut attaqué par ses enfans à la suscitation de sa femme Eleonor. Loys onzième donna bien des affaires à Charles septiesme. Loys premier fut encore plus mal traité par ses enfans, qui le depouillerent & mirent en un Monastere. Henry cinquiesme osta l'Empire à son pere : Andronique le ieune à son ayeul. Adolf emprisonna son pere Arnaul Duc de Gueldres : & comme le Duc de Bourgongne taschoit de les accorder moyennant six mille florins de pension & le tiltre de Duc qui demeureroit au bon homme durant sa vie, le reste estant en la libre disposition d'Adolf , j'aymeroie mieux, dit ce fils desnature, auoir ietté mon pere en un puits , & m'estre ietté apres , qu'auoir faict cest appointement. Il y a quarante trois ans qu'il est Duc : il est bien temps que ie le sois. Volontiers luy lair-

ray-ie trois mille florins par an , à condition qu'il n'entre iamais dans la Duché. L'ambition est auetugle, elle n'a aucun respect d'amitié ny de parenté. Le Preste-Ian preuoyant cela, tient enfermez dans vn chasteau tous les Princes de la race, de peur qu'ils n'attirent par leur autorité ses subiects, à quelque rebellion. Mais telle coustume est barbare, & encore plus celle des Ottomans, qui font mourir leurs freres afin de regner plus librement. Vn Monarque ailleurera bien son estat sans toutes ces cruantez. En qui se pourra-il fier, s'il s'estrange de ses enfans? Qui luy sera amy s'il se defaict de ses plus proches? Ne vaut-il pas mieux gagner leur affection, & leur donner vn appointment conuenable à leur qualité, suivant l'exemple des anciens Empereurs, qui faisoient part de la souueraine puissance à leurs prochains heritiers, & les admettoient pour compagnons en l'Empire, afin de leur oster tout mescontentement? Ce seroit chose estrange & monstrueuse de voir vn Prince



attaqué par son fils ou son frere, auxquels il feroit tant d'honneur & si bon traitement. Je sçay bien qu'on accuse Loys le debonnaire d'imprudence d'auoir trop aduancé ses enfans: mais son malheur ne vint pas de là. Le peu de capacité qu'il auoit aux affaires du monde, la cruauté dont il vfa à l'endroit de son nepueu Bernard Roy d'Italie, & autres Seigneurs qui l'auoient assisté, l'affection qu'il portoit à son fils dernier, au mespris de ceux du premier liét, avec l'arrogance de sa seconde femme qui dispoit à son plaisir de luy & du Royaume, furent les principaux motifs de la rebellion. En somme, à vn tel exemple i'en puis opposer dix totalement contraires, qui montrent que le bon sang ne peut mentir, & qu'il est moins dangereux à vn Roy d'entretenir vn Prince de sa race, que d'eleuer les estrangers. Car ceux-cy ayans moins d'obligation naturelle au Souuerain, luy portent aussi moindre affection, si bien que le desir de regner les pousse plus facilement à entreprendre contre l'estat, quand ils ont la force en main, & quelque beau pretexte.

C'est l'ordinaire des ambitieux de pallier leurs desseings d'une apparence de zele & charité, d'auoir le bien public & reformatiō de l'estat en la bouche, mais l'experience a tousiours monstré qu'ils n'auoient rien moins dans le cœur. Et comment seroit-il possible que les grands voulussent procurer le soulagement du peuple puis qu'ils le foulēt aux pieds, & ne font non plus scrupule de battre ou tourmēter vnnillageois & habitant de ville., que si c'estoit vn chien, ou quelque beste de voiture? Et pour rendre telle iniustice plus legere, tournent en derision ces noms de Bourgeois, contadin & manant, lesquels ils ont en tel mespris, qu'ils rebuent leur conuersation, se scandalisent de leur rencontre, & se desguisent en toutes façons, afin de ne point ressembler à ceux qu'ils appellent vilains. Ils voudroient n'auoir rien de commun avec eux. Ils sont faschez de respirer vn mesme air, d'auoir vne mesme figure. Ils formeroient volontiers complainte de ce que Dieu a donné esgalement à tous vn mesme Ciel pour aspect, vne mesme terre pour fondemēt.

Vn peuple seroit bien sot, de seconder l'ambition de telles gens. Aussi les villes ne les veulent point receuoir, les pay sans fuyent deuant eux, il n'y a que les mal-contens qui les suivent. Ceux qui ont acquis reputation de pieté ont beaucoup plus de credit enuers le peuple pour l'induire a quelque nouveauté. Tesmoing l'Hermite Schacoculis, qui apres auoir bien ioué son personnage l'espace de 7. ans en vn desert, ou il estoit visité comme vn saint homme, mesmement par l'Empereur Baiazeth, qui luy enuoyoit des presens, finalement leua le masque, & se declarant auteur d'une nouvelle secte, amassa tant de partisans, qu'al'ayde d'iceux ils s'empara de plusieurs villes, défit vn Bascha & le fils de Baiazeth, & eust passé bien plus outre s'il n'eust irrité le Sophi. Quelque temps apres vn certain Calender par vne deuotion simulée esbianla toute la Natolie, & tint les Turcs en ceruelle, iusques à ce qu'il fut atterré en bataille rangée. N'est-ce pas le chemin que prit Elmahel Affricain, pour faire la guerre à son maître le Roy de Marroc, & luy rauer le sceptre & la vie? Le respect de religion

a vne extreme puisſance ſur nos eſprits: Depuis qu'un homme a le bruit de viure ſainctement, il perſuade tout ce qu'il veut au peuple, ſur tout quãd il eſt doué d'une eloquence & grace de bien dire. Arrius & Mahomet ſe ſont ſeruis de tels inſtrumẽs, pour fonder leur doctrine. Et de plus fraiſche memoire, Luther & Calvin, quel meſnage ont-ils faiet par leurs langues & eſcrits, ſous couleur de reformer les abus de la Chreſtiẽté? Il faut preuenir telles gẽs, & leur deffẽdre de dogmatifer ny en public ny en particulier, ſur peine de punition rigoureuſe. Car ils attirent le peuple qui ſe laiſſe ayſement emporter à l'apparẽce d'une pieté, auſſi bien qu'à l'eſpoir d'une liberté ou cõdition meilleure. Ce ſont deux eſperõs que les faetieux dõnẽt à cẽt animal de pluſieurs teſtes, pour le mettre en campagne, luy repreſentãt la douceur de l'egalité Democratique, & les violẽces de la Monarchie. En quoy ils n'ont pas grande difficulté, attendu que les peuples ne portent pas volõtiers le ioug des Princes, principalement des exacteurs ou tirãs. Et de vray les Princes ſe rendent aucunes fois odieux & inſupportables.

Mais souuent la faute viêt des subiects, qui les irritent par vne superbe mutinerie, & veulent reigler vn pouuoir qui ne reçoit point de limites. Les Souuerains ne doiuent point estre contrerollez en leurs actions. S'ils font mal, c'est à celuy qui les a establis de les chastier, non pas au peuple qui leur doit toute obeïssance. Puis qu'ils ne releuent que de Dieu, & qu'ils sont ses Lieutenans, c'est remerité aux hōmes de leur faire rendre compte : c'est vn sacrilege de murmurer contre eux, d'attenter à leur citat ou à leurs personnes. Les plus sages sont de cest aduis, & la doctrine chrestienne spécialement nous exhorte de reuerer nos Roys & superieurs, sans aucune distinction pour ce regard des bons & des mauuais. De cecy nous en auons vn notable exemple en Dauid qui ne voulut iamais toucher son ennemy Saül Prince furieux & tyrannique, qui l'auoit persecuté cruellement, & en hayne de luy, auoit tué Achimelech, & tous les sacrificateurs de Nobe avec leurs femmes & enfans: Nonobstant Dauid l'ayant eu par deux fois entre ses mains, a estimé qu'il n'e-



estoit permis de l'offencer, & a empesché ceux qui le vouloient faire, disant qu'il n'outrageroit iamais celuy que Dieu auoit sacré. Et peut-on trouuer vn Roy qui aye tant tyrannisé ses subiects que Nabuchodonosor ? Apres auoir forcé Hierusalem, pillé les maisons d'icelle, rasé les murailles, il massacra vne grande partie du peuple, & emmena le surplus captif en Babylone, où il fit faire sa statuë, auëc commandement à tous de l'adorer, sur peine d'estre bruslez tous vifs : ce neantmoins les Prophetes de ce temps là crioient apres le Roy de Hierusalem Sedechie, pource qu'il s'estoit reuolté contre son Souuerain, & exhortoient les Iuifs transportez en Babylone de prier Dieu pour la prosperité dudit Nabuchodonosor & de ses enfans. Si ces raisons ne nous esmeuent, l'euenement qui est le maistre des imprudës, a tousiours monstré que les reuoltes estoient inutiles, & que les rebelles au lieu d'amender leur marché tomboient le plus souuent de fieure en chaud mal. Qu'ont gaigné les Florentins en la mort d'Alexandre de Medicis ? Quel profit ont

fait les Gaulois<sup>au Roy</sup> de se reuolter contre Charles cinquieme ? On alleguera peut-estre les Suisses qui se sont emancipez heureusement, & aussi les Hollandois. Quant à ceux-cy, l'assiete de leur pays propre pour la defensiue, l'alliance de leurs voisins, & sur tout l'esloignement du Roy d'Hespagne, sont les piliers de leur republique, laquelle neantmoins seroit en grand branle, si ce Prince vouloit tourner toutes ses forces contr'eux. Pour le regard des Suisses, leur vnion, & suffisance au fait des armes, & le peu de richesses qu'ils ont, ne donnent pas grande enuie de les assuiettir & remettre au train de la Monarchie, de laquelle ils ont esté si mal traictez, que l'on ne peut iustemēt imputer ce qu'ils ont fait à vne rebellion, mais plustost à l'insolence des gouuerneurs qui se licentioient d'attenter non seulement à leurs biens, mais à leurs personnes & à leurs femmes. La plus part des peuples ne se contient pas és limites d'une si iuste defense, ils se mutinent pour vn impost, pour l'aduancement d'un fauorit, vn mauuais gouuernement, comme si ces maux estoient attachez à la Monarchie,

& ne se trouuoient pas avec plus d'excez en l'estat democratique, où les brigues, corruptions, partialitez, & impunitiez de crimes sont ordinaires, ou les plus beaux harangueurs font ce qu'ils veulent, les vertueux sont suspects, les magistrats peu respectez, les factieux aduancez, la iustice vendue au plus offrant, & negligemment administree. Tout cecy se remarque és republiques d'Athenes & de Rome, les plus florissantes qui furent oncques. Les citoyens estoient tousiours aux prises, les riches contre les pauvres, les nobles contre les roturiers: & aux assembles de ville s'entrebattoient à coups de pierre. En suite massacre, pilleries, & confusion, si que la plus grande tyrannie n'eust pas fait la moitié de ces maux, auxquels ils n'ont point esprouvé de meilleurs remedes, que la domination d'un seul homme. Pareillemēt les Florentins depuis qu'ils se sont gouvernez eux mesmes n'ont veu que des changemens & desordres en leur ville, les maisons bruslees, les rues paves de corps morts & autres tragedies, qui ont continué iusques à ce qu'ils ont esté ramenez à la Monarchie. Ceux de Genes n'ont esté gueres plus

heureux en leur liberté, & seroient encore acharnez les vns cōtre les autres, s'ils ne craignoient leur protecteur. Et on sçait bien ce que vaut la protection d'une ville à un Prince voisin & puissant. Si les Republiques pour se garantir de ruine, ont recours à l'autorité d'un Souuerain, les peuples qui y sont accoustumez ne s'en doüēt departir, pour aucun pretexte ou occasion que ce soit. La tyrannie est fascheuse, ie le confesse, mais la fureur & confusion populaire est encore plus à craindre, d'autant qu'ell' a une cause permanente, à sçauoir l'humeur du peuple, variable, ignorant, cruel, amateur de nouveauté, qualitez qui luy sont & seront tousiours naturelles. Au contraire, la tyrannie se passe, & souuent un meschant Prince se corrige soy-mesme sans contraincte, comme Auguste & Tite. ou bien il s'atédie des occupatiōs publiques, comme Sylla, & Diocletian, qui renoncerent de leur bon gré à l'Empire. Il faut donc endurer de telles gens, comme on souffre la sterilité d'une annee, en attendant un meilleur temps. Car la vicissitude estant perpe-

tuelle aux affaires du monde, le mal succede au bien, le bonheur à l'aduersité, & apres l'orage d'un iniuste gouvernement, on voit eluire le serain d'un regne doux & paisible. Si le peuple entroit en ceste consideration, ou s'il en estoit capable, il ne se porteroit pas si aysément aux seditions. Mais il faut aduoüer que les hommes augmentent bien leurs miseres par impatience & delicateffe. Ils ne sentent pas si tost le moindre mal, qu'ils veulent y appliquer vn violent remede. Ils abboient apres la tyrannie, laquelle neantmoins ils exercent en leurs maisons impunément. Ne voyons nous pas les iniustices que font les maistres à leurs valets, les peres à leurs enfans, les precepteurs à leurs disciples? C'est vn vice cōmun d'abuser de sa puissance, & se monstrier insolent à l'endroit de ses inferieurs. Je ne dis cecy pour excuser les mauuais Princes, qu'on ne peut trop vituperer, mais pour monstrier qu'il vaut mieux auoir vne teste catarreuse que de n'en auoir point du tout, & que la tyrannie ne dispense pas les subiects de l'obeissance qu'ils doiuent à leurs Souuerains.



encore moins la dissipation des finances, & l'iniuste distribution des loyers. Il faut en tel cas proceder par humbles remonstrances, & représenter au Prince la consequence de ces abus, non pas en demander reformation les armes au poing, comme on a accoustumé de faire, au grād preiudice du peuple, qui est plus ruiné par les soldats en six mois qu'il ne seroit par vn mauuais gouuernement de dix anneés. La guerre n'est pas vn remede aux maladies d'estat, notamment celle qui s'entrepren̄d cōtre son Souuerain. Il n'en doit point dōner d'occasiōs, mais pour s'en garātir, il luy sera expedient d'auoir tousiours vn bras armé, afin de tenir en crainte les rebelles qui deuiennent audacieux, quand ils voyēt vn Prince acompagné trop simplēmēt, & ne se desfiāt de personne. Iules Cesar ne fut pas bien aduise, de cōgedier sa garde: Iustinian se trouua mieux d'auoir les soldats aupres de luy en la sedition de Bizāce, en laquelle les mutins auoiēt esleu vn nouveau Empereur, qui fut tué avec 40. mille habitans. Nous pouuōs inger à quelle extremité il fut reduit, puis

qu'en sa ville capitale il fut cōtraint de faire vn tel carnage, & s'il n'eust eu des forces pour rembarrer les factieux, il estoit perdu, cōme aussi Cosme de Medicis, estoit en dāger de perdre sō estat, s'il ne se fut courāgeusement opposé aux mutineries des Florentins. Le pōpulas est fier & insolent à l'endroit de ceux qui ne peuuent resister : il faut luy monstrier les dents, si on veut en auoir raison. Et ce mesme moyen seruira contre les particuliers qui voudront remuēr l'estat. Ils ne l'entreprendront pas si hardiment, quand ils verrōt leur Souuerain tout prest de remedier aux rebelliōs, & d'ē chastier les auteurs. Qu'il monstre seulement la verge, ou le baston, les plus grands serōt souples à ses cōmandemens, & n'oserōt l'offenser. Et pour mieux encore pourueoir à sa seureté, qu'il ne dōne iamais puissance absoluë à vn autre, de peur qu'il ne luy arriue comme à nos premiers Roys qui furēt en fin debusquez par les Maires du Palais, ausquels ils laissoient tout faire, afin de mener à leur ayse vne vie casaniere. Faute si gnalee en vn monarque, qui doit mouir debout, c'est à dire en actiō, non pas

en oisiveté, disoit l'Empereur Vespasien. Et iacoit qu'il aye besoing d'officiers & Lieutenans, neantmoins comme le Soleil communique ses rayons aux moindres estoilles sans diminution de sa lumiere, aussi il ne doit iamais departir son autorité, qu'il ne retienne par deuers luy le grand ressort des affaires. Que si d'auenture il voit vn sien vassal auoir desia acquis du credit pour ses richesses, ou pour la noblesse de son extraction, il luy doit deferer plus d'honneur que de puissance. Quand il le fera grand maistre, chef de son conseil, gouuerneur de sa ville capitale, ce sont offices de peu d'effect, mais honorables & dignes des premiers Princes d'vn Royaume. La Connestablie, Admirauté, & les grands gouuernemens sont mieux en la main des autres Seigneurs de moindre qualité: car c'est vne sagesse politique de donner aux vns plus d'honneur, aux autres plus de puissance, afin que tous soient contents, & le Souuerain plus asseuré, qui ne doit tant craindre les desseings d'vn simple gentil-homme, que d'vn autre plus puissant & renommé. C'est  
pourquoy

pourquoy Auguste ne donnoit point le gouuernement d'Egypte aux Senateurs, craignant qu'ils ne s'emparassent de ceste riche Prouince, & si importante à l'Empire. Aussi la charge de grand Preuost, qui pouuoit autant luy seul, que le Connestable, grand maître, Chancelier, & Capitaine des gardes tous ensemble, n'estoit donnee sinon qu'aux Cheualiers Romains, & mesme estoit distribuee esgalement à deux personnes, afin que l'vn fut contrequarré par l'autre, & retenu en son deuoir par vne crainte mutuelle. On ne peut employer trop de precautions à l'encontre des seditieux, lesquels il faut non seulement preuenir, mais aussi punir sans aucune misericorde. Or il y a d'autres personnes, qui n'attaquēt pas si apertement le public, & neantmoins sont tres-dangereuses, comme les faitneans, querelleux, prodigues, & ioüeurs, lesquels ne sont pas reputez criminels, encore qu'ils ne valent gueres mieux. Nous auons parlé des faitneans. Les querelleux ont vne grande disposition à mal faire: ils ne demandent que la guerre, & lors qu'ils n'ont

point d'ennemis publics, ils en font de particuliers. Ce vice est ordinaire aux peuples de Septentrion, qui sont fiers, insolens, & ne peuvent viure sans battre ou quereller quelqu'un : à quoy il faut remedier. Car ou ils attaqueroient, comme il arrive le plus souvent, un homme imbecille, & alors ils luy feront premiere-ment mille indignitez, puis apres en auoir eu le passetemps, ils viendront à vne aperte iniustice : & par ce moyen le respect du Prince & des loix sera diminué, dont s'ensuura vne confusion ineuitable. Ou bien ils s'adresseront à un homme de courage, & lors ils viendront aux mains, & s'ils ont du credit ils embarasseroient en leur querelle leurs pères & amis : ce qui est de perilleuse conséquence. Il n'y a qu'un remede singulier à cela. C'est de contraindre les querelleux à vne satisfaction competente à l'endroit de ceux qu'ils auroient offensé. Je dis satisfaction competente, c'est à dire proportionnée à l'iniure receüe. Car un qui aura donné des bastonnades doit vne satisfaction plus ample, que ce luy qui aura donné un soufflet, ou un delmenty. Et d'ailleurs, un affront fait



à vn Seigneur ou Magistrat, est plus punissable, que s'il estoit fait à vn fauetier ou portefaix. La distinction des personnes diuersifie vn mesme fait, & le rend plus atroce ou plus leger. Et ceste consideration est remise à la prudēce des iuges. Mais pour ne point dissimuler, ils font trop bon marché de l'honneur d'autrui, & ne punissent pas assez rigoureusement les insolences. Vn effronté impudent qui aura outragé quelqu'un, en sera quitte pour vn emprisonnement de deux ou troisiours, & s'il a des amis, il n'y sera pas trois heures. On luy fera seulement faire quelque petite satisfaction verbale, avec condānation de despens: cepēdant les coups de bastō sont ruez, & la honte demeure au battu. Qui fait que plusieurs ne pouuans auoir autre raison, sōt cōtraincts d'appeller les ennemis pour sauuer leur honneur. De là viennent tant de duels si ordinaires au iourd'huy, principalement en France, & que nos Roys taschèt d'empescher: mais ils n'y parviendront iamais, s'ils n'ordonnent vne plus grande satisfaction à celuy qui aura esté offensé.

en sa personne ou en son honneur. C'est bien fait de chastier ces escrimeurs à outrance, de les traicter ignominieusement apres leur mort, confisquer leurs biens, & les appliquer aux causes pieuses. Mais il faut oster la source du mal, qui est l'insolence de ceux qui attaquent. Car que peut faire vn homme d'honneur ayât receu l'affront, principalement s'il fait profession des armes? Se plaindra-il à la iustice? On se moquera de luy, pour le peu de reparation qu'il en aura. Demandera-il permission d'un duel? On attribuera cela à couardise, & encore plus s'il se contente d'une satisfaction faite deuant cinq ou six personnes. Estant donc reduict en ces destresses, il faut qu'il se cache à iamais n'osant paroistre en compagnie, où qu'il se vange par meurtre à quelque pris que ce soit. Que s'il esperoit auoir satisfaction suffisante pour reparer son honneur, il n'entreroit pas si librement en ces voyes de fait. Ceste satisfaction se feroit en paroles, si l'affront auoit esté de mesme, ou en effect si l'iniure estoit faite réellement sur la personne. Et

encore que la loy de peine esgalle dictée par les Latins Talion semble estre propre pour ce subiect: neantmoins ie conseillerois de passer plus outre, pour les difficultez qu'il y a le plus souvent en l'exécution d'icelle, & de punir doublement celuy qui auroit offensé: à sçauoir que pour vn soufflet, ou vn coup de baston qu'il auroit donné, on luy en donnast deux publiquemēt, en presence de sa partie aduerse. Et pour le regard des parolles où mocqueries picquantes, qu'on luy en fit faire l'amende honorable, telle que le cas meriteroit, & la qualité des personnes offensées. Je dis mocqueries picquantes, pource qu'il s'en trouue de plusieurs sortes, & comme il ne se faut pas courroucer, pour peu de chose, aussi il y a des façons de faire insupportables, & bien souvent vn geste, vne mine faite par mespris irrite plus vn cœur genereux, que non pas vne action violente. Ne voyons-nous pas la plus part des querelles prendre leur origine des paroles temeraires de ceux qui ne peuvent dire vn mot sans offenser quelqu'un? On ne sçauroit trop refrener

telle insolence. Et quât à ceux qui vsent de main mise, si le suis d'aduis qu'on leur rende le double, cela n'est point hors de raison. Les loix Romaines font payer au larron le quadruple. Pourquoy ne punira-on pas d'une pareille rigueur celuy qui vole l'honneur plus cher sans cōparaison que la cheuance & la vie? A quel propos endurer qu'un fai-neant (ordinairement les querelles viennent de ces gens là) se fourre en vne compagnie, & ne sçachant que faire attaque cestuy-cy & cestuy là? Que s'il ose luy repartir, aussi tost on voit ruer des coups, & le plus fort foule aux pieds le plus foible, aussi hardiment au milieu d'une ville, comme si c'estoit au coing d'un bois. Peut on esperer vne paix en souffrant telles canailles qui sappent les fondemens de la tranquillité publique? Il les faut traicter de mesme façon qu'ils traittent les autres: & puis qu'ils attaquent si effrontement l'honneur, ils meritent vne peine qui leur apporte de l'ignominie, & si on les mettoit au carquan vn iour durant, ils seroient bien employez: on ne verroit pas tant

de dementis donnez à la volée. chacun se modereroit en ses discours & actions. Ce seroit trop grande seuerité, dira quelqu'un, d'eplucher de si près les parolles ou les gestes. Je responds que ceste seuerité est necessaire, & que tous deportemens qui tendent à sedition sont punissables. La société humaine n'a que faire de querelleux, temeraires, & coupepiarers. Les Princes s'en passeront bien aussi, & les doiuent exterminer. Autrement ils verront tousiours des assassins & duels qui depeupleront leur Monarchie. Mais en observant ce que dessus, il n'y aura pas presse à offenser ny iniurier vn autre, & ainsi la cause de ces malheurs sera ostee. Car il n'y a homme si vindicatif qui ne se contentast de voir bastonner publiquement son ennemy, ou endurer vne reprimende plus honteuse, que l'iniure qu'il auroit receüe. Et alors on auroit raison de punir à toute rigueur les duels, de rendre infames ces maistres cabalistes du poinct d'honneur, qui seroient si delicats de refuser vne



ample satisfaction, qui leur rendroit leur honneur, & les feroit iouyr de la honte & ignominie de leur aduersaire. Si on dit que l'offensé ne peut pas toujours verifier vne iniure, & partant qu'il est contrainct d'appeller son hōme en duel, n'en pouuant tirer raison iuridiquement, par faute de preuues. Ce cas à la verité est considerable, & auquel les anciēns François, Lombards, & autres peuples de Germanie permettoient le combat : & c'estoit chose honorable de le demander. Mais au iourd'huy on ne garde point ces formalitez. On s'enuoye incontinent le cartel de deffi, au grād mespris du Prince, qui est maistre de la vie de ses subiects, & par consequent ne doit pas endurer qu'ils la prodiguent sans son cōgé. Aussi il ne doit pas desnier le combat, quand l'offensé n'a point de suffisans tesmoignages du tort qu'il dit auoir receu, & qu'il y en a toutesfois quelques coniectures : le tout pour cuitter les assassinats & factions qui pourroient suruenir, par faute de donner vne telle permission. Car bien souuent deux hommes sont si acharnez

l'un sur l'autre, qu'il est impossible de les accorder, & qui pis est, s'ils sont riches & puissans, ils causent des partialitez en vne ville, ou Royaume, de maniere qu'il est expediēt de les faire entrebattre, afin que leur sang estaigne le feu de diuision ciuile qui pourroit s'allumer: mais pour n'en point venir à ces extremitez, il n'est que de diuertir les querelles par vn chastiment ignominieux, ainsi que nous auons dit. Quelquesvns peut estre aymerōt mieux presenter le deffi, que de demāder en iugement reparatiō d'un desmētir, ou d'un autre affront: mais quād ils verront leurs ennemys si mal menez pour vne parole iniurieuse, & que d'ailleurs ils consideront l'infamie dont on punira ceux qui presenteront le duel sans permissiō du Prince, ie croy qu'ils seront plus retenus, & qu'ils accepteront vne satisfaction non moins honorable qu'asseuree. A quoy ils doiuent estre conuiez par l'apprehension d'un supplice infame, afin que ceux qui cherchent l'honneur aux duels n'y gagnent rien sinon vne infamie pour eux & leur posterité. Car c'est vne coustume bestiale

& qui n'a iamais esté vſitee parmy les plus fameuſes nations ſinon en ſaiēt de guerre, lors qu'un homme ſ'offroit de combattre pour l'honneur de ſon pays, ou lors que deux peuples ennemis pour eſpargner le ſang remettoient la deciſion de leurs querelles à l'euenemēt d'un combat particulier entre 2. ou 3. hōmes, qu'ils choiſiſſoiēt d'une part & d'autre, à condition que leur viſtoire tourneroit au profit de leurs compatriotes, qui donneroiēt la loy au parti vaincu. Ainſi le differēt des Romains & Albanois fut terminé par le cōbat des trois Curiaces & trois Horaces: & d'autant que ceux-cy qui combattoient pour les Romains remporterent la viſtoire, les Albanois auſſi-toſt quitterēt les armes & ſe ſouſmirent à leurs ennemis ſuiuant ce qui auoit eſté accordé. Mais ie ne trouue en toutes les hiſtoires aucune inimitié plus honorablement terminee que celle de Varenus & Pulſio. Ces deux ſoldats de Ceſar auoient touſiours de grandes conteſtations, & ne ſe pouuoient reconcilier, iuſques à ce qu'eſtans vn iour proches de l'ennemy,

Pulſio ſ'aduiſa de dire à ſon aduerſaire. *Que tardons nous Varenus, de montrer noſtre vaillance en vne ſi belle occaſion? C'eſt à ceſte heure que l'on verra lequel de nous deux ſera le plus habille homme. Et apres auoir dit ces parolles il ſe ietta à corps perdu au trauiers des eſquadrons ennemis, & en tua pluſieurs : mais en fin il fut inueſti d'vne grande multitude qui le terraſſa. Varenus apperceuant cela & craignant d'eſtre reputé laſche, accourut incontinent au ſecours de Pulſio. Ce que les ennemis voyans quittent ceſtui-cy, & ſe ruent ſur Varenus. Pulſio qui auoit eſté deſgagé par ſon ancien aduerſaire, ne le laiſſa point en telle neceſſité, & pour luy rendre la pareille, le deffend contre les ennemis, & le deliure d'vn peril ineuitable. Ainſi ils ſe reconcilierent avec honneur & applaudiſſement de toute l'armee. Si à l'exemple de ces ſoldats, ceux qui ont quelque choſe à demeller enſemble eſprouuoient leur valeur contre vn ennemy commun, ils ſeroient plus loüables. Mais en ce temps les regles de vertu*

& generosité sont perverties : & nous mettons le point d'honneur en ie ne sçay quelles petites braueries , que les anciens ont mesprisé , & mesmes les Turcs se moquent des duels, & les attribuent à vne foiblesse d'esprit ou impertinence. En contreschange nous les osons bien appeller barbares : comme si l'on pouuoit imaginer vne barbarie plus grande , que de se battre avec ses compatriotes amys, parens, & garder contre eux des inimitiez irreconciliables. La paix vniuerselle pourra remedier à ce mal , si nous y pouuons paruenir , & les actes d'hostilité publique estans defendus , il y a apparence, que les haynes particulieres cesseront, ou seront addoucies. Quant on aura gaigné ce point, il faudra regler la despence d'un chacun, afin qu'il ne prodigue son bien. Ce qui n'est pas de petite importance pour la conseruation d'un estat , pource que les prodigues estans deuenus necessiteux , comme ils ne peuuent faillir, chercheront des occasions de se réplumer aux despens d'autrui , afin d'entretenir leurs superfluités accoustumées. S'il y a quelque re-



muement, ces gens là s'y portent tous-  
iours des premiers: & Catilina n'auoit  
quasi point d'autres partisans que ceux  
qui auoient mangé leur bien aux ca-  
barets, bordeaux, & breslans. Les caba-  
rets ne sont que pour les passans. Les  
bordeaux sont tolerez en quelque país  
pour euter vn plus grand mal: & neât-  
moins il n'en seroit pas besoing, si la  
police des Romains auoit lieu, qui cõ-  
uioient leurs citoyens à se marier, en  
leur proposant plusieurs beaux priui-  
leges. Non que ie vueille condamner  
le celibat des Prestres & religieux, mais  
il seroit expedient que le reste du peu-  
ple fut contrainct de prendre femme à  
l'exemple des Chinois, qui donnent  
vne vacation à leurs enfans, & les ma-  
rient de bonne heure, de peur qu'ils ne  
se desbauchent: ioinct que le principal  
pilot d'vn Empire sont les mariages.  
Tant y a que le plus qu'on peut empes-  
cher les paillardises c'est le meilleur.  
Car ce sont preludes d'adulteres, &  
suffit d'endurer les vices qui se font en  
cachette, sans permettre encore d'en  
tenir boutique. C'est pourquoy ces  
lieux infames doivent estre defendus,

où la ieunesse perd le corps , & les biens: en quoy ils sont plus pernicieux que les bressans , qui ne consomment sinon que l'argent. Et toutesfois les anciens preuoyans le malheur qui en pouuoit arriuer , ne permettoient iouer de bon , ny mesmes faire aucune gageure sinon aux ieux honnestes , comme en celuy de la luitte, du palet, de la course, & autres semblables qui se font avec l'exercice du corps. Ils reprouuoient totalement les ieux de hazard , qui sont aujourd'huy si ordinaires en l'Europe, que les grands & petits, les hommes & femmes n'ont poinct de plus beau passe temps qu'à iouer en vn coup de dé la meilleure partie de leur vaillant , & aucunesfois la totalité. Quelques vns se ruinent à faire des festins , dont la superfluité est indifferemment permise à toute personne , encore que les Romains y ayent apporté plusieurs reglemens, en limitant la despence qu'on debuoit faire en vn banquet, & le nombre de ceux qui pouuoient y assister. Il est vray que ceste polic

estoit mal gardee, comme de faiet il semble impossible de l'observer, pour ce qu'on n'irap pas au logis d'un homme pour veoir ce qu'il mange, ou pour compter ses compagnons de table. Neantmoins d'autant que les affaires domestiques principalement les banquets & jeux ne sont pas si occultes, que finalement ils ne viennent en évidence, ce seroit le debvoir d'un magistrat d'informer contre ces mauuais mesnagers. Car qui ne iugeroit digne de punition la friandise d'un hōme, qui achepteroit un mulet de mer quatre cents francs, comme fit Asinius Celer? Qui n'auroit honte de veoir le fils d'un basteleur *Æsope* aualer en vne seule verree pour cinquante mil francs de perles, apres les auoir premiere-ment fait fondre dans le vinaigre? Qui ne detesteroit la gourmandise de ce vilain *Apicius*, qui mangea près de deux millions d'escus, & voyant qu'il ne luy restoit plus que cinq cens mille francs, s'empoisonna craignant de mourir de faim? La terre deuroit engloutir ces monstres qui abusent ainsi de ses richesses. Or ce seroit peu de chose

s'ils ne se perdoient qu'eux mesmes, mais nous voyons que leur ruine s'estend sur leurs creanciers, auxquels ils font ordinairement cession. Car ils empruntent de tous costez, & trouuēt facilement credit pour l'opinion qu'ils donnēt de leur opulence & liberalité: puis la pauureté fille de luxe entre en leur maison & les cōtrainēt tout à coup de faire banqueroute. Telles gens deuroient estre adiugez comme esclaves à leurs creanciers, a faute de payement suiuant la coustume ancienne qui est encore pratiquée en Ethiopie & aux Indes. On ne verroit point tant d'affronteurs, cessionnaires, & coquins. Chacun regleroit mieux sa despense, non seulement celle de bouche, mais aussi celle des habits, dont la superfluité appauurit pareillement beaucoup de familles. Pour y remedier on a fait des Edicts en France, mais sans aucun effect, d'autāt que les officiers de iustice n'oseroient les executer à l'encontre des grands, qui les premiers y contreuinnent, au mespris du Souuerain qui ne deuroit publier aucunes ordonnances, ou les faire mieux obseruer,

& commencer la reformation des abus par les domestiques. Car il n'y a meilleur moyen de ranger le peuple que celui-là, puisque naturellement il se porte à contrefaire les actions de la Cour. Que les Seigneurs quittent le satin & velours: le bourgeois quittera aussi-tost ces estoffes, sans attendre aucun aduertissement: mais tant qu'il verra reluire le clinquant d'or & d'argent sur les habits des nobles, il engagera plustost tout son bien, qu'il n'en porte. Je sçay que plusieurs peuples ne sont pas en ce danger: aussi ce n'est pas à eux à qui ie m'adresse. C'est principalement aux peuples de par deçà, François, Hespagnols, Anglois, qui font vertu du luxe, & estiment vn homme-mechanique s'il ne porte luy & sa femme autant en or & pierreries, comme il suffiroit pour acheter vne prouince. Si la censure de laquelle nous parlerons cy apres, estoit restablie, on auroit vn beau subiect de s'informer de la vie de ces piaffeurs, pour sçauoir d'où leur sont venuës ces delices, & quel moyen ils ont de les entretenir: mais l'exemple du Souuerain est



le plus court chemin pour remedier à tels abus, qui sont plus pernicioeux qu'on ne pense, attendu qu'ils attirent vne coruptiō de mœurs, ou pour le moins ils en sont les indices. Car vous ne voyez gueres d'hommes qui à la mode des soldats de Cesar puissent bien cōbattre estant parfumez, ou qui cōme Aristippus, soiet incorruptibles parmy les bombances des Bachanates. Ces ornemens du corps si affectez descouurent vn naturel effeminé, & peu soigneux des actions vertueuses. Aussi voyons nous que les peuples addōnez au luxe sont plus enclins à toutes meschancez, & partant il le faut empescher ou punir cōme vn vice contagieux, & qui en amene d'autres. Je ne parleray point de plusieurs crimes abominables, cōme de magie, adultere, blaspheme, & atheisme, pource qu'ils sōt plus cachez & plus rares: au demeurant ils les faut chastier selon les coustumes du pais. Je ne me suis attesté qu'aux vices plus ordinaires & scandaleux, dōt la punition est sur tout necessaire pour la manutētion d'un estat. Maintenant il faut aduiser à la recōpense des merites, qui n'est pas moins considerable. La peine & le

loyer sont les deux moyens de garder vne Republique , & les principaux effets de la iustice distributive. La severité des supplices empesche le desbordemēt des meschâcetez. La recōpense conuie les hōmes à bien faire. Elle est deuē à ceux qui ont faiēt quelque bon office au Prince ou au public. Il est bien raisonnable qu'ils soient recogneus, & ce seroit ingratitude de faire autremēt. Mais aussi il ne faut pas oublier les hōmes de vertu, & d'industrie, puis qu'ils ont des qualitez qui les releuent par dessus le vulgaire & les rendēt capables de mettre à execution des choses grādes. Or il y a deux sortes de recōpense, à sçauoir profit, & hōneur, encore que bien souuent elles se rencontrēt ensemble, cōme les estats, offices, & commissions, qui apportent de l'honneur avec vtilité. Vn Monarque doibt distribuer liberalement l'vn & l'autre aux personnes de merite, ce qu'il ne fait pas souuent, pour la difficulté qu'on a de l'aborder, si bien qu'il ne cognoist que ses domestiques, ou ceux qui luy sont reommādez par ses fauorits, qui sont des amys aux despens du Prince,

& le bloquent de telle façon qu'on ne peut auoir accez à luy, que par leur entremise. Titus disoit qu'il ne falloit pas qu'un homme sortit mal content de la compagnie d'un Prince. Auourd huy on est bien en autres termes : car auparavant qu'on parle à luy, on a subiect de s'attrister. Certainement un Roy feroit tort à sa Maesté, s'il se familiarisoit indifferemmēt à toutes personnes : mais il ne se doit rendre inaccessible à ceux qui luy ont fait ou peuuent faire quelque signalé service, afin qu'il baille à ceux là un iuste loyer, & à ceux-cy l'esperance d'en auoir quand ils l'auront merite. En somme, il luy importe de cognoistre luy mesme ses subiects, afin qu'il iuge ceux qui sōt propres à le seruir, & qu'il soit aduertti de beaucoup de choses qui luy sont celes par ses domestiques. Ainsi il preuendra le plus dangereux mal qui soit en un estat, à sçauoir le melcontentement qu'un homme reçoit de se veoir recule de la faueur de son Prince, de laquelle il a vne iuste ialousie pour sa qualité ou son merite. Il est bien vray que les faueurs des Roys ne se peuuent partager es-

gallement: aussi ma proposition ne rend pas à limiter leurs affections & inclinations naturelles: Seulement ie dis qu'ils ne doiuent fermer la porte de leur bienueillance à ceux qui en sont dignes, & que le plus qu'ils peuvent obliger de telles gens c'est le meilleur, attendu que la pluralité d'amis est nécessaire à vn Monarque, laquelle il ne peut acquerir ny conseruer sinon par vne liberalité honneste & conforme à la condition de celuy qui la receura. Et afin que ses dons soient bien employez, d'autant qu'il ne peut cognoistre tous les gens de bien, il luy est expedient d'auoir à la façon des anciens Empereurs, vn certain Secretaire, qui l'aduertisse de ceux qui sont capables de le seruir en quelque charge, ou qui s'en sont autresfois bien acquittez, afin qu'apres auoir esté biē informé de leur suffisance, il leur donne de l'aduís de son conseil, les bons gouuernemēs ou commissions honorables. Mais au iourd'huy que la venalité des offices est par tout introduicte, on a beau auoir des perfectionz; qui n'a de l'argent ne paruiendra iamais aux digni-

tez publiquement. C'est vn malheur que les guerres ont amené, car elles ont reduit beaucoup de Princes à ceste necessité, de mettre en vente ce qui appartenoit à la vertu. Les guerres cessantes, ils auront assez d'autres expediës plus legitimes pour le fond de leurs finances. Ils n'auront que faire de donner des pensions aux estrangers, d'entretenir tant de garnisons & morte-payes, & les frais superflus estans retranchez, leur maison reglee, ils n'auront plus subiect de vendre les estats, ny permettre le trafic des gouuernemens tant spirituels que temporels, ny des offices de iudicature, qui est la source de tous desordres : occasion pourquoy Alexandre Seuerus protestoit de ne point endurer les marchâds d'offices, pource qu'un acheteur est contrainct de vendre. Je ne mettray point en auant ceste question, s'il faut que les estats soient perpetuels ou non. Elle a esté debattuë avec des raisons d'une part & d'autre, auxquelles ie suis indifferant, pourueu qu'on donne les dignitez aux hommes vertueux: sâs auoir esgard aux moyës ny à la race, lesquelles choses ne sont considerablës, sinon



quand elles sont cōiointes avec la vertu, & alors elles sont dignes de quelque prerogatiue. Les Romains entendoieēt bien cela (ie nomme souuēt ce peuple, pource qu'il nous fournit de tresbeaux exēples en toute sorte.) Ils chosissoient pour iuges les plus riches citoyens par la loy Pompeia: outre plus ils ne donnoieēt l'ordre de cheualerie sinon à celuy qui pour le moins auoit vaillant vingt mil francs, & pour estre Senateur il falloit auoir vne fois autant. Ils ne vendoient pas en ce faisant les offices, & si ils remedioient aux concussiōs ausquelles vn pauvre se laissera plustost aller qu'un riche. La noblesse de race merite aussi quelque consideration, & est à presumer que le fils d'un bon pere se portera heritier de ses vertus, & apprehēdera le blasme, s'il a quelque peu de sentimēt. Partāt il doit estre preferē à celuy dont les ancestres sont incongneus, en cas qu'ils concurrent tous deux en capacité & preud'homme. Mais il faut que la vertu aye tousiours le dessus en matiere d'honneurs & recompenses: autrement les affaires n'iront jamais bien. Et encore qu'il

semble difficile à vn Monarque d'es-  
côduire vn frere ou vne mere qui luy  
presentera quelque vn pour estre pour-  
ueu de quelque charge ou benefice,  
neantmoins telles recommandations  
ne doiuent auoir lieu, si elles ne sont  
fondees sur le merite du personnage  
qui est présenté. Que si d'auenture il  
ayme quelques particuliers, comme il  
arriue: pour le moins que les dons qu'il  
leur fera ayent quelque proportion  
à leur qualité, qu'ils ne passent point  
si excelliement leur merite, que sa li-  
beralité ne cause point vn mesconten-  
tement de ceux dont il ne doit mé-  
priser le seruice: Qu'il considere qu'on  
doit s'acquitter auant que donner, &  
qu'il n'y a debte plus legitime que la  
recompense de la vertu, qui gist prin-  
cipalement aux dignitez & honneurs.  
En quoy ledit Empereur Seuerus estoit  
si ceremonieux, qu'il declaroit par af-  
fiches publics les noms de ceux qu'il  
vouloit honorer de quelque commis-  
sion ou gouuernement, & exhortoit  
le peuple à les accuser si d'auenture ils  
se trouuoient reprehensibles, à condi-  
tion toutesfois que le calomniateur  
seroit puni de mort. Il auoit appris cela

des Atheniens qui examinoyent la vie de leurs magistrats , & establiſſoyent pour cét effect certains maiſtres des Comptes. Quand donc on aura examiné les meurs d'un chacun, on le pouruoyera ſelon ſa capacité. S'il eſt vaillant & fort , on luy baillera des gouuernemens & charges militaires: S'il eſt prudent & politique, on le fera Conſeiller d'eſtat: s'il eſt entier & incorruptible on le fera Iuge, on luy baillera le maniement des finances s'il eſt exempt d'auarice, les dignitez Eccleſiaſtiques, s'il eſt pieux & deuot. Ainſi le monde ſera content, le Prince ſera ſerui à ſon honneur & au profit du peuple , qui n'aura point occaſion de murmurer voyât vn ſi bel ordre en l'eſtat, & la iuſtice bien adminiſtree. Et afin que le royaume ſoit pourueu non ſeulement de gēs de bien, mais auſſi d'habiles hōmes, il faudra exciter l'induſtrie & propoſer quelque loyer à ceux qui excellerōt es arts & ſciences. Ceux qui meſpriſent les gens d'eſprit & de ſçauoir ſont ou barbares ou ſtupides, & pluſieurs le ſont par vn deſpit qu'ils ont d'auoir vn eſprit groſſier, & voudroiet que tous les hommes fuſſent ignorās,

afin que leur honte fust cachee par la multitude de leurs semblables. La science tiét le premier rang d'honneur apres la vertu. Encore ie n'entens pas icy cōprendre fous le nom de vertu ceste vaillance vulgaire, dont les hommes font tant de parade. La Dieu ne plaife que ie vueille postposer vne perfectiō diuine à vne generosité brutale, qui n'a que le masque de vertu, & n'a autre fin que pillages & tueries. Les plus grāds Princes ont tousiours respecté les doctes, & leur ont dōné ou offert de tres-beaux appointemens. Du temps de l'Empereur Cōmode, les professeurs de Philosophie auoient par an six cens escus Romains, qui pouuoient valloir trois mil francs de nostre monnoye. Sous Marc Aurele les Rhetoriciens auoient dix mille drachmes: (c'est plus de deux mille liures.) Vespasien leur auoit auparauant donné cinq mille francs. Mais ce n'est rien à comparai-son de la liberalité de Constance qui donna au Rhetoricien Eumenius iusques à trente mil liures de pension: Et ie croy que le Roy d'Angleterre

n'en eust pas moins donné à nostre Budee, si le Roy François n'eust esté à bõ droict ialoux d'un personnage si excellent en la cognoissance des langues Grecque & Latine. Que diray-ie de Cesar, Charlemagne, & infinis autres qui ont voulu eterniser leur nom par leurs escrits, aussi bien que par leurs exploicts belliqueux? Car il ne faut pas penser que la science abastardisse le courage d'un homme, ou qu'elle le rède inhabile aux armes, cõme les Scythes se sont autresfois persuadez, lesquels apres auoir pris Athenes vouloient mettre le feu à toutes les bibliothèques qui se trouuoient dedãs la ville: mais vn d'entre'ux les empescha, disant qu'il falloit laisser aux Grecs leurs liures, afin qu'en s'amusant à la lecture ils perdissent leur valeur, & deuinssent plus effeminez & domptables. Les Goths auoient vne mesme opinion, qui ne vouloient pas que leurs Roys fussent instruiets aux bonnes lettres. Ils ont bien operé avec ceste phantaisie, & ont appris à leurs despens que les plus ignorans & idiots ne sont pas les plus vaillans.



Ils ont esté batus & chassez comme vilains de tous leurs pays par ceux-là mesmes qu'ils auoiēt en mespris. Leur regne s'est passé si leg-rement & avec si peu d'effect, que nous n'en voyons presque auourd'huy rien, sinon les marques d'une barbarie. L'estat des Atheniens & Romains a esté bien plus ferme, qui ont conioinct les exercices d'esprit & de corps: aussi il n'y eut oncques peuple plus vaillant, plus heureux & plus sage. Mais qu'est-il besoing de chercher les exemples de l'antiquité, puis que nous voyons en ce siecle que les plus guerneres nations de l'Europe font estime des lettres? Je les nommerois si ie ne craignois de scandaliser les autres. Or iagoit que les sciences liberales soient preferees aux mechaniques, si ne faut-il pourtant mespriser celles-cy, attendu que les ouurages de main sont necessaires à l'homme, & pour ceste cause ceux qui s'en acquittent bien, meritent auoir part aux liberalitez publiques. Le Roy Mythridates ordonna des prix aux meilleurs biberons. Xerxes en decerna à ceux qui inuenteroient quelque nouuelle

volupté. Les comediens auoient vn salaire pour donner plaisir au peuple. A plus forte raison doit-on recognoistre les artisans, principalemēt les auteurs des belles inuentions: & ne faut pas faire comme Tibere qui fit mourir celuy qui auoit trouué la façon de rendre le verre malleable: c'estoit couper le chemin à l'industrie, & imiter aucunement les Ephesiens, qui ne pouuoient souffrir parmy eux vne vertu eminente, occasion pourquoy Heraclite disoit qu'ils meritoient tous d'estre pendus. Qui ne iugera dignes de loyer ceux qui ont inuenté les horloges & imprimerie? Qui ne reuerera la memoire de ce braue Neapolitain, qui depuis quatre cens ans a trouué l'éguille marine? Je laisse mille autres inuentions que nous n'aurions pas, si les auteurs d'icelles eussent esté si cruellement traitéz. Certainement il importe d'auoir de bons ingenieux, sur tout en l'architecture, orfeurie, au faict de la navigation, des forges, & semblables mestiers dont on ne se peut passer. Les dons d'un Monarque ne seront pas mal employez en cest endroit. Si ces reue-

nus ne sont bastans pour recompenser tous les hōmes de vertu & d'industrie, pour le moins qu'il contente ceux qui excelleront en ces deux qualitez, bien que ce luy soit vne excuse honteuse d'alleguer sa pauvreté, notamment en tēps de paix, auquel il faiēt peu de despence, tellement qu'il a dequoy faire ses largesses tāt à ses domestiques qu'à plusieurs autres personnes de merite. Et en ceste action cōme en toutes autres la prudence luy seruira de guide, afin qu'il aduise les moyens qu'il a de donner, combien, & à qui il donne. Il ne faut pas donner indifferemment à tous comme Heliogabale, qui gratifioit des rufiens & maquereaux. Il faut regler sa liberalité selon sa puïssance, de peur de tomber en vne pauvreté & misere, comme Caligule & Neron. Le sage Roy cōptera premierement avec soy mēme, & apres auoir defalqué de sa recepte ce qui luy est necessaire pour l'entretienement honneste de sa cour, il fera ses liberalitez du surplus, en les accōmodant à la condition d'un chacun. Doncques quād il aura recogneu l'industrie d'un hōme, s'il est pauvre, il luy dōnera pension conuenable: s'il est ri-

che ou noble , il le recompensera en honneur. Car c'est le plus agreable guerdō qu'on puisse donner à telles gens , qui estiment plus l'honneur que tous les biens du monde. Aussi c'est le plus grand esguillon de vertu qu'on scauroit imaginer. L'esperance de l'honneur a faict iadis tant de bons soldats en Grece & en Italie. Et les ieu Olympiques furēt pour cest effect instituez, où le victorieux ne remportoit pour le pris qu'une simple coronne de chesne. Philippe Macedoniē s'estōnoit de ce que les Grecs cōbattoient pour si peu de chose, mais il ne regardoit pas à l'honneur inestimable qu'ils receuoient d'autant qu'ils estoient louēz solennellement , & puis ramenez en leurs pays en bonne cōpagnie avec applaudissement & chants d'allegresse, outre les statuēs au vif qu'on leur dressoit. A Rome le triomphe estoit ordonné pour mesme fin aux generaux d'armees qui auoient remporté vne signalee victoire. Et sans doute l'esperance de ceste gloire leur faisoit mespriser leur propre vie , & l'employer librement pour le seruice de la Republique. Que ne feroit vn homme pour

entrer si pôpeusement en la ville? Que n'entreprédroit-il pour auoir l'honneur de donner l'espee & l'ordre de cheualerie à vn Roy, comme fit le Capitaine Bayard? Et pour parler des autres vacations pailibles, combien verrions-nous d'orateurs, s'ils gouuernoient le peuple comme iadis Demosthene & Ciceron? Combien de poëtes, s'ils receuoient vne coronne de la main d'un Empereur, comme il se pratiquoit és concerts de poësie qui se faisoient au mont d'Alba? C'estoit honneur sans profit, neantmoins il y auoit presse à qui l'emporteroit. Ce qui a esmeu plusieurs Princes de l'Europe d'instituer des Cheualiers, obligeans par ceste inuention sans rien desbourser les plus grands de leur Monarchie. Car le nom de Cheualier n'estant qu'un titre specieux en flamme toutesfoi d'un beau desir, vn homme genereux, voyant qu'il est cõfrere & compagnon de son Roy. Il y a d'autres hõneurs de moindre esclat, comme la dignité de Conseiller d'estat, les priuileges, les exemptions de tailles & autres charges que le Prince peut donner sans grande diminution



minution de ses threfors. Les Empe-  
reurs qui faisoient estat de subiuguer  
tout le monde recompensoient bien  
leurs seruiteurs aux despens des pro-  
uinces assubiecties. Car ils en chassoient  
les anciës possesseurs, & en adiugeoiët  
les plus belles terres à leurs Capitaines  
& soldats, afin de les contenter & obli-  
ger à leur rendre du seruice en cas de  
necessité. De là vient comme ie croy  
l'origine des fiefs, qui ne sont autres  
choses que certaines terres assignees à  
quelqu'un en recognoissance de son  
merite, à la charge neantmoins de res-  
pecter le donateur, & de l'assister en  
temps de guerre. Telles liberalitez n'e-  
stoient que viageres iusques à l'Empe-  
reur Alexandre, qui les rendit heredi-  
taires en faueur des enfans des gens-  
d'armes qui viuroient noblement, ne  
plus ne moins que les Duchez & sem-  
blables dignitez, qui sous la premiere  
race de nos Roys estoient temporel-  
les, ont esté finalement perpetuees &  
renduës patrimoniales par la permissiõ  
ou conuenance de ceux qui ont depuis  
regné. Le grand seigneur a retenu l'an-  
cienne coustume des fiefs, car il ne

donne ses Timars qu'à vie. Cesont-  
pays de conqueſte qu'il diſtribue à la  
mode Romaine à ſes plus aſſidez &  
yaillans ſoldats, à condition de le ſer-  
uir au beſoyn à leurs propres deſpens.  
Et on tient qu'en la guerre de Perſe il y  
à quarante ans, il conquiſt tant de pays,  
qu'il en fit quatre mille Timars. Mais  
aujourd'huy que les conqueſtes ſem-  
blent auoir pris fin, qui eſt vn aduer-  
tiſſement tacite aux Princes d'enten-  
dre à vne paix generale, & ſe conten-  
ter de leur fortune, il eſt neceſſai-  
re de trouuer autres moyens de libe-  
ralité publique. Nous les auons deſ-  
ia ſuccinctement repreſentez, & en-  
tr'autres auons parle en paſſant des  
benefices Eccleſiaſtiques, moyen par-  
ticulier aux Princes Chreſtiens pour  
exercer leur magnificence, ſans pre-  
iudicier à leur domaine. Auſſi ils ont  
accouſtumé d'en grauiſſer leurs bons  
ſeruiteurs & vallaux. Meſmes les  
Rois de France donnoient iadis les  
Abbayes à leurs Princes & Gentils-  
hommes qualifiez, qui non ſeule-  
ment iouiſſoient du reuenue de tels  
benefices, comme ils font aujour-

d'huy, mais aussi en portoient le tiltre, & ne faisoient aucun scrupule de se nommer Abbez, encore qu'ils fussent laïques & hommes d'espee. Ce qui a esté pratiqué depuis le regne de Charles le Chauue iusques à celui de Robert. Veritablement les biens de l'Eglise sont grands, & qui pis est, trop inegallement distribuéz: car quelques-vns en ont plus que leur condition ne requiert: d'autres n'en ont pas assez, & plusieurs n'y ont aucune part, encore qu'ils en soient tres-dignes. C'est abus s'est coulé de longue main, & ne peut estre osté tout à coup; non plus que beaucoup d'autres maladies d'estat. Il est donc expedient de laisser le monde comme il est, & permettre aux beneficiers de iouyr paisiblement des biens dont ils sont en possession. Mais puis qu'ils n'en sont qu'usufructiers, on peut sans les offenser après leur mort apporter vn reglement qui remedie à vn tel desordre. Est-il raisonnable qu'un seul homme aye vn benefice qui pour-

roit suffire à quatre ou cinq personnes de pareille qualité? Encore ne se contête-il pas s'il a vn riche Eueſché, s'il n'adiouſte le reuenu de plusieurs Prieurez & Abbayes: cependant il y a vne infinité de braues Gêtilshommes, ſoldats, & autres de diuerſes vacations qui languiffent ſous le faix d'vne miſerable pauureté, auſquels le prince pourroit donner appointement honneſte, ſi les benefices eſtoient distribuez cōme il appartient, & s'ils n'eſtoient occupez par vn petit nombre de perſonnes. Partant il ſeroit beſoing en cecy, d'vne double police. La premiere ſeroit de limiter le reuenu de chaque Eueſché, Abbaye, Prieuré, Cure, & apres auoir examiné les charges & profits deſdits benefices, assigner aux titulaires autant de terres ou rentes qu'on iugeroit ſuffire pour les entretenir honneſtement, ayant eſgard à leur qualité, tant pour ce qui concerne l'entretienement du ſervice diuin, que pour ce qui regarde les autres menus frais qu'iceux ont accouſtumé de ſupporter. Et du ſurplus on en accommo-

deroit les personnages de mérite, notamment ceux qui auroient serui le Roy ou le public, & n'auroient esté aucunement ou bien peu recompensez. Pour le second reglement, il faudroit deffendre à tous de tenir deux benefices, sinon en cas que la modicité du reuenu d'iceux, & la qualité des personnes fussent considerables. Quelle apparence y a-il de voir vn petit compagnon pourueu de plusieurs benefices, qu'il a brigué, couru, troqué, mendié importunément, ou acquis par moyës peu loüables & legitimes. Les grands reuenus amènent l'ambition & le luxe, vices detestables en vn Ecclesiastique, qui doit embrasser la simplicité & modestie. Il ne luy faut point entretenir des leuriers ny oyseaux de proye. Ce n'est pas son mestier que d'estre chasseur. Il n'a que faire d'escuries, pour les remplir de barbes, hongres, & genets d'Hespagne, puis qu'il ne fait profession des armes. Qu'il se contente d'vn reuenu sortable à sa condition : il ne se peut plaindre si on luy retranche ses superfluitez, pour les appliquer à vn œuure si charitable, & vtile, à sça-



voir la nourriture de ses pauvres compatriotes, recommandables pour quelques bons offices, afin qu'à leur exemple tous les autres soient encouragés à bien faire, le peuple soulagé de beaucoup d'impositions que le Prince est contraint de lever, pour subvenir à la nécessité de ses affaires, & remplir les places des ecclésiastiques, qu'il vuide tous les jours par faute d'une telle police. Quelques uns trouveront étrange d'ôter aux gens d'Eglise, pour donner aux laïques. Je ne le conseille pas, si ceux cy n'en aient aucun besoing, ou si ceux là n'abusent point de leurs richesses. Mais on voit le mille mescontentement des uns, & les delices excessives des autres. Et encore que ie n'approuve point l'égalité des proprietétez receüe anciennement en Lacedemone & à Rome, il me semble pourtant indigne de voir les benefices si mal departis, qui ont esté fondez & enrichis par la liberalité des gē de bien pour l'entretienement des Prestres & des pauvres. A ceste cause les terres & rentes, qui en dépendent doivent estre affectées à ces deux for-

tes d'hōmes. Or est il qu'entre les pauvres ceux-là principalement sont dignes de compassion, qui ont obligé le public par quelque action notable, de laquelle ils n'ont receu aucun guerdō. Quand doncques ils se presenteront au Prince, il les pourra recompenser en pratiquant ce que dessus : & neantmoins examinera auparavant leurs merites avec les meilleurs conseillers, afin de se depestrer de plusieurs importuns, qui sous pretexte de quelque cognoissāce qu'ils ont en Cour, pourchassent des appointemens dont ils sont indignes. C'est bien faict d'ouyr les humbles supplications de ses subiects, de recevoir leurs requestes, mais auāt que de les signer, il est bien-seant de les communiquer à son conseil : autrement les impudens emporteront les loyers de la vertu, & abusans de la facilité du Prince, mendieront ses faueurs par personnes interposees : qui sont grandement reprehensibles, de recommander des gens de paille : mais ils font encore vn autre mal. C'est qu'ils attirent à eux toute la grace

du bienfaict & liberalité du Prince. A quoy il pourra remedier, s'il faict despescher en sa presence celuy lequel il veut gratifier, & aussi s'il le renoye, comme j'ay dict, à son conseil. On n'osera pas luy presenter des requestes inciviles, quand on verra qu'il n'accordera rien à la legere, & qu'il ne fera rien que de l'aduis de ses bons officiers. Et pour mieux se comporter en cecy, deux registres luy sont necessaires. L'un qui soit l'abregé de ses finâces, & de sa despence ordinaire. L'autre qui contienne la liste de ses officiers & domestiques avec les appointemens & dons qu'ils ont obtenu, eux & leurs parens. Le premier registre luy fera voir ce qu'il peut donner. Dans le second il cognoistra ceux qui sont desia recompensez en offices, ou en argent, & les renuoyera doucement, lors qu'ils luy demanderont quelque nouveau don, afin qu'il fasse part de ses faueurs à ceux qui n'ont point encore esté poutueus. Les Roys de Perse auoient vn tel registre: tesmoing Assuerus, lequel l'ayât feuilleté, & voyant qu'il n'auoit point recogneu le signalé seruice de Mardo-

chee le combla de bienfaiſt & d'honneur, autant qu'un homme pouuoit ſouhaitter. Car le Monarque oublie ſouuentesfois les merites de ſes ſubieſts, à cauſe de la multitude des affaires qui paſſent par ſes mains, d'où il aduiuent qu'il ne leur dōne rien, ſi par vne modeſtie naturelle ils ſont honteux de demander: & au contraire il donne exceſſiuement aux effrontez imporruns, qui obtiennēt les plus beaux benefices & oſtrois par l'entremiſe de leurs corrauiers, bien qu'ils n'ayēt rien meritē. Ce qui apporte beaucoup de meſcontentement. Baſile Macedonien eſtant venu à l'Empire, trouua les threſors eſpuizez par ces gens là, tellement que la premiere choſe qu'il fit ce fut de leur faire rendre gorge, & rapporter la moitié des dons qu'ils auoient receus ſans iuſte cauſe. Mais d'autant qu'il eſt mal-ayſé de r'auoir ce qu'on a donné il vaut mieux ſoubsmettre ſa liberalité à la cenſure du conſeil, & à l'exemple de Charles huiſtième declarer nuls les dons d'une ſomme notable, s'ils ne ſont verifiez. Et ne ſert de dire qu'il eſt impoſſible de regler la deſpence d'un

Monarque attendu qu'il luy conuient faire aucunesfois des presens qui doiuent estre celez. Car tels dons se font aux subiects ou aux estrangers. Si aux subiects, ils en peuuent esperer la verification, en cas qu'ils le meritent, & s'ils en sont indignes, ils doiuent prendre patience & se contenter de quelque petite liberalité qui sera en la pleine disposition du Prince: car il ne doit pas pour peu de chose demander l'aduis à ses officiers: & pour ce Charles septiesme auoit par Edit exprez déclaré la somme qu'il vouloit prendre tous les ans, pour l'employer selon son plaisir. Quant aux estrangers, si on leur assigne vne pension, si on leur fait quelque present en cachette, c'est en tēps de guerre ou de defiance, afin qu'ils trahissent leur maître, & qu'ils decouurent ses secrets. ce qui ne se fera point en vne paix vniuerselle, où il n'y a que les Ambassadeurs qui puissent accepter vn present. Mais ceste liberalité est publique, honneste & moderee: encore ne sera elle pas necessaire à cause de ceste assemblee generale dont nous auons parlé. Bref on ne peut trop mesnager les finances d'un



Monarque, veu que d'icelles depend la conseruation de son estat, & soulagement de son peuple, qui est tousiours foulé à l'occasion de ses liberalitez desreglees. Elles seroient bien mieux employees enuers les patures, dont le nombre multiplie trop, & si on n'y donne ordre, ils serot capables d'esbranler les estats, aussi bien que firent iadis les esclaves d'Italie. Il n'y a rien qui mette plus au desespoir vn homme que la faim & disette extreme. De tout tēps on a yeu des patures, & faut necessairement qu'il en soit, attendu que l'harmonie des Republicques, depend en partie de l'inegalité des possessions: mais il faut auoir pitié d'eux, principalement des estropiez, aueugles, vieillards, malades & impotēs: & quāt à ceux qui sōt sains & dispos il les faut partiellement nourrir, & outre leur faire apprédre vn mestiers s'ils sont ieunes, afin qu'ils puissent gagner leur vie. Cepēdāt s'ils ont âge & force suffisate on en peut tirer du service. Car les Princes & les villes ont tousiours affaire des manœuvres & hommes de trauail pour bastir, pauer les chemins, calfeutrer les vaisseaux, réparer

les murailles ponts & forteresses. Les premiers Césars entreprenoient de grands bastimens qui n'estoient pas aucunesfois nécessaires, mais ils vouloient embellir leur Empire, & entretenir beaucoup de pauvres gens, qui autrement fussent morts de faim. Et les Venitiens auourd'huy nourrissent en leur Arsenac deux ou trois mil personnes, sçachans bien que c'est office de charité d'employer l'argent public à l'endroit des pauvres, en les faisant travailler: & à ceste fin les villes bien polices ont des maisons où ils retirent les necessiteux non malades, afin de faire des pepinieres d'artisans, & d'empescher les vagabonds & faitneans qui ne demandent qu'à belistrer, ou à voler. Il y a de certains pauvres, qui ne doivent pas estre enfermez ny traittez cōme les autres, à sçavoir ceux qui ont esté ruinez par les guerres, incendie, & semblables accidens, & sont honteux de mendier. Les aumosnes leur sont mieux appliquees, qu'à ces maistres gueux qui n'ont jamais fait autre mestier. Mais pour dire le vray, il est plus facile d'empescher la pauvrete devenir

que d'y remedier quand elle est venue.  
Et partant puisque l'experience nous apprend que les guerres, procez & impôts enuoyent les hommes à l'hôtel Dieu, oïtons ces trois causes, nous ne verrons point tant de miserables mendiants. La premiere cause est plus importante, & les deux autres en dependent: Car à l'occasion des guerres le commun peuple est chargé d'impôts, pillé aux champs par les gens d'armes, & aux villes par les vsuriers, auxquels il est contrainct d'auoir recours en sa necessité: & de tout cela on voit naistre des procez qui acheuent de ruiner les maisons. Donc la paix generale est vn beau moyen pour preuenir ces malheurs. Elle rendra la clef des champs & la liberté au laboureur, le deschargera des creuës qui se leuent en temps de guerre, l'affranchira de la tyrannie des vsuriers, qui bastissent leur fortune sur les ruines d'autrui. Il n'aura plus à craindre que les procez, dont la paix ne le peut garantir. Car il ne faut qu'un mauuais voisin, vn vindicatif, vn hargneux, pour mettre en procez vn homme paisible, & luy faire despeser tout

son biẽ en chicanerie: ioint qu'il y a des  
personnes qui ne se plaisent qu'à plai-  
der. Telmoing ce marchand de Paris,  
lequel ne voulut iamais quitter ses  
procez, bien que le Roy François pre-  
mier l'exhorta de ce faire, & promit de  
transiger pour luy à son profit avec  
toutes les parties, tant debtors que  
creanciers. Tels plaideurs eux deueroient  
estre punis à tout le moins par la bour-  
se, à la façon des Grecs, & Romains,  
qui faisoient gageure solemnelle-  
ment, & consignoient vne certaine  
somme d'vne part & d'autre avant  
que le procez fut iugé, & on confi-  
quoit l'argent de celuy qui estoit con-  
damné. Auourd'huy telles amendes  
n'ont point de lieu, sinon en cause  
d'appel, & encore elles sont si petites,  
que les plaideurs remeraires n'en tien-  
nent compte: mais en Grece elles va-  
loient la dixiesme partie de ce qui  
estoit contesté en iugement és causes  
ciuiles, & la cinquiesme és causes cri-  
minelles. Or ce mal vient principale-  
ment des hommes de pratique, qui  
sous pretexte de deffendre leurs par-  
ties, allongent industrieusement les

procez, & les veulent rendre immortels pource qu'ils ne vivent d'autre chose. Il n'y a fait si liquide, qu'ils ne rendent douteux. Il n'y a cause si claire qu'ils n'obscurcissent, aucun arrest dont ils ne fassent surseoir l'exécution par vne subtilité malicieuse. Ce qui faisoit dire à Caton, que le Palais deuoit estre pavé de chaufsetrapes. Que si les iuges symbolisent avec telles gens, ou s'ils se laissent par eux surprendre, quelle esperance y a-il de voir la iustice bien administree. Que fera vn pauvre plaideur quand il verra tant de remises en son affaire qui pouuoit estre terminé promptement? Quel courage aura-il de seruir son Prince, d'honorer les magistrats, quand il se verra consumé en frais auparauant que d'auoir iustice? Pour empescher ce mal, on a fait en France plusieurs polices, dōc la plus vtile & signalee est l'abolition de l'office des Procureurs. Car nos ancestres preuoyans que de permettre vne vacation qui ne subsiste que par la naissance & continuation des procez, ce seroit faire comme ces Iuges d'Athenes, qui remirent vne



cause iusques à cent ans, d'autant qu'un homme ne cherche pas la fin d'une chose qui luy apporte du profit, ils defendirent de plaider par Procureur, sinon en cas de necessité, & falloit alors impetrer ceste procuration du Prince, laquelle s'expiroit avec le Parlement, afin que personne ne s'assurast de viure aux despens des plaideurs. Dauantage ils faisoient plaider à tour de rouelle si exactement, que chacun se pouuoit assurer d'estre expédié, selon l'ordre qu'il s'estoit présenté pour demander iustice, n'estant permis aux Presidens de donner audience extraordinaire sinon les Ieudis. Et pour retenir les iuges inferieurs en leur deuoir, c'estoit vne coustume generale aux appeilans de les prendre à parties & les faire adiourner pour venir respondre de leurs sentences à leurs perils & fortunes. Ces reglemens sont bons s'ils estoient obseruez. Mais Basile Macedonien trouua d'autres remedes. En premier lieu il assigna certain reuenu à ceux qui n'auoient moyen de poursuiure leur droit. Secondement, pource qu'il voyoit le desordre qu'apportoit

la multitude & obscurité des loix que chacun interpretoit à sa phantaisie, il delibera de casser les ordonnances inutiles & ambiguës. En apres, il establit des iuges sans reproche, & leur bailla bons gages, leur enioignant de tenir le siege tout le iour, & de vuidier les procez avec toute equité & diligence. Finalement il prit la peine de cognoistre les differends & plaintes du peuple : à quoy il ne manquoit iamais, si d'ailleurs il n'estoit diuertí pour la guerre, ou pour la depesche des Ambassadeurs. Mesmes vn iour estant venu au Palais, & voyant que personne ne l'abordoit, il enuoya des gens exprés par la ville de Cōstantinople pour sçauoir si quelqu'un auoit des plaintes à luy faire, & comme il fut aduertí que tout le monde estoit content, il en pleura de ioye & en rendit graces à Dieu. C'estoient tous actes de grand Monarque, lequel doit rendre la iustice à ses suieets, autant aux petis comme aux grands, aux paysans comme aux nobles. Et cela ne diminuë pas sa grandeur. Son nom le garantit assez du mespris. Les plus excellentes

choses sont communicatiues. Le Soleiliette ses rayons esgallemēt sur l'or & la fange. Les eaux coulent en public Dieu conserue les moindres animaux en leur estre. Pourquoy donc vn Roy se cachera-il de son peuple: Pourquoy ne se rendra-il communicable à ses subiects, afin de receuoir leurs requestes de leur main, ouyr leurs doleances de leur bouche, qui sont ordinairement supprimees ou delguisees par la conuenance de ses familiers & domestiques, qui ne songent qu'à se mettre à leur ayle, & ne font non plus d'estat d'un paylan ou bourgeois que d'une pauvre beste? Auguste, Claude, Vespasian, Adrian & autres Empereurs faisoient droit aux parties, non seulement estans assis au trosne de iustice, mais aussi en leur chambre, à toute heure, mesme pendant leur repas, & lors qu'ils estoient au liēt malades. Mithridates Roy tres-puissant auoit appris vingt-deux langues, afin d'ouyr les supplications de tous les peuples qui en vsoient. Nostre saint Loys n'estoit pas moins curieux de ce deuoir. Car mesmes au milieu de ses esbats

qu'il prenoit ordinairement au bois de Vincenne, il se mettoit au pied d'un cheſne, & là il donnoit audience libre à ceux qui ſe preſentoient, & de l'aduis de quelques ſeigneurs qui l'asſiſtoient, ſur le champ prononçoit ſa ſentence. Je ſçay que le Prince ne peut pas eſtre par tout : auſſi il n'eſt pas beſoing qu'il ſ'oblige d'ouyr ſans ceſſe les differēds: pour le moins il doit donner quelques iours de la ſemaine à ſes ſubiets, à l'exemple de Charlemagne, & leur permettre de l'accoster lors qu'ils auront quelque iuſte plaincte. Cela empeschera beaucoup d'iniuſtices, & contraindra les Iuges, Aduocats, & Procureurs de marcher droit, quand ils verront que le Prince prendra cognoiſſance de leurs actions. A ceſte occaſion Philippe le Long ordonna que deux ſeigneurs de ſa Cour aſſiſteroient au Parlement pour voir & luy rapporter ce qui ſ'y paſſoit, & auſſi ſ'oppoſer aux Arreſts qui meriteroient censure. Par vne autre ordonnance de Philippe le Bel les Preſidens doiuent rendre compte de trois

ans en trois ans. Mais il ne sera besoing de venir à ces rigueurs si on eslit des magistrats qui ayent de l'aage, du iugement, de la constance, & preud'homme, qui ne soient point souffreteux, qui ne se laissent emporter par faueur ny par crainte, en somme qui ne se fassent point prier pour signer vne requeste iuste, & ne se laissent aussi amadoüer pour en accorder vne iniuste. Ce n'est pas peu de chose que d'estre iuge. La vie & les biens d'un chacun dependent de cest office. Les Atheniens ne receuoient en la Cour d'Areopage sinon ceux qui estoient de noble extraction & de bonne vie: aussi c'estoit le plus anguste & fameux consistoire de iustice qui fut oncques, & mesmes on tient que les meschans qui par faueur ou dissimulatiõ de leurs vices s'estoient fait recevoir en iceluy changeoient incontinent de naturel, & deuenoient gens de bien comme s'ils eussent esté diuinement touchez par le genie du lieu & de ceste notable assemblée. Or d'autant que nous ne sommes pas en vn siecle de telle perfection, le Prince doit d'autât plus estre soigneux



de cognoistre les deportemens des iuges & les examiner cōme toute autre chose d'importance avec son conseil, & sur tout leur enioindre d'expedier promptement les procez, sans s'amuser à tant de formalitez superfluës. Il ne faut precipiter les iugemens, mais aussi il ne faut pas les differer quand le droit est apparent, sous couleur de petites supercheries prouenant de l'inuention de ceux qui n'ayans pas bonne cause ne veulent iamais sortir d'affaire. Il ya en cecy aucunes fois de la faute des iuges, qui sont trop lents à rapporter vn procez, & sont trop indulgens à l'endroit des chiquaneurs, qui ne manquent point de pretexte pour retarder ou embroüiller vne cause. Les iuges doiuent rembarrer voire mesmes chastier ces gens là, pource qu'ils donnent subiect au peuple de murmurer contre le plus saint ordre du monde, veu qu'on a tant de peine à obtenir iustice. La decision des procez n'est pas chose si mal aisee qu'il faille y apporter tant de remises. Si la question est de faict, l'enqueste ou information l'esclaircissent, qui ne requie-

rent pas grande subtilité. Les questions de droict sont la plus-part preiugees par les loix, Edicts, coustumes & Arrests qui ont esté donnez sur cas semblables. Car les accidens & ne-goces sont compris en nombre determiné. S'il y a quelque circonstance qui les varie, on peut aysement voir si elle est considerable. Mais on faict souuentefois d'vne mouche vn Elephant, & les praticiens avec leur stile & routine trouuent tousiours quelque alibi pour accrocher vn procez, & avec cela les iuriscōsultes au lieu de desuelopper vn fait, ont accoustumé de l'obscurcir par leurs interpretatiōs. Ce vice ne leur est pas familier d'auourd'huy. Il y a plus de seize cens ans que Ciceron s'est plainct des consultants de son aage qui pour paroistre habiles en leur mestier, d'vne hypothese simple en faisoient plusieurs, vsans de diuisions & subdiuisions afin de rendre la chose plus difficile. Le texte des loix est clair & intelligible. S'il y a quelque defect, que les iuges le suppleent par leur sagesse & equité, sans auoir recours a vne milliasse d'interpretes qui

ne s'accordent entr'eux non plus que les horloges, & causēt des scrupules & distractions d'esprit par la diuersité de leurs opinions. Ce qui engendre & nourrit les procez, & les faict durer si longuement qu'on n'en peut voir la fin. C'est pourquoy les peuplades d'Hespagnols aux Indes auoient raison de prier leur Roy de ne leur enuoyer aucuns Aduocats. Car les peuples grossiers viuans à la naturelle sont plus à leur ayse que ceux qui employēt leur subtilité en tromperies. Mais puis que les procez sont si ordinaires aux nations de l'Europe qu'on n'en peut couper la racine, il faut empescher qu'ils ne pullulent, & donner ordres qu'ils soient iugez le plus promptement que faire se pourra. Le Senat Romain auoit vne belle coustume en causes criminelles de continuer l'audience trois iours consecutifs, pendant lesquels ils escoutoient les parties tout à loisir, avec les tesmoins, & ne sortoient point de la chambre auparavant que le Soleil fut couché. Et pour le regard des causes civiles, Vespasian y pourueut sagement. Car ayāt

recoigneu les roolles qui s'estoient en-  
flezz par l'iniure du temps, il choisit des  
hommes auxquels il donna commis-  
sion de reuoir soigneusement & iuger  
les procez qui sembloient ne pouuoir  
estre terminez durant la vie des par-  
ties. Vn procez est de mauuaise garde.  
Il produict de pareils effectz que les  
armes, & n'y a rien qui appauurisse plus  
vn peuple en temps de paix si vous ex-  
ceptez les tailles, qui donnent sub-  
iect de grandes plaintes. Je ne serois  
pas d'aduis qu'on fit comme Neron  
qui resolut d'affranchir de subsides  
tous ses subiects : Vn Monarque a be-  
soin de quelques contributions pour  
entretenir sa grandeur, & asseurer son  
estat, mais il doibt en cecy vser de mo-  
deration, sans s'amuser à la maxime de  
certains flatteurs. *Qu'il n'y a pire gresse  
que celle d'un peuple.* Tels hommes rom-  
pent l'amitié mutuelle qui doit estre  
entre le Prince & ses subiects. Les Hi-  
stoires nous donnent infinis exem-  
ples des changemens qui arriuent à vn  
estat à l'occasion des impôts. Et puis  
que les tailles n'ont esté premieremēt  
ordonnees que pour subuenir aux frais

de la guerre, & mesmes que nos Roys protestent de les abolir ceste cause cessante, quel pretexte auront ils de les continuer en vne paix generale? Or le plus grand mal que l'on commette en cela, gist en la procedure de la leuee des deniers. Car on ne se contente pas de taxer les pauvres autant que les riches, le plus souuent ceux-cy ne payent rien & ceux-là supportent tout le faix. Pour à quoy remedier les tailles deuroient estre par tout reelles, cōme elles sont en Prouence & Languedoc, ou mixtes ainsi qu'elles estoient en la ville de Rome, ou chacun payoit l'impōst selon ses moyens lesquels il bailloit par declaration, & on punissoit rigoureusement ceux qui celoient leurs biens. On a voulu depuis peu remettre ceste coustume, mais quelques vns l'ont empesché par des raisons assez friuoles. Car les Romains s'en sont bien trouuez, & Tite Liue la louë cōme la plus belle police & la plus salutaire que puisse auoir vne grande monarchie, attendu que par ce denombrement on verroit non seulement ses richesses, mais aussi les forces qui consi-



stēt en la multitude du peuple. On en registreroit l'aage, la force & la qualité des habitans, & ainsi on cognoistroit combien on pourroit fournir & entretenir des gen de guerre en vne necessité. Le dernier Empereur de Constantinople voyant que le Turc s'apprestoient pour enuahir son estat, s'aduisa, mais bien tard, de faire vn denombrement de sa ville capitale, où il trouua si petit nombre de combattās, qu'il fut contrainct de le celer, enioignant à ceux qui en auoient dressé le registre de le tenir secret. Que si dès le commencement de son Regne il eust recognu son peuple, il eust eu loisir d'y pouruoit. Or laissant à part les autres vtilitez qu'on peut tirer du denombrement des personnes & des biens, il est aisé à iuger, comme il est important pour le faict dont il est question, afin que chacun soit cottisé à raison de ce qu'il peut payer. Autrement les pauvres seront iniquement foulez en la leuee des impost, en laquelle il se trouue encore vn autre mal. C'est que les deniers passent par tāt de mains, speciale-ment en France, qu'on a remōstré n'a-

gueres à vn de nos Roys, que d'un escu il n'entroit pas vn reston en ses coffres, le reste estant employé aux frais des officiers. Les Turcs se dōnent bien garde de cela, & ont fort peu de gens qui manient les finances. Mais quoy? ils ne vendent point les estats : & ne les font hereditaires. Cōclusion. Ce sont deux mauuais pilliers de monarchie que les imposts excessifs & la venalité des offices. Le Prince a d'autres moyens plus legitimes; & quand il n'auroit que son domaine & ses droicts ordinaires, il auroit de quoy magnifiquement entretenir son train, sans inuenter nouueaux subides. Et si le domaine est engagé ou aliené, par le malheur du temps passé, il le doibt rachepter. Car on sçait qu'il n'est iamais vendu la moitié de ce qu'il vaut, & le peuple contribueroit volōtiers pour vn si bō effect, afin d'estre deschargé des exactions qu'il supporte. C'est par là qu'un Prince doit commencer le mesnage de ses finances, lesquelles cependāt il peut augmenter honnestement par vne imposition sur les marchādises qui se trāsporterōt hors de son pays, & sur celles qui y

seront apportees. Vn Prince doit  
~~a~~oir part au profit de ceux qui trafi-  
quent en sa seigneurie, ou des biens  
d'icelle. Et si les marchandises qui se  
transportent sont necessaires à la vie  
humaine, il n'y a point de danger qu'il  
mette sus elles vn bon impost, com-  
me aussi sur les delicatesses, frian-  
dises & superfluitez qui seront appor-  
tees en son Royaume. En quoy il n'est  
pas besoing de faire distinction entre le  
marchand subiect & l'estranger, com-  
me plusieurs Princes font aujourd'huy.  
Car la condition du trafic doit estre  
par tout esgalle, principalemēt en vne  
paix vniuerselle, où il est question de  
se maintenir en bonne intelligence  
avec tout le monde. Mais si le Prince  
veut bien faire son profit, il trafiquera,  
& aura des vaisseaux sur mer pour ne-  
gotier aussi bien que les particuliers.  
Pourquoy ne prendra-il pas le train  
d'un marchand plustost que d'un tyran  
ou exacteur? C'est folie de penser que  
la negotiation deroge à la noblesse.  
Cela est bon à dire pour des merciers,  
tauerniers, & autres petits courtaux de  
boutique, & non pour des hommes

qui enuoyent leurs facteurs en diuer-  
les prouinces, pour faire vn profit hō-  
neſte en accommodant le public. Auſſi  
beaucoup de Princes aujourd'huy ſe  
mocquent de tel ſcrupule, recognoiſ-  
ſans qu'il n'y a gain plus legitime que  
celuy du trafic. Je ne parle point de la  
peſche des perles, ny des mines, dont  
plusieurs Roys tirent de grāds profits:  
ny des confiscations & autres parties  
caſuelles, qui peuuent fort augmenter  
leurs threſors. Ils ont auſſi vn autre  
moyen iadis pratiqué par les Empe-  
reurs de Rome, à ſçauoir de bailler ar-  
gent à intereſt à raiſon du deniervingt,  
en prenant bonne caution. Cela ſeroit  
grandement vtile aux pauvres: car ils  
ne ſeroient point rançonnez par les  
uſuriers, & trafiqueroient de l'argent  
du Prince en payant vn leger intereſt.  
D'ailleurs le Prince y gagneroit beau-  
coup s'il preſtoit vne ſomme notable,  
& mettroit ſes finances en ſeureté.  
Mais il faudroit premierement deſga-  
ger ſon domaine, attēdu qu'il n'y a pas  
d'apparence de preſter quand on doit,  
encore moins de faire prouiſion de  
grains, comme il eſt neceſſaire pour

obuier à la disette & nécessité publique qui peut suruenir. Aussi c'estoit le plus grand soing qu'eussent les magistrats Romains d'auoir des magazins de bled qu'ils faisoient venir de tous costez, spécialement d'Afrique & d'Egypte, dont l'vne leur enournissoit tous les ans pour huit mois, & l'autre pour quatre. Que si d'auenture le bled estoit cher outre mesure, ils encourroient la hayne du peuple, qui croit apres eux & souuent les attaquoit en leurs personnes, en leur iettant de la boue, des pierres, ou du fumier, comme il fit au consul Bibulus. Il n'esparagnoit pas meisme les Empereurs. Tesmoing Claudius, à qui on ietta des bribes de pain avec iniures atroces en plein marché, & s'il ne se fut sauué, il couroit plus grande fortune. Le bon Antonin receut des coups de pierre en vne semblable mutinerie, laquelle on peut preuenir, si à l'exemple de Ioseph on faict prouision de bled pour plusieurs annees, qui soit diligemment gardé & renouveléés greniers publics qui pour cét effect seront establis en chaque ville, comme ils estoient iadis



& sont encore en quelques citez bien policees. Mais il n'est pas expedient de donner gratuitement le bled, selon la custume de Rome, d'autant que cela causeroit vne oisueté au peuple, & espuiseroit les finâces: encore moins faut il imiter Nicephore Phocas qui réplissoit les greniers de froment & le reuendoit à son plaisir en la chere année. Il suffit d'en faire vn amas pour le distribuer à iuste prix envn temps de sterilité, & famine. En quoy le Prince montrera sa preuoyance & le soing qu'il a de ses subiects, qui grondent quâd ils ne voient point de bled au marché, & imputent à leur souuerain le malheur d'une année, cōme s'il deuoit estre gardé de la temperature de l'air & faueur du ciel. Et de faict les Roys des Indes s'obligent par serment solemnel à leur sacre, de faire en sorte que le Soleil continuera son cours, & la terre produira vne abondance de fruiets. Il faut donc contenter le peuple de ce costé là, veu que sur toutes choses il demande du pain & des ieux, selon le dire du poëte satyrique. Ce qui vient à propos pour nostre lixième moyē, à sçauoir recrea-

tiō licite, en laquelle il est bon d'entre-  
tenir les hommes pour les divertir des  
mauuaises pēces. Car puis que tout le  
mōde se porte naturellemēt à la volup-  
té, c'est prudence à vn Prince de dōner  
ou permettre à son peuple quelque  
honneste passetemps & plaisir licite,  
spécialement les ieux de prix, les spe-  
ctacles du theatre, & autres exercices  
recreatifs, qui ne diminuent point le  
patrimoine, profitent aux corps, & ap-  
portent du contentement à l'esprit. A  
ceste fin tendoient les combats de lui-  
ette, de courſe, & les conerts de Poë-  
ſie & musique anciennement vſitez,  
non ſeulement pour fortifier le corps &  
exciter l'industrie de ceux qui conte-  
ſtoient, mais auſſi pour reſioüir les aſſi-  
ſtans. Les tragedies & comedies  
auoient vn meſme but, eſquelles les  
Atheniens employoient le reuenu de  
leur hoſtel de ville, & eſliſoient vn  
magiſtrat particulier pour fournir aux  
fraix des baſteleurs. Les Romains les  
imitoient voire les ſurpaſſoient en ce-  
la. Car outre le plaisir qu'ils prenoient  
aux ieux du theatre, ils auoient les ſpe-  
ctacles de la carriere, du Coliſee, des  
Naumachies,

Naumachies, que les Magistrats faisoient magnifiquement représenter à l'enui l'un de l'autre. Plusieurs reprochent les comédies, comme pernicieuses aux bonnes mœurs à cause de leur lascivité. Les Massiliens les avoient en horreur, & les défendoient expressement. Mais leur considération n'estoit pas valable. Car il ne faut jamais rebutter une chose pour un abus qui s'y commet. Que s'il échappe aux basteleurs parmy tant de discours un trait de lascif, leur art pour cela n'en doit pas être moins estimé, veu qu'il n'est qu'une image de la vie, une représentation de ce qui se fait, & non pas une exhortation de ce qui se doit faire. N'est-il pas ridicule, de blâmer la comédie, & en donner le sujet, de se plaire aux actions vitieuses, & détester les paroles de même qualité? Les hommes ne sortent point du théâtre plus mal corrigés. Ils sont corrompus auparavant que d'y venir. Qu'ils se reforment bien en leur maison: on ne fera plus de farce ny de comédie. Qu'ils donnent bon exemple à leur famille, ils n'auront de quoy craindre la corruption de la

ieunesse. Mais tandis qu'ils feront des meschancetez ou vilenies, il sera besoyn de les mettre en euidence, afin que le peuple les eute, ou s'en moque. Telle recreation est approuuee par Aristote, & mesmes les principaux Docteurs des Chrestiens, la recommandent avec certaines modifications, comme chose tres-necessaire. Pource que l'homme estant compose d'ame & de corps, & ces deux substances estans bornees elles ne peuvent pas supporter vn perpetuel travail: partant il leur faut donner quelque relasche, & delectation, laquelle on ne leur peut mieux procurer que par les ieux du theatre, qui resiouissent egaleme[n]t la veüe & l'ouye; en quoy consistent les voluptez que les Philosophes appellent humaines, afin de les distinguer des voluptez brutales, à sçauoir celles du goust & de l'atouchement. ¶ Bref on ne doit interdire ce passe-temps, puis que le sage Socrate vient ouir le bouffon Aristophane, & le graue Caton desire voir les florales. Toutesfois pour donner plaisir sans scandale, rien ne me semble plus

propre que la musique, de laquelle tout homme est amoureux, exceptez quelques mechânes ou bien ceux qui ont l'ame mal disposée. Certainement nos esprits ont vne grâde inclination à l'harmonie, & goustent sa douceur avec plus d'attention & ravissement que toute autre chose. Ses merueilleux effects ont contrainct les deux plus politiques Philosophes de dire que pour regler les mœurs il falloit apporter vn reglement à la musique, & que d'icelle dependoit la manutention d'un estat. Je ne m'arresteray pas à examiner ceste maxime, mais il faut aduoüer qu'il n'y a chose qui puisse plus addoucir les hommes & les rendre paisibles. Tesmoing ce peuple d'Arcadie, qui deuint farouche & cruel, pour auoir quitté la musique, en laquelle selon la coustume du pays vn chacun estoit tenu de s'exercer iusques à l'aage de trente ans. A quoy l'Empereur Solymã deuoit pëser, lors que le Roy François premier luy enuoya par forme de present des chaires avec luths, viols, & musique choisie. Il eut quelque tēps la patiēce de les ouyr; mais voyāt que sa cour y prenoit



plaisir, il renuoya les musiciens, & fit jeter dans le feu leurs instrumens & leurs liures. Ceste action est barbare, & a pour fondement vne fausse opiniõ à sçauoir, que la musique rend les hommes effeminez, comme si Achilles eust perdu sa generosité en iouant de sa lyre, où les Lacedemoniens eussent esté moins vaillans qui alloient au combat au son des flustes. La musique n'émousse aucunement la pointe des courages, au contraire elle nous anime à la vertu par vn secret enthousiasme, en touchant l'ame d'un celeste plaisir, & desracinant peu à peu toute inhumanité & felonnie. Le vulgaire appelle cela delicateſſe & lascheté, en quoy il se trompe, attendu que ces vices n'ont rien de commun avec la douceur & mansuetude, vertus cõuenables à l'homme. Et quand la musique apportera quelque alteration aux meurs, comme les choses les plus salutaires aucunesfois sõt mal appliquees par la faute de ceux qui en vlent, ce sera le deuoir des censeurs d'y apporter remede, aussi bien qu'aux autres abus. Ce magistrat est necessaire pour l'accomplissement

d'une parfaicte police. Sa charge consiste à faire le denombrement, & à reformer les mœurs. Quant au denombrement nous en auons monstre les vtilitez. Mais la reformation est encore de plus grande cōsequence. Car on ne peut bien esperer d'un Royaume, où les meurs sont desreglees. Les iuges n'y donnent point ordre, pour ce qu'ils ne punissent que les crimes, & passent par conniuece beaucoup de vices qui minent insensiblement vn estat. Ils ne contreroolent point les enfans desobeissans à leur pere, ils laissent viure à la desbandade les rufiens, maquereaux, pariures, ioïeurs, breslandiers, yurōgnes. querelleux, & faineās. Et neantmoins de telles gens viennent les seditions & ruines des republicues. Je sçay bien qu'il ne les faut pas punir si rigoureusement que les voleurs & meurtriers: aussi la puissance des censeurs ne s'estend pas iusques-là que de condamner à mort ny mesme à emprisonnement. Tout ce qu'ils pouuoient faire à Rome, c'est de noter publiquement ceux qui viuoient mal, en degradant vn chacun selon sa qualite. Si

le delinquant estoit Sénateur, ils luy defendoient l'entree du conseil: ils estoient l'ordre a vn cheualier, & le droict de bourgeoisie a vn simple ciroyē. Ceste ignominie faisoit plus d'effect que toutes lesloix & ordonnances des iuges: car encore qu'elle fit plus de honte que de mal, il ne se trouuoit homme si effronté, qui ne redoutast le iugement du Censeur. Il est vray que ce magistrat n'estoit donné qu'a ceux qui auoient de l'autorité pour leur aage & preud'homme. L'apprehension du deshonneur sert de bride pour arrester les plus meschans: & encore qu'ils fassent profession d'impudence, si est-ce que plusieurs ne veulent pas estre recogneus tels qu'ils sont, ny estre exposez à la mocquerie du peuple, comme ils seroient apres auoir esté biffiez & ignominieusement traictez par les censeurs. On verroit alors ces vauriens aller la teste baissée, n'oser paroistre en cōpagnie: on les monstreroit au doigt, afin de les fuir comme pestes. Ce qui seruiroit d'exemple pour apprendre à viure honnestement. Quelqu'un pourra dire que ce temps ne reçoit pas vne

telle feuerité, & que les hommes d'aujourd'huy ne se gouernent pas à la façon des anciens. Et ie responds que ceste maxime est fausse, & cōtraire à l'experience, à la raison, & à l'autorité du sage qui nous enseigne. *Que rien ne se voit nouveau sous le Soleil.* Les actions & euenemens sont nouveaux en leur indiuidu, mais les especes ont tousiours esté comme à present. Les mesmes causes qui ont iadis conserué les monarchies, les peuuent encore maintenir, & aussi elles se ruinent par les mesmes moyens que le temps passé. Cest vne lascheté de courage ou vne malice extreme de voir le desordre, & n'y vouloir appliquer le remede, & quand on propose quelque expedient d'alleguer pour toute raison, que c'est vne police du vieil temps. Telles reparties sont familiares à ceux qui ne sçauēt que dire, ou qui ne trouvent rien de bon, que ce qui vient de leur ceruelle. Aussi ce n'est pas à eux à qui on doit demander conseil, touchant le restablissement de la censure. S'il est question de confisquer les mauuaises marchandises,

on ne prendra pas conseil de ceux qui les vendent. Quand les legillateurs ont ordonné des peines, ils n'ont pas consideré les affectiōs des coupables, & ne leur ont pas demandé aduis. Que les Roys donc remettent la censure, sans auoir esgard à ceux qui s'ytrouuēt interressez, & qu'ils ne mettent point en deliberation s'il faut reformer les meurs, puis que c'est vne chose necessaire qui a maintenu si long temps l'Empire Romain, & de laquelle encore auourd'huy quelques republiques se seruent. Or pour bien enfourner ceste reformation il la faut commencer par l'instruction de la ieunesse, de laquelle iadis on auoit tant de soing, & maintenant on n'en tient quasi contre, pource que les Magistrats s'en rapportent aux parens, & ceux-cy laschent la bride à leurs enfans. Ce qui est d'autant plus dangereux en ce temps que la puissance des peres est ancantie. Car lors qu'ils auoient autorité souueraine sur les enfans, ils les châstioient selon leur volonté, & mesmes les faisoient mourir sans cognoissance de cause, la iustice presupposant qu'un



hōme ne seroit pas si desnaturalé de battre ou tuer son fils sans vn grand subiet. Maintenāt que la crainte de ceste puissance paternelle est ostee, & que les enfans se licentient de telle sorte, qu'ils font la loy à leurs peres, & aucunesfois les outragēt d'effect ou de parole, pour couter les malheurs qui en peuuent arriuer, il faut que la republique entreprenne ceste charge, & qu'elle committe des magistrats pour auoir soing particulier de ces ieunes plantes, afin qu'elles produisēt de bons fruiĉts. Les Lacedemoniens entendoient bien cela, qui ne permettoient pas aux peres de nourrir leurs enfans à leur mode, mais les distribuoiēt par bandes dès l'aage de sept ans, & les donnoient en charge à vn Magistrat estably pour cest effect, qui les faisoit boire & manger ensemble publiquement, & les accoustumoit à mesmes exercices. Mais ils failloient en ce qu'ils ne leur monstroient principalement qu'à luidter, & à se battre. Car outre ce que la luidte est trop violēte & peut facilement gaster le tendre corps des enfans, ils aprenoient à deuenir fiers, querelleux

& barbares, qui sont qualitez indignes d'une publique discipline. Aristote trouue plus à propos de les instruire aux arts liberaux. Et pour en parler plus distinctemēt, ie conseilerois que iusques à quatorze ans', on leur fit apprendre à lire, escrire, & cōpter: d'auantage qu'on leur dōnast la cognoissance des loix & antiquitez de leur pays, à la façō des enfans Romains qui apprennoient par cœur les loix des douze tables. Les Candiots mettoient leurs ordonnances en musique, afin de les faire couler dans les tendres esprits avec plus de facilité & plaisir. Outre cela, ils leur monstroient les hymnes composez en la loüange des Dieux & des hōmes illustres. C'estoiēt toutes leçons d'honneur, & qui meritent d'estre renouvellees. Je serois aussi d'aduis qu'on enseignast aux enfans les lāgues estrāgeres qui ont plus de vogue parmy leurs compatriotes, comme la Grecque & Latine entre les Chrestiens, & l'Arabique entre les Mahumetains. Ceste sciēce ne leur seroit point inutile, elle esclaireiroit leurs esprits, & leur apporteroit du contentement quand ils se-

roïët plus grands, s'ils vouloient s'ad-  
uancer plus auant és estudes de Theo-  
logie, medecine, iurisprudence & Phi-  
losophie: sinon, ils pourroïët tousiours  
se vâter de n'auoir point passé inutile-  
ment leur enfance, comme font plu-  
sieurs qui sont accoustumez dès le ber-  
ceau à niaiser & folastrer, en sorte qu'au  
bout du tēps ils ne sçauēt que des sotie-  
ses. Ne vaut-il pas mieux faire gouster  
aux enfans les bonnes disciplines, en  
attendât qu'ils soient plus robustes, &  
alors il sera bõ de leur faire exercer al-  
ternatiuement le corps & l'esprit, afin  
qu'ils sçachent non seulement bien di-  
re & iuger de toutes choses, mais aussi  
se defendre courageusemēt en vne ne-  
cessité. A ceste fin depuis quatorze ans  
ils apprennent à manier vn cheual, na-  
ger, sauter, & tirer des armes, en conti-  
nuant toutesfois leurs premiers exer-  
cices cy dessus specifiez iusques à l'aa-  
ge de 18. ans. Et alors on les rendroit à  
leurs peres, qui receuroient vn extre-  
me plaisir. Et cōme les Gaulois ne vou-  
loiēt voir leurs enfans qu'ils ne fussēt  
propres à porter les armes, aussi chacun  
se resioüiroit voyant son fils capable

de paroistre en guerre & en paix. Il luy feroit prendre vne vacation sortable à sa qualité, & au lieu que les enfans aujour d'huy sont reuesches, il le trouueroit souple à ses commandemens, & à la raison, par le moyen de la bonne instruction qu'il auroit receuë. D'autre part le Prince auroit vne pepiniere d'hommes de conseil & de main, qui l'assisteroient au besoing. Il cognoistroit ceux qui le pourroient seruir en quelque façon que ce soit, & sans auoir recours aux estrangers, trouueroit entre ses subiects vne infinité de bons officiers soldats & artisans. Certainement il n'y a rien de si grande importance que l'instruction de la ieunesse. C'est le fondement d'un estat, l'appuy de la tranquillité que nous cherchons. Les censeurs d'oc y doiuent auoir l'œil. Et afin que personne ne s'alentisse d'oisiveté, ils contraindront vn chacun de choisir vn genre de vie, apres qu'il sera sorti de l'Academie publique. En quoy ie ne puis approuuer la coustume des *Ægyptiens* & *Lacedemoniens*, qui vouloient que les enfans fussent d'un mesme mestier que leur

pere, tellemēt que le fils d'un cuisinier estoit cuisinier, & le fils d'un audiēcier ne pouuoit aspirer à aucun office plus honorable. C'estoit fermer la porte à la vertu & industrie. Il vaut bien mieux laisser ceste eslection libre aux ieunes hommes, afin qu'ils s'addonnent à un exercice, où leur naturel & capacité les portera, sous le bon plaisir toutesfois du Prince, duquel ils doiuent estre authorisez pour exercer quelque vacation. Car si tous vouloient estre d'une condition, le public y seroit notablement interessé. Occasion pourquoy il est besoing d'apporter un reglement en cecy, afin qu'en une ville il se trouue toute sorte d'estats suffisamment, & que les uns ne se multiplient excessiuelement au preiudice de la Republique. Car il n'est pas à propos que les subiects soiēt tous soldats pour les inconueniens qui en peuent arriuer, qui furent bien preueus par le Roy François, lors qu'il cassa les legionnaires. Il n'est pas aussi expedient d'auoir tant de iuges, Prestres, Religieux, Procureurs, Aduocats, praticiens, & Sergens, dont la grande multitude affoi-



blit les Royaumes. Il est besoing que tous ces gens-là soient reduits a vn certain nombre, & conuenable à l'estenduë de leur ville ou prouince. A quoy les censeurs pourront facilement pourueoir, puis qu'ils ont la charge de faire le denôbrement du peuple & d'enregistrer les noms & qualitez d'vn chacun. Quant aux Gentils-hommes on n'en peut pas regler le nombre, attendu qu'il depēd de la fortune des familles nobles. Il suffira de les retenir en leur deuoir par l'apprehension d'vne infamie, au cas qu'ils cōmettent quelque indignité, & les soubmettre à la censure comme les autres en ce qui touche le reglement des mœurs. Et pour le regard des laboureurs, artisans manœuvres, & generalement de tous marchands trafiquans par mer ou par terre, la grandeur & le profit des estats depend, d'eux totalement, de maniere qu'on ne doit pas en craindre la multitude. Seulement il faut prendre garde qu'ils n'entreprēnent les vns sur les autres, & qu'vn chacun se contienne es bornes de son mestier, pour euitier cōfusion & discorde. Voila les moyens

d'entretenir la paix particulieremēt en chaque monarchie. Il y en a d'autres plus vniuersels, qui concernent la bonne intelligence de tous les Souuerains respectiuemēt l'vn avec l'autre, dont le premier & le plus important est, qu'ils se contentent des limites de leur seigneurie, qui leur seront prescripts par la generale assemblee, de laquelle nous auons parlé. Ce poinct estant gaigné il faudra aduiser à ce que les particuliers de diuerses nations se puissent hanter & trafiquer ensemble en assurance, & que s'il suruient quelque procez ou dispute entr'eux, que le magistrat du lieu les accorde promptement sans faueur ny acception de personne. Car puis qu'il s'agit d'une paix vniuerselle, il faut rendre la iustice aux estrangers, & ne permettre point qu'ils soient offensez en aucune sorte par les originaires du pays, quand ils y viendront pour leurs affaires ou mesmes pour leur plaisir. Les Romains auoient vn preteur destiné pour iuger les causes des estrangers. Il sera bon de faire le mesme en chaque ville & bourgade, ou les estrangers sont souuuent esfois

pillez & outragez impunément par la conniuece des magistrats, qui n'en font aucune raison. Et neâtmoins l'injure faicte à des particuliers cause aucunes fois des guerres publiques. Les Suisses se banderent contre le Duc de Bourgongne pour venger le tort faict à vn de leurs Bourgeois à qui on auoit volé vne chartee de peaux de moutó. Or la paix vniuerselle estant establie il n'y a aucune doubte que plusieurs mauuais garnimens s'efforceront de la troubler par toute sorte d'artifices, & pour accomplir leur desseing feront mil indignitez aux marchands forains, & les attaquerront en leurs personnes, ou en leurs biens, afin de les estranger & rompre la communication mutuelle, qui est le seul lien d'amitié & d'alliance. Partant il sera necessaire de peur qu'on ne soit contrainct d'vser de represailles, qui ne font qu'alterer la paix, que chaque Prince prenne en sa sauuegarde les estrangers à l'encontre de ses subiects, au cas qu'ils soient par eux molestez. Je dis à l'encontre de ses subiects, car il n'est pas licite de prester secours à vn homme reuolté contre son

son Souuerain. En quoy le Roy François premier fut mal conseillé, quand il receut Robert de la Marche contre Charles cinquiesme Empereur, & pour reparer la faute, quelques annees apres d'un cœur trop magnanime il refusa les offres tres-aduantageuses des Gantois, qui imploroient son secours contre ledit Prince. Et toutesfois il auoit plus d'occasion de prendre le faict & cause de ces peuples, comme de ceux qui estoient ses naturels subiects, & qui d'ancienneté releuoient de la France. Le Roy Loys vnzieme auoit faict la mesme faute de receuoir les Liegeois en sa protection. C'est pourquoy es traictez de paix on met ordinairement ceste clause, que les Princes alliez ne receuront point les subiects l'un de l'autre si, ceux qui se veulent refugier n'ont le consentement de leur Souuerain. Ce qui estoit pratiqué par les peuples confederez de Rome, qui stipuloient expressement, que leurs bourgeois ne seroient point faits citoyens Romains sans leur permission. Aussi nos Annalistes rapportent, que par l'accord faict entre ces deux Roys de

Frâce Gontran & Childebert, il fut dit qu'aucun d'eux ne solliciteroit, & ne retireroit par deuers soy les subiects de son cōpagnon. Vn semblable article se trouue aux traittez d'alliance entre les Roys de Frâce & les Suysses: car la grandeur des Princes consiste principalement en la multitude des vassaux & subiects, & partāt ne faut permettre qu'ils se desbandent, & changent de domicile selon leur volonte: encore moins leur doit-on permettre ceste liberte, quand ils ont desobligé leur Souuerain par quelque meschâceté ou desseruite. Au demeurant, nous cherchons vne paix, qui ne soit point fourree, ny pour durer trois iours, mais qui soit volontaire, égale, & permanente: vne paix qui rende à vn chaeun ce qui luy appartient, le priuilege au citoyen, l'hospitalité a l'estranger, & à tous indifferemment la liberte de voyage & negotiation. Car les Lacedemo-niens auoient tort de chasser les estrangers de leur ville. La coustume des Leucaniens est biē plus honnestre, qui condamnoient à l'amende celui qui auoit le soir refusé son logis à vn



pelerin. Les Atheniens, Candiots, Romains, & tous les braues peuples ont esté hospitaliers, recognoissans que l'homme est vn animal de société, qui doit accommoder ses voisins de ce qu'il a, & reciproquement aussi recevoir d'eux vne pareille courtoisie.

Or, d'autant que le commerce & communication des peuples s'entretiēt par le moyen de la monnoye, qui va de part & d'autre, il est besoin de regler le prix, le poids, & la loy d'icelle, avec resolution de ne rien innouer en ces choses, pour quelque pretexte que ce soit: car s'il y a de l'incertitude au cours ou en la qualité de la monnoye, les contractz seront incertains, & personne ne sera *irroy g's* jamais asseuré de ce qu'il aura. Le Prince ne doit alterer à sō plaisir le pied d'vne mesme monnoye, autrement il feroit tort aux autres, & ne trouueroit aucū qui voulut traiter avec luy. Or en cecy il y a deux abus, qui sont conioints, à sauoir l'affoiblissement & changemēt de prix de la monnoye. Et tout ce mal vient du meslange de ces 3. metaux, or, argēt, & cuiure, pource que depuis qu'on les a mellé és ouurages d'orfeures &

statuaires, on a fait le mesme aussi es monnoyes: en quoy les vns ont esté plus religieux que les autres & ont moins alteré & sophistiqué l'or & l'argent, en faisant tous les deux de plus haute loy que leurs voisins. Dont il ne se faut pas estonner, attendu qu'en vn mesme pays la loy se change. Car on sçait que les solds qui ont cours maintenant en France n'approchent pas de la bonté de ceux du temps de saint Loys, & ceux de ce temps n'ont pas la loy des quarts d'escu & pieces de vingt sols. Ce qui cause le rehaussement des fortes monnoyes, lesquelles sont attirées finement par les marchands estrangers & regnicoles, qui les refondent pour en faire d'autres plus foibles, & les bailler en payement au peuple, qui reçoit du billon pour bon argent, ne sçachant discerner l'un d'avec l'autre. Puis il est tout estonné de voir son billon descrié, & les pieces de bonne mise si haussées pour la rareté d'icelles, que celuy qui pensoit auoir en sa bourse la quatriesme partie d'un escu, n'en a pas la vingtiesme. Cecy apporte plus de preiudice aux François qu'aux au-

tres nations. Car si au lieu d'augmenter ils rabaissoient le prix de l'or & de l'argent, les estrangers qui ont ces deux metaux à commandement seroient contraincts d'en apporter en ce royaume, pour achepter bien cherement les marchandises dont ils ne se peuuent passer, comme bleds, vins, sel, & pastel. Mais elles ne leur coustēt gueres, *car ils en ont en abondance* pource que leur or est trop estimé parmy nous, & d'auantage pour faire mieux leur profit, ils nous apportent des perles, des soyes, des parfums, & autres bagatelles qu'ils nous donnent en cōtr'eschāge des choses necessaires, ou les vendent au poids de l'or. Nous auons veu le marc d'or encheri de trente huit liures en l'espace de douze ans en pleine paix & à compter depuis l'annee mil cinq cens soixante & dix-sept iusques à mil six cēs deux il a haussé de cinquante six liures six solds & demy. Je sçay que la necessité des affaires peut couvrir ceste faute, comme du regne de Charles septiesme l'an mil quatre cens vingt deux, le marc d'or s'exposa pour deux mil huit cens quarante sept liures, & l'escu vallut ius-

ques à quarante liures : & le marc d'argent s'exposa pour trois cens soixante liures. Mais le malheur du temps cau-  
soit vn tel desordre, lequel estant cessé  
on remist ces metaux à leur estimatiō  
ordinaire, chacun recognoissant que  
l'augmentation de leur prix estoit la  
diminution des richesses tāt en gene-  
ral, qu'en particulier. Car celuy qui auoit  
presté cent escus d'or au mois d'Aoust  
mil six cens deux, s'il a eu patience  
iusques à l'an mil six cens quatorze, il  
n'en reçoit que quatrevingt en sem-  
blables especes, à cause du rehausse-  
ment. Il est vray qu'il n'y a point d'in-  
terest, pourueu que le rehaussement  
tienne, qu'il soit semblable par tout, &  
que les marchandises n'en deuiennent  
point plus cheres, comme il arriue or-  
dinairement. Iacoit qu'un certain per-  
sonnage aye soustenu par vn liure pu-  
blié sur ce subiect, qu'il y a beaucoup à  
perdre sur vne piece d'or & d'argent,  
encore qu'on la mette pour le mes-  
me prix qu'on l'a receuë. Ce qu'il  
prouue en ceste façon. *Le Bourgeois*  
*qui du temps du Roy Iean auoit trente*  
*six liures de rente fonciere ou constituée,*

pour payement de sadiete rente auoit trente six francs d'or à pied ou à cheual , à raison de Vingt solds piece qu'ils Valoient lors , ou monnoye d'argent à l'equipollent. Pour lesquels trente six francs d'or , il pouuoit auoir neuf muids de Vin à raison de quatre liures dudit temps , qui estoient quatre francs d'or Valans douze liures de present. Si ce Bourgeois est maintenant payé de sadiete rente en ladiete monnoye de francs d'or , il n'en receura que douze , Valans à raison de soixante sols piece , comme ils se mettent à present , ladiete somme de trente six liures : pour lesquels douze francs d'or il n'aura pour le iourd'huy , que trois muids de Vin , à raison de douze liures que chaque muid vaut à present , au lieu que lors il en auoit neuf muids. Il perd donc six muids de Vin sur ces douze francs d'or , encore qu'il les ait mis pour le mesme prix de soixante solds, qu'il les a receus. Le gentilhomme ou autre de quelque estat qu'il soit qui au tēps de S. Loys auoit seize liures de cens ou rente , pour luy payer ceste rente , on luy bailloit cinq marcs d'argent fin , ou monnoye d'or à l'equipollent. Car au marc d'argent fin n'y



auoit lors que la quantité de soixante quatre pieces appellees solds ou gros tournois. Maintenant pour luy payer ceste rente, on ne luy baille qu'un marc d'argent fin, qui n'est que la cinquiesme partie de l'argent contenu aux premieres seize liures. En ce temps là on auoit pour seize liures seize aulnes de drap à raison de vingt solds l'aulne, aussi bon ou meilleur que celui qui à present coste cent solds tournois. Maintenant pour seize liures on n'a que trois aulnes un cinquiesme de drap à cent solds l'aulne, au lieu qu'on en auoit seize le temps passé, qui est perte de douze aulnes, quatre cinquiesmes de drap sur seize liures, combien qu'on aye mis chacaneliure pour pareil prix de vingt solds qu'elle a esté receüe. Si nous le prenons au sold ou douzain, nous trouuerons le semblable. Car pour dix solds que le gentilhomme receuoit anciennement de ses rentes ou censives, contenant autant d'argent fin que les cinquante de maintenant, il pouuoit auoir cinq chappons, à raison de deux solds piece. Maintenant pour dix solds il n'a qu'un chappon, qui est perte sur dix solds de quatre chappons, combien qu'il aye mis lesdits solds pour douze deniers chacun, qui est le mesme prix qu'il les a receus. C'est la demonstration dudit sieur, laquelle il ad-

iouste à vn autre Paradoxe, à sçauoir, que rien n'est encheri en France depuis trois cens ans. On ne se peut plaindre, dit-il, qu'une chose soit encherie depuis trois cēs ans, sinon que pour l'achepter il faille auourd'huy bailler plus d'or ou d'argēt, que le temps passé. Or est-il que pour l'achept de toutes choses on ne baille point maintenant plus d'or n'y d'argēt qu'on y bailloit alors: car du temps de Philippe de Valois qui commença à regner l'an mil trois cens vingt huiēt l'aune de velours coustoit quatre escus aussi bons voire meilleurs en poix & valeur que nos escus au soleil de maintenant, & chaque escu ne valoit que vingt sols monnoye d'argent, auourd'huy que l'escu vaut cinquante solds & que l'aune de velours est vèdue dix liures, neantmoins pour payer ces dix liures, il ne faut que ladiēte somme de quatre escus à raison de cinquante sols piece, comme ils sont par l'ordonnance, ou monnoye d'argent à la valeur. Donques l'aune de velours n'est point plus chere qu'elle estoit alors. Voila sa raison, mais elle est sophistique, & n'a que l'apparence, car la premiere proposition laquelle il suppose comme indubitable, & que Bodin mesmes luy accorde inconsiderement, est fausse. D'autant que les

choses ne s'acheptent seulement par or & argent, mais par le cuiure, qui fait vne troisieme espece de monnoye de moindre valeur, & neantmoins qui regle le prix de toutes les autres. comme l'asse d'airain mesuroit à Rome le sesterce, & le denier, & autres plus grosses monnoyes, pource qu'un sesterce valoit deux asses & demy, vn denier d'argent en valoit dix, & ceste derniere monnoye estant haussée, elle fut estimée seize asses: car en faict de poids, mesures, & monnoyes, ce qui est le plus petit est la reigle du plus grand. Cela estant, ie dis que la bonté des monnoyes ne gist qu'en leur estimation, de maniere que celle-cy estant augmentee, leur bonté pareillement s'augmente, & par consequent l'escu d'or quand il ne vaut que vingt solds, c'est à dire deux cens quarante deniers, n'est pas si bon que lors qu'il vaut soixante solds, ou sept cens vingt deniers, pource que sa valeur se doit mesurer aux petites monnoyes, & l'or & l'argent ne valent qu'autât qu'il plaist au Prince & au peuple, tellement qu'en Lacedemone lors que la mon-

noye de fer fut en vſage ces deux metaux eſtoient ſuperflus, & aujourd'huy en Ethiopie où la monnoye de ſel a cours, l'or eſt inutile, pour le commerce, & l'airain dont nous parlons eſtoit plus precieux que l'or parmy certains peuples orientaux ſelon le rapport de Iosephe. C'eſt donc mal conclu de dire que le velours ne couſte pas plus cher que iadis, pource qu'on ne baille que quatre eſcus en or comme on faiſoit il y a trois cens ans: car ces eſcus qu'on baille maintenant, quand bien ce ſeroient les meſmes eſpeces du temps paſſé, ſont de meilleure miſe, & de plus haut prix qu'ils n'eſtoient, attendu qu'ils valent d'auantage de menuë monnoye. Et ſi les ſolds d'argent fin que fit forger ſainct Louys, eſtoient encore en eſtre, ils vaudroient trois ou quatre fois plus qu'ils ne valoient en leur commencement, pour ce qu'alors ils ne ſe mettoient que pour douze deniers, & maintenant d'un de ces ſolds là, on en feroit trois ou quatre, qui vaudroient autant chacun. Comme lors que les Romains diminuerent les poids

de leur asse, en luy gardant son estimation accoustumee, & que d'un ils en firent six, ceux qui auoient le vieil asse pesât vne liure, estoient plus riches cinq fois qu'auparauant, & s'ils deuoient quatre asses, ils ne pouuoient sans se faire tort les rendre en mesme espeece à leurs creanciers, & ceux-cy ne les pouuoient recevoir sans vsure, à cause du prix que nouvellement le peuple leur auoit baillé, lequel prix est la vraye & essentielle bonté de la monnoye. D'où nous pouuons inferer l'absurdité de la premiere proposition du mesme auteur, quand il dit, que celuy qui auoit de rente trente six francs d'or ne les reçoit pas aujourd'huy. Car encore qu'il ne les reçoie en matiere, il les reçoit en estimation, qui est equualète. Que si pour douze escus, il ne peut auoir comme autresfois neuf muids de vin, cela nevient pas de l'augmentation du prix de l'or, attendu qu'il ne s'ensuit pas necessairement que les marchandises encherissent pour le rehaussemēt des monnoyes. Il y a bien d'autres causes d'encherissement. à sçauoir, le luxe, l'abondance d'or & d'argent, & les



monopoles. Au surplus ledit personnage s'embarasse en les cōceptions: car d'un costé il nie l'encherissement, & d'ailleurs il en dōne des exemples, qui est vne manifeste contradiction. Ce que i'ay voulu représenter en passant, pour supplier le defaut de Bodin, qui n'a pas donné la solution de ces raisons, & s'est contenté de les mettre en avant, sans y respondre directement. Je confesse toutesfois que le surhaussement des monnoyes est preiudiciable pour les raisons susdictes, & qu'il est necessaire que les Princes d'un commun consentement reduisent les monnoyes à un mesme pied, afin que chacun puisse cōtracter par tout sans dōmage. Surquoy on a donné plusieurs aduis qui meriteroient d'estre pratiquez. Premièrement on conseille de donner en tout pays un mesme prix au marc d'or, & d'eualuer douze liures d'argēt à vne liure d'or. Laquelle proportion a esté anciennement, & est encore ou à peu près gardee en la plus grande partie du monde, de façon qu'un Roy des Indes du temps d'Auguste s'emerueillla de voir que ses subiects s'accordoient en ceste police avec les romains.

Secondement on est d'aduis de deffendre le billon , comme ont desia faict quelques Roys , pource qu'il donne occasion de falsifier ou affoiblir les monnoyes, & d'auantage il n'est iamais esgal, de maniere que les hommes qui entendent le pair , amassent le plus qu'ils peuuent de bonnes monnoyes pout en faire de pires à leur profit & à la perte incroyable du peuple: ce qu'ils ne feroient pas, si les monnoyes estoient d'or & argent pur: car quand vn metal simple est suppose pour vn autre, la couleur, le poids, le volume, le son, & autres proprietiez descourent facilement la trôperie, mais il est mal aisé de cognoistre la qualuë & valeur du billon qui est si diuerse & inegale. Occasion pourquoy il est expedient de defendre generalement le meslange des metaux, & particulierement aux monnoyeurs, ioyauliers, & orfeures, sur peine de la vie, afin que tous leurs ouurages soient de metaux simples, & que les fraudes qui s'y pourroient cōmetre soient aisees à descourir. Toutesfois pource qu'il est impossible, d'affiner l'or & l'argent parfaictement, sans deschet, &

grande despence, on doit suivant les anciennes ordonnances de ce Royaume mettre l'or en ouvrage & en monnoye à vingt & trois carats, & l'argēt à vnze deniers douze grains de fin. Ce faisant la proportiō sera gardee de l'or à l'argēt, attēdu que la mixtion en l'vn & l'autre sera esgale, tellement qu'en tous ouurages d'or, ou d'argent il n'y aura que la vingt quatriesme partie d'autre metal, & ainsi on changera sās aucune perte l'or avec l'argent, en prenant douze liures d'argēt pour vne liure d'or suivant la precedēte police, pour ce que l'vn & l'autre seront esgallement affinez. Car de faire ces deux metaux plus foibles, comme on fait aujourd'huy, c'est donner beau ieu aux trompeurs pour falsifier les monnoyes. Et n'est pas moins dangereux de permettre qu'ils soient d'vne loy inegale en diuerses prouinces, d'autāt que les plus fortes monnoyes qui ont cours en vn pays, sont recueillies finement par les bons mesnagers qui les cōuertissent en piēces plus foibles qui sōt de mise en vn autre pays, & souuentefois les orfeures & affineurs en fōtleurs.

ouurages , afin d'auoir par deuers eux toute la pureté de l'or & de l'argent; le billon demeurant au peuple. Ces deux inconueniēts sont assez cogneus, notamment le premier. Pource que les reaux de Castille à cause de leur bonté ont esté conuertis par plusieurs Souuerains en monnoyes de leurs pays, & en cela ils ont fait vn grand profit. Les Suisses en ont fait de mesme des testōs de France, dont ils ont forgé des testōs à leur pied, qui estoient plus foibles de loy & de poids que les nostres. Car les Princes ne se contentent d'affoiblir la loy de leurs monnoyes, ils diminuent aussi le poids d'icelles, sans rien amoindrir de leur estimation. L'escu sold qui iadis pesoit quatre deniers, fut reduict sous le regne de François premier à deux deniers seize grains, & sous Charles neufiesme fut encore diminue de son poids. Les autres souuerains n'ont pas esté plus consciencieux pour ce regard, attendu que les escus d'Hespagne sous Charles cinquiesme furent affoiblis de trois grains: & à son exemple il en fut forgé en toutes les Seigneuries d'Italie, qui n'auoient que deux

deux deniers seize grains de poids, & vingt deux carats de fin au plus. Et ne faut doubter que tant plus on ira en auant, la necessité des guerres, le luxe, & la prodigalité ne contraignent les Princes d'affoiblir de plus en plus les monnoyes s'ils ne s'accordent entre eux d'en forger à mesme loy & à mesme poids. Quant à la loy, il est aysé de l'establir esgale suiuant ce qui a este dit. Pour le poids il y a plus de difficulté, à cause de la diuersité d'iceluy, qui est telle, que malay sément on peut trouuer deux monarchies qui se seruent d'un semblable poids, & mesmes en vn seul Royaume, comme en France on voit beaucoup de villes dont les poids ont vne difference notable: principalement la liure de monnoye & orfeurie qu'on appelle marc d'or ou d'argent. Car encore que ce marc contienne par tout huit onces, il est pourtant fort diuersifié, pource que les onces sont plus fortes, en vn lieu qu'en vn autre: comme à Geneue sept onces en valent presque huit de celles de Paris, Et au contraire il ne faut gueres plus de cinq onces Parisiennes, pour peser



autant que le marc de Piedmont, Milan & Gennes. Ce qui apporte vne grande incommodité au trafic, & donne occasion aux marchands rusez, d'affronter les estrangers en leur faisant accroire ce qu'ils veulent du poids d'ot ils ne sçauent la valeur. Et quelque preuoyance qu'apportent les Roys, ils ne pourront iamais empescher les pipeurs d'achepter au poids fort, & de vendre au poids foible, tandis qu'une telle diuersité aura lieu dans l'enclos de leur estat, ou de celuy de leurs voisins & autres avec lesquels ils ont cōmerce. C'est pourquoy il est besoin qu'ils cōsentent tous à vn reglement general, par lequel non seulement l'or & l'argent, mais aussi les marchandises soiēt vendues à vn poids egal en tout pays. Ce qui ne sera mal aysé à faire, la nature en cecy nous seruant de guide, les ceuures de laquelle à sçauoir les grains seruent pour regler les poids & les mesures. Quant à celles-cy, anciennemēt on prenoit la lieue pour deux milles, le mille pour huiēt stades, le stade pour cent vingt cinq pas, le pas pour 5. pieds, le pied pour quatre palmes, le palme

pour quatre doigts , & vn doigt pour quatre grains. En matiere de poids on vient pareillement au grain , comme à la regle de tous les autres. Le marc contient huiſt onces, l'once vaut huiſt drachmes ou gros , qui valent autant que vingt quatre deniers , chaque gros valât trois deniers, & le denier peze vingt quatre grains. Laquelle regle eſt aujourd'huy gardee en pluſieurs Royaumes , & l'eſtoit iadis en Grece, comme veritablement elle eſt fort propre à la negotiation. Ainſi l'once peze cinq cens ſoixante & ſeize grains, le marc quatre mil ſix cens huiſt , & la liure marchande en peze vne fois autant. Sans doubte ſi ce reglemēt eſtoit receu par tous les peuples, le commerce ſeroit bien plus facile. Toutesfois il y a vne choſe qui ſemble empeschier ou diminuer ſon vtilité , aſſçauoir la difference des grains en la peſanteur; d'autant qu'il y en a qui peſent plus en vn lieu qu'en l'autre , au moyen dequoy on ne peut éгалer les marcs & les onces des pays differens , puisque leur meſure eſt changeante & inégale , ſi ce n'eſt que

tous les Souuerains s'accordent de mesurer tous leurs poids selon les grains d'un certain païs tel qu'ils choisiront d'un commun consentement, afin que le qualibre & pesanteur du grain estant stable, les autres poids qui s'y rapportent, ayent aussi vne certitude qui ne puisse estre reuoquee endoute: Que si chaque Souuerain veut auoir son poids à part, ou pour tenir sa grandeur, ou pour la difficulté qu'il y a de le changer, en ce cas il faudra estimer le marc d'or & d'argent selon sa pesanteur. Car estans reduicts à vne mesme loy, à sçauoir l'or à vingt trois carats, l'argent à onze deniers douze grains de fin, comme nous auons dit, & en outre gardant la proportion duodecuple entre ces metaux, suivant l'ancienne coustume, il ne restera plus que de considerer leur quantité, & de leur donner le prix & proportion d'icelle, en telle sorte que le marc qui aura ses quatre mil six cēs huit grains plus pesans qu'un autre, sera aussi plus prisé selon l'excez de sa pesanteur. Mais d'autant que cest excez ne peut estre liquidé sinon par vne mesure commune, il est

plus à propos de pratiquer le reglemēt cy dessus mētionné. Car on fera tousiours accroire à vn estrangier que son poids n'est pas meilleur que celuy du pays où il trafique, encore qu'il excède d'une once ou de plus, que s'il conteste, il trouuera vne infinité de tēmoins contre luy, & faudra faire de deux choses l'une, ou se laisser trôper, ou retourner en sa maison sans rien faire. Ce qui est capable de rôpre le cours du trafic, lequel ne se peut bien entretenir que par l'egalité des poids & mesures. Encore celles-cy ne sont pas si necessaires, & quelques peuples ne s'en seruent point, comme les Chinois, qui ont accoustumé de peser tout, mesmes le linge, estimans que les trompēries sont plus faciles, & ordinaires aux mesures, de quoy il ne faut nullemēt douter, pourueu qu'il n'y ait qu'une sorte de poids: ou s'il y en a plusieurs, à tout le moins que leur difference soit publiée & leur proportion recogneuë, afin d'euiter les supercheries, qui autrement seroient ineuitables. Et le reglement doibt auoir lieu notamēt au poids de l'or & de l'argent, où les frau-

des sont d'autât plus à craindre qu'elles sont lucratiues. Je dis d'œc pour retourner propos , qu'on doit asseurer non seulement la loy, mais aussi le poids des monnoyes, & à cest effect limiter le nombre des pieces qui seront faictes en vn marc d'or ou d'argēt, de mesme poids, nom & valeur. Et de ces monnoyes égales on en pourra faire huit, seize, trente deux, & soixante quatre pieces au marc, ou plus s'il est besoing, les multipliant par proportion, en telle maniere toutesfois que leur petitesse ne leur cause vne trop grande fragilité. Par ce moyen les plus grosses monnoyes dont les huit seront le marc, peseront chacune vne once, les seize, demy once, les trente deux aurōt deux gros de poids, & les soixante quatre peseront chacune vn gros. Alors le change de l'or en argent sera bien ayse non seulement en masse & hors d'œuure, mais en monnoye. Car pour vne piece d'or on en baillera douze d'argēt de mesme poids. Lequel reglemēt aura lieu tant parmy les compatriotes que parmy les estrangers, d'autant que le pied des monnoyes estant par tout



égal, il ne restera aucun subiect de les rehausser en vn pays plus qu'en l'autre, si ce n'est que les Princes veulent troubler cest ordre pour les droicts de seigneuriage traitte & brassage, qu'ils prennent sur les monoyes forgees en leurs terres: ce qu'ils ne doiuent faire qu'avec toute moderation, & ne point rât son-ger à leur profit particulier, qu'au general, à leur reputation, & à l'exemple des autres Souuerains, avec lesquels ils se doiuent pareillemēt accorder pour le reglement de tels droicts. Apres cela, pour obuier aux falsifications & rongeures des monoyes, il sera expediēt de les faire au moule, à la façon des anciennes medalles, pource que le moule feroit toutes les pieces qui auroient mesme nom & valeur, égales en largeur, grosseur, poids & rotondité, lesquelles choses le faux monnoyeur ne pourroit si bien contrefaire que son imposture ne fut descouuerte, d'autant que le cuiure qu'il supposeroit au lieu d'or ou d'argent, est de plus grand volume en poids esgal, que ces deux metaux, estant beaucoup plus leger, & ainsi vn escu faux seroit aysé à recognoistre.

en le confrontant avec vn autre qui seroit de bonne mise. Maintenant on a des moulins à forger monnoyes qui peuuent bien seruir à cest effect, dont le premier fut dressé à Paris dès l'an mil cinq cens cens cinquante trois. Quoy que plusieurs n'en approuuent point l'usage, si est-ce qu'il peut apporter plus de profit que d'inconuenient, & on a veu fort peu de pieces au moulin falsifiees, ou rongnees, les faulxaires craignans d'estre descouuers par le moyen que nous venons de représenter, c'est à dire par la controntration de la monnoye faulxe avec la legitime pour le regard du volume & du poids. Car les pieces de mesme titre & loy se feront tousiours égales au moulin qui escache, au compoir qui coupe, & à la presse qui serre tousiours egalemēt ce qui ne se peut faire au marteau, n'estant pas conduit ny manié par forces ou mesures semblables. Ceste inegalité sert de pretexte aux faux monnoyeurs & rongneurs, qui ne craignent rien tāt que de voir les monnoyes reduictes à vne egalité de forme, poids, & volume, & autant que cela leur oste tous

moyens de desguiser leur artifice. Et pour les trauerser encore dauantage, il faudroit renouueller l'ordonnance de Charlemagne, par laquelle il defendit de forger monnoye ailleurs qu'en son Palais. Bien que son empire fut de grande estenduë, neantmoins il ne destinoit qu'un lieu à vn tel affaire. Aussi en vne monarchie il suffira de choisir pour la forge des monnoyes vne ville ou deux tout au plus, afin de retrancher les occasions de mal faire aux hommes cauteleux. Mais le principal remede c'est d'abolir le billon, qui est tousiours inegal & incertain, & partant n'est pas propre pour entretenir la proportion de l'or à l'argent, ny pour le change de ces metaux. Ce qu'on a recogneu en France, lors qu'on affoiblit les douzains, dont les soixante payoient l'escu, iagoit que leur fin ne valust pas cinquante trois solds. Pour ceste mesme consideration ie conseilerois aussi de descrire la monnoye de cuiure, pour ce qu'on a forgé n'aguères des doubles & deniers, qui ne payoient pas la bonté de l'escu, encore qu'on en baillast pour neuf liures quin;

ze solds, selon l'estimation commune. Qui est vne perte incroyable pour le menu peuple, & aussi pour les marguilliers, mendiens, & hospitaux, qui ne reçoivent autre chose. Il vaudroit d'oc mieux pour l'accomplissement de ceste police reduire toutes les monnoyes à deux especes comme on a faict en quelques Royaumes, & d'un marc d'argent faire autant de petites pieces qu'on pourroit, qui tiendroient la place des doubles & deniers de cuiure, pour s'en seruir pour les aumosnes, & achapt des plusviles marchandises. Il ne seroit pas necessaire de forger heict mil pieces au marc à la façon de Lorraine. Ce seroit assez d'en faire deux mil, afin qu'elles fussent plus fermes & plus aysees à garder. Que si on ne veut bannir la monnoye de cuiure, comme devray il est difficile de s'en passer, pour le moins qu'elle soit pure, & sans mistion d'autre metal, & qu'on luy donne vn prix permanent, non pas variable, comme il fut iadis en la ville de Rome, où le denier d'argent qui selon l'opinion de plusieurs pesoit autant que

la drachme ou gros de nostre temps, valoit dix asles, c'est à dire dix liures d'airain, la liure alors estant de douze onces : tellement qu'une liure d'argët en valoit neuf cens soixante d'airain, & au bout de quelque temps on diminua tellement le poids de l'asle, que d'un on en fit vingt quatre, du poids de demi once chacun, qui auoient la mesme estimation que lors qu'ils pesoient vne liure. Et toutesfois la moindre monnoye doit auoir vn prix arresté, pource que c'est la regle & mesure des autres. Il faut donc ou deffendre totalement l'usage de cuire pour la monnoye, ou luy donner vn certain prix qui demeure à iamais, aussi bien que celui d'or & d'argent, afin que chacun soit asseuré de ce qu'il aura vallant. Or quant au billon, ie scay qu'on ne le peut descrier sans faire tort au peuple, qui perdra beaucoup si on reduict les monnoyes à la loy cy dessus mentionnee : mais aussi il sera asseuré d'auoir à l'aduenir de bonnes monnoyes,



& n'aura point occasion d'apprehender vn rehaussement ou descry d'icelles, comme il arriue trop souuent. Et la perte qu'il peut souffrir en ceste police ne sera iamais si grande, que l'vtilité de la paix generale: ioinct que le Monarque peut d'ailleurs recompenser son peuple & preuenir le mescontentement causé d'une telle nouueauté, en rabbaissant les tailles, & en faisant distribuer gratuitement du bled ou autres viures, aux plus necessiteux, afin qu'ils portent patiemment le descry de leur billon, dont eux & leur posterité receuront finalement le fruit. En somme il ne faut craindre d'entreprendre vne chose qui est necessaire, & facile à executer, pourueu que la paix soit vniuerselle. Mais pour bien commencer cest affaire, il faudroit qu'un puissant Prince exhortast tous les autres à suivre le reglement susdict, afin que les passages estans libres & le commerce estant ouuert par le moyen de la paix, on puisse trafiquer par tout sans domage. Il n'y a personne qui soit plus capable de cela que le Pape. C'est son deuoir de moyenner vne concor-

de generale entre les Princes Chrestiens. Et pour le regard des Mahometans , qui font vne notable partie du monde , le Roy de France pour le credit & reputation qu'il a parmy eux , pourra plus aysement les faire condescendre à la paix. Car l'Empereur , les Roys d'Hespagne , de Pologne , de Perse, & d'Æthiopie, feroiēt peut-estre quelque difficulté d'enuoyer sur ce subiect leurs Ambassadeurs au grand Seigneur , & craindroient qu'on eust opinion que la crainte qu'ils auroient de sa puissance ne les contraignit de pourchasser la paix. Laquelle consideration n'a point de lieu pour le regard de nostre Roy, d'autant qu'il n'a point d'occasion de redouter l'empereur des Turcs: voila pourquoy il peut honorablement entreprendre cest affaire, attendu mesme l'ancienne alliance qui est entre les deux Royaumes de France & Turquie. Quoy que ce soit, il est bien seant que les Chrestiens parlent de la paix les premiers, quand ce ne seroit que pour auoir la liberté d'aller au saint sepulchre, & eux estās d'accord avec le Turc pourront sans difficulté

obtenir aussi la paix des autres Monarques, qui ne sont assez forts pour résister à deux partis si puissans. Nous lisons que l'Hermite Simonet Camertin accorda François Sforce avec les Venitiens. On a veu depuis quatre vingts ans les deux plus grāds Princes de la chrestienté deux fois reconciliez par l'entremise d'un simple Religieux : A plus forte raison nous devons esperer vne bonne paix, si les Souuerains s'en meslent. Dieu qui manie le cœur des Roys les vueille disposer à vne si sainte entreprise, afin de faire cesser tant de maux, & de ramener ce beau siecle que les anciens Theologiens promettent apres la reuolution de six mille ans. Car ils disent qu'alors le monde viura heureusemēt & en repos: Or est-il que ce terme est tantost expiré, & quand il il ne le seroit pas, il ne tiēt qu'aux Princes de donner par aduance ceste felicité à leurs peuples. Que voulons-nous faire avec ces armes? Viurōs nous tousiours à la façon des bestes? Encore si nous procedions en cecy d'une pareille moderation. Car elles ne se battent

iamais en troupe, & ne se font point la guerre sinon lors que la faim les presse ou quelque autre necessité les pousse. Les hommes forment vne querelle pour peu de chose, quelquesfois de gayeté de cœur ils se mettent en cāpagne, non pour combattre seul à seul, mais dix mille cōtre dix mille, afin d'auoir le passe-temps de voir vn tas de morts, & les ruisseaux de sang humain coulās parmy la plaine. Representons no<sup>9</sup> deux armées prestes à s'entrechoquer, les regards furieux, les faces hideuses des soldats, les menaces, les cris barbares, qui se font d'vne part & d'autre, accompagnez d'vn tōnerre de canōs: puis vne approche & mēlee espouuētable, vne boucherie d'hōmes, les vns desmēbrez, les autres à demi morts qui implorēt la main de leurs compagnōs, & les coniurēt de leur dōner vn coup mortel, afin d'abreger les tourmens de leur miserable & languissante vie: Apres le carnage s'estēd sur les persōnes foibles: les vieillards sōt massacrez, les enfans tuez ou emmenez captifs, les femmes violees, les temples profanez, tout est à l'abādon, & rien ne se

trouue assure que l'iniustice. Et tout cela est ordinairement suiuy de deux autres maux, famine & peste. Car le labourage cessant à l'occasion de la guerre, le peuple n'a de quoy s'alimenter, & est contraint de manger indifferemment toute sorte de viandes, bonnes & mauuaises, lesquelles au lieu de seruir de nourriture engendrent des humeurs corrompues, d'où s'ensuiuent les dyssenteries, & maladies contagieuses. Helas qu'Heraclite auoit raison de deplorer l'auueuglement de l'homme qui se cause luy-mesme tant de miseres! Miseres qui rendent sa condition pire que celle des bestes, de sorte qu'il ne se faut point estonner si Gryllus, apres auoir esté metamorphosé en pourceau, ay-moit mieux demeurer en tel estat, que de retourner en sa premiere figure. Aussi le sage Plotin estoit hôteux d'estre homme, & ne vouloit iamais parler de ses parens ny de sa naissance. Et aujourd'huy qui faiet que nous voyôs tant de Timons & d'hommes solitaires? Si nous disons que ce sont des hypocondriaques, ils pourront dire à bon



bon droict, que nous les faisons deuenir tels. Les meschancetez, vilenies, & cruantez qu'ils voyent tous les iours, sont capables de leur faire hayr le monde, & faudroit estre insensible pour ne s'en esmouuoir. Or quand il n'y auroit autre consideration que la brieueté de nostre vie, & la certitude de la mort, qui nous menace à tous momés, nous deurions auoir honte de nous tant tourmenter pour vn honneur imaginaire, & ferions mieux d'imiter les *Ægyptiens* qui apportoint vn Skelet ou quelque autre representation de mort au milieu d'un banquet, afin de cōuier les assistans à se resiouyr & faire bonne chere tandis qu'ils en auoient l'occasion. Mais il faut viser plus haut & considerer qu'il y a vn Dieu qui punit les pechez des hōmes, sur tout l'arrogance & la cruauté: quittons ces deux vices, & les guerres cesseront. Nous remettrons l'espee au fourreau quand nous aurons pensé à la vanité des opinions, qui nous font prendre les armes. Laissons adorer les glaiues aux *Scythes*: Plustost imitons les *Esseens* qui n'auoient entre eux

aucun armurier : ou bien ces anciens peuples de Catay, qui ne ſçauoient que c'eſtoit de tuer ny de malfaire. Quant à moy ie ne puis en cecy apporter que des vœux & humbles remonſtrances, qui ſeront peut eſtre inutiles. I'en ay voulu neãtmoins laiſſer ce teſmoignage à la poſterité. S'il ne ſert de rien, patience. C'eſt peu de choſe, de perdre du papier, & des paroles. Je proteſteray en ce cas comme Solon d'auoir dit & faiet ce qui m'a eſté poſſible pour le bien public, & quelques vns qui liront ce petit liure, m'en ſçauront gré, & m'honoreront comme i'eſpere de leur ſouuenance.

F I N.

*Fautes ſuruenues à l'Impreſſion.*

Pap. 13. ſous ſubicets. liſez ſes ſubicets.

Pag. 16. ont la façon. liſez à la façon.

Pag. 106. Gaulois. liſez Gantois.



# TABLE DES MATIERES

*contenuës en ce liure.*

## A

- A** Baye iadis  
donnee aux  
seigneurs lai-  
ques, qui en  
portoient le tiltre.  
pag. 146.
- Agésilas ne reco-  
gnoist point le Roy  
de Perse plus grand  
queluy s'il n'est plus  
iuste. 24
- Aigles se prescriuēt  
vn certain espace  
pour chercher leur  
proye. 25
- Alexādre Seuerene  
pouuoit regarder vn  
larron sans nausée.  
90. ne vouloit vendre  
les offices. 134. cere-  
monieux à donner les  
estats. 136
- Alger retraictē des  
Corsaires. 37
- Allemands exercent  
leur ieunesse au bri-  
gandage. 20
- Ambition est aueugle  
98. arme le fils contre  
le pere. ibid.
- Ameriquains par  
leurs diuisions ont  
ouuert leur pays aux  
Hespagnols. 77. trai-

# T A B L E

Êtez comme bestes par leurs Roys. 89	Assemblée generale des Ambassadeurs de tous les Souuerains necessaire pour main- tenir la paix. 60. Ordre requis pour la seance en ladicte assemblée. 63. &c.
Amphictions arbi- tres des differens de la Grece. 72	Atheniens pēsoient que la Lune de leur pays fut meilleure que celle des autres. 52
Andronique Empe- reur punissoit les fau- res de ses officiers ri- goureusement. 91	Auguste borne vo- lontairement son Em- pire. 25. Ses flottes en diuers lieux. 41
Anglois n'estoient que pirates auparauāt qu'ils eussent conque- sté la grand'Bretagne. 75	B
Apicius Æsope & Asinius Celer mai- stres gourmands. 127	<b>B</b> Anquets somp- tueux doiuent estre deffendus. 127
Arbitres doiuent iu- ger les differends des Princes. 18	Basile Macedonien fit rapporter la moitié des dons mal obtenus 153. Sū reglemēt pour l'expedition des pro- cez. 160
'Arnoul Duc de Gueldres fils desnatu- ré. 98	
Arts mechaniques vtils à vn estat. 42.	
Artisans mesprisez mal à propos par Ly- curgue. 44	

## DES MATIERES.

Bestes farouches ennemies natruelles des hommes. 6. Nous surpassent beaucoup en force & valeur. 7

Billon doit estre deffendu. 217

Bodin repris. 66. & 202.

Bordeaux ne doit uent estre tolerez. 125

### C

**C**Alender contre-faisant le deuot trouble la Natolie. 102.

Censure necessaire. 181

Cesar rend le tiltre d'Empereur seigneurial. 66

Charles cinquiesme s'efforce en vain d'exterminer les Protestans. 58

Chasse exercice pro-

pre aux soldats. 26

Childeric & Charles le simple degradez pour leur incapacité. 95

Chinois mariēt leurs enfans de bonne heure. 125

Chrestiens estant d'accord avec les Turcs, on peut facilement auoir la paix vniuerselle. 14. Ils ne se maintiennent pas si bien que les Turcs. ibid.

Colonies auourd'huy sont rares. 4

Comedies tolerables & vtils en vn estat. 177. approuuees par les Theologiens avec modification 178. defenduës à Marseille. 177.

Commerce facilité en ioignant deux riuieres ou deux mers. 34.



# T A B L E

35. 36. & 41.

Corfaires dange-  
reux, & le moyen de  
les ranger. 37. 41

## D

**D**Auid n'ose tou-  
cher à Saül Roy  
fon ennemy. 104

Denombrement des  
personnes & biens  
tres-vrile. 169

Dieu demande plus  
le cœur des hommes  
que les sacrifices. 50. Il  
oste les fceptres &  
transfere quand bon  
luy semble. 78

Doctes hômes iadis  
bié appointez. 138. les  
plus vaillans peuples  
aujourd huy en font  
estat. 140

Domaine engagé doit  
estre racheté. 171

Dons du Prince doi-  
uent estre reglez. 142.

doiuent estre verifiez.  
153

Dragut & Barbe-  
rousse corfaires atti-  
rez par le grand Sei-  
gneur. 40

Druides iugeoient  
les differens des Gau-  
lois. 72

Duchez ancienne-  
ment n'estoient per-  
petuels. 145

Duels en quels cas  
permis. 120. iadis inu-  
litez. 122

## E

**E**Lmahel s'empare  
de Marroc. 102

Empereur Romain  
à plus d'occasion de se  
plaindre qu'un autre  
Prince. 15. Se doit  
pourtant contenter  
de ce qu'il tient. ibid.  
Est souverain. 64. Ce

# DES MATIERES.

nom est rēdu seigneurial par Cesar. 66

Enfans ambitieux qui ont osté la couronne à leurs peres.

98. comment ils doivent estre instruits.

187. Enfans estoient en Egypte & en Sparte du mestier de leur pere. 188

Estrangers doiuent estre garantis d'oppression. 192. Chassez de Sparte, mais chers en Lucanie Athenes & Rome.

94

Exercices propres aux soldats. 26

## F

**F**Aineants dangereux en vn estat.

28. punis en Egypte Athenes & en la Chine. 29. Excitoient

des seditions à Rome.

28. le Prince Hipparque les craignoit. 29.

Fiefs & leur origine. 145

Flateurs pernicieux 87

François cogneus depuis 1400. ans. 75

François premier prend en sa protection Robert de la Marche. 193. refuse celle des Gantois. ibidem.

## G

**G**antois n'ont rié profité contre Charles cinquiesme.

106

Gots ont fait parler d'eux depuis Valentinian. 75. mesprisent les lettres. 139. ont regné peu de temps. 140

# T A B L E

<p>Guerres ne se doi- uent entreprendre te- merairemēt. 84. Diffi- cultez en leur entre- prise. ibid. diminuent la religion au lieu de l'aduancer. 56. Guer- res estrangeres ne viē- nent que de quatre causes. 4. l'honneur est biē engagé aux guer- res. 9. Guerriers sont d'un naturel turbulēt. 21. est plus dange- reux de les trop esti- mer que de les abbais- ser. ibid.</p>	<p>monde. 76 Hommes de trois sortes , à sçauoir les gens de bien, les mes- chans, &amp; les imbecilles 80. hōmes ne se doi- uent reputer estran- gers les vns les autres. 4 Honneur est le plus grand loyer qu'on puisse receuoir. 143. Honneur deferé aux soldats. 4. Vanité de l'honneur des armes reconneuë en fin par ceux qui en font pro- fession. 7 Honneur ne se doit achepter par effusion de sang. 11</p>
--	---

## H

**H** Abits sōptueux  
doiuent estre de-  
fendus. 129

Hespagnols offrent  
leur Royaume au Duc  
de Calabre. 97. avec  
petit nombre con-  
uestent le nouveau

## I

**I** Anissaire ont trop  
de puissance: ruine-  
ront , l'Empire des  
Turcs. 12

## DES MATIERES?

Idolâtres & leurs  
offrandes receuës au  
Temple de Salomon.

51

Jeux de brellan doi-  
uent estre deffendus.

126. Anciennement  
n'estoit permis de  
iouir de bon fin<sup>o</sup> aux  
jeux de luidte & autres  
exercices, ibid.

Iniures & affronts cō-  
ment doiuent estre  
punis.

117

Instruction de ieue-  
nesse est de grande  
importance. 184. les  
censeurs en doiuent  
prendre le soing. ibid.

Quelle instruction il  
faut donner aux en-  
fans.

187

Italie occupee sur  
les Empereurs & diui-  
see en plusieurs prin-  
cipautez.

96

Iuifs perseuerent en  
leurs anciennes cou-

stumes.

50

Iuges choisis à Ro-  
me les plus riches. 135.

Les Empereurs & roys  
ont faict l'office de  
iuges.

162

Iustice vaut mieux  
que vaillance.

5

Iustin second esta-  
blit vn grand Preuost  
auec puissance souue-  
raine pour punir les  
crimes.

92

## L

**L** Abourage est vn  
mestier honora-  
ble.

29

Loix & leur multi-  
tude dōmageable. 161

Loys le debonnaire  
tourmenté & spolié  
par ses enfans.

100

Loys vnziesme préd  
en sa protection les  
Liegeois.

193

Luxe en habits doit

# T A B L E

estre defendu. 129. ioindre deux mers,  
Peuples addonnez qui se peut faire en  
au luxe sont plus en trois façons. 33. Mer  
clins à toute sorte de rouge plus haute que  
vices. 130 l'Egypte, 34. Mer

## M

**M** Agazins de nee se peuuent ioin-  
bled necessai- dre en Languedoc.  
res. 174 35 Armeesur mer cō-

Marchescages d'Ita- tre les Corsaires. 41  
lie & de France. 38. Melchans ne doi-  
doient estre culti- uent estre receus en  
uez. 39 protection par aucun

Marchandise & tra- Prince. 93. ne sont pas  
fic sont honorables. en si grād nombre que  
29. vtils à vn estat. 30 les bons. 79

& 31 Mestiers distribuez

Mariages doiuent par confrairies. 44  
estre recommandez Mithridates ordonne  
pour euitier beaucoup des prix aux meilleurs  
d'inconueniens. 125 biberons. 140

Medecine & les Monarchies vien-  
mathematiques plus nent immediatement  
necessaires que toute de Dien. 15. ne doiuent  
autre science. 46 estre attaquées quand

Mer Ægee & Ioni- elles sont fortifiees  
que. 33. Est expedient d'vne longue posses-  
pour le commerce de sion. 17



## DES MATIERES.

Moyse defend de mesdire des Dieux estrangers. 51

Monnoye doit estre par tout d'une mesme loy & poids.

195. Rehaussement & inegalité d'icelle prejudicie au commerce.

ibid. Rehaussement estrange du marc d'or & d'argent. 197. dom-

mageable aux François. 197. La plus petite monnoye est la me-

sure des grandes. 202. Monnoye de sel en Ethiopie. 203. La bō-

té de la monnoye ne consiste qu'en son estimation. ibid. Regle-

ment necessaire en la monnoye pour la cō-

modité du commerce 105. Moulin pour forger monnoyes. 216

Musique vile. 178.

Peuple d'Arcadie devenu farouche pour

avoir quitté la musique. 179

N Il riuiere d'E-  
gypte. 34

Noblesse de raco-  
merite quelque prefe-  
rence. 135

Numa distribué les  
mestiers par confrai-  
ries. 45

O Dryles s'entamēt  
le corps à coups  
d'espee, quād ils n'ont  
point d'ennemis. 19

Officiers des Princes  
doient estre punis  
quād ils abusēt de leur  
charge. 92 Trop d'of-  
ficiers aux fināces. 171

Office de grand  
Preuost à Rome pou-  
uoit autant que le Cō-  
nestable, grād maistre,  
Chancelier & Capi-  
taine des gardes tous  
ensemble. 113

Q iiii

# T A B L E

Or a telle propor-  
tion à l'argent, que  
douze à vn. 205

Or on refuse l'Em-  
pire. 11

## P

**P**Aix generale ne  
peut abastardir la  
valeur. 25. Ses moyēs  
79. elle entretient les  
Princes en grandeur  
& afferme leur estat. 83  
huiēt choses necessai-  
res pour entretenir la  
paix. 86

Palais doibt estre pa-  
ué de chauffetrappes  
disoit Caton. 159

Pape doibt moyen-  
ner la paix entre les  
Chrestiens. 221

Pauures doiuent  
estre nourris aux des-  
pēs du public 135. leur  
multitude est dange-  
reuse. ibid.

Parthes ayment leurs  
seruiteurs cōme leurs  
enfans. 88

Plaidereaux doiuent  
estre punis. 158

Plotin estoit hon-  
teux d'estre homme.  
224.

Poētes estoient cou-  
ronnez de la main de  
l'Empereur au con-  
cert de poēsie d'Alba.  
144

Poids doit estre es-  
gal par tout. 211

Populas pense que  
tout le monde doibt  
viure comme luy. 52

Preste-Ian tient  
tous les Princes de sa  
race enfermez dans  
vn chasteau. 99

Princes ne prisent  
que les armes. 5. Ne se  
doiuent hazarder à vne  
guerre. 10. Se doiuent  
tenir sur la defensiue.  
13. Se soubmettre vo-

lontairement aux arbitres. 18. Moderer les impôts. 31. Entretenir des vaisseaux sur mer. 41. & 42. se contenter de leur fortune presente. 78. Punir les meschâs. 90. Appointer honorablement leurs parens. 99. ne doiuent donner trop de puissance à vn subiect. 112. Difference entre le Prince legitime & tyran. 88. Princes doiuent distribuer les loyers avec equité & prudence. 131. & 177. Ne doiuent se rendre inaccessibles à leurs subiects. 132. Ne doiuent donner excessiuelement. 136. ny sans l'aduis de leur conseil. 152. Diuersité des dōs qu'il peut faire. 142. Doiuent auoir magazins de bled. 174. augmenter leurs finances par le trafic. 172. Vn estat de leurs finances entre leurs ma<sup>is</sup> & la liste de leurs officiers & seruiteurs. 152. Ne doiuent receuoir les subiects d'autrui sans son consentement. 194. Doiuent s'accorder pour la monnoye. 221. *Monnay* Procez & leur reglement. 160. Procureurs anciennement n'estoiēt permis aux plaidans sinon en cas de necessité. 160.

**Q** Verelleux punissables. 114. Querelle de Varenius & de Pulcio soldats de Cesar honorablement terminee. 123.

# T A B L E

R

**R**ecompenſe des  
merites neceſſai-  
re. 131

Religion giſt prin-  
cipalement en la re-  
cognoiſſance d'un Dieu  
50. Quatre principa-  
les religions. 49. Tou-  
tes tendent à vne meſ-  
me fin. 50. Nouvelles  
religions dès leur  
commencement doi-  
uent eſtre reprimees.  
56. Diuerſité de reli-  
gions ne peut empeſ-  
cher la paix vniuerſel-  
le. 59. Religion eſt plu-  
ſtoſt vn pretexte que  
cauſe de guerre. 4.  
ſoubs couleur de reli-  
gion & pieté les eſtats  
troublez. 102

Republiques ſont en  
fin cōtrainctes d'auoir  
recours à la Monar-  
chie. 107

Riuieres neceſſai-  
res pour le cōmerce. 32

Riuieres d'Almona  
& de Radantia ioin-  
tes par Charlemagne

34. Riuier artificielle  
pour le commerce de  
Bruxelles & d'An-  
uers. 32. Riuieres de  
Tane & de Volga. 35

Roches qui ne ſe  
bougent quand on les  
pouſſe rudement, &  
auec le doigt ſont eſ-  
branlees. 40

Roy de France me-  
rite la preſeance entre  
tous les Roys. 67

Roy d'Heſpagne  
entretient vne armee  
nauale és Indes cōtre  
les pirates. 41

Roys ne tiennent  
que de Dieu. 64. &  
toutesfois cedēt pour  
la ſeance à l'Empereur  
ibid. Roys degradez  
par leur nonchalance  
& imbecillité. 94. Rois  
tyrāniques ne peuuent  
eſtre legitimemēt at-

## DES MATIÈRES.

taquez par leurs ſub-  
iects, 104. Rien ne ſert  
de ſe reuolter contre  
eux, 106. Roys des In-  
des iurent de faire en  
forte que la terre pro-  
duira abondance de  
fruiçts. 175. S

**S**auuages doiuent  
eſtre tenus com-  
me des beſtes. 26

Scacoculis Hermite  
diſſimulé. 102. leue le  
maſque & ſ'empare  
de pluſieurs villes. ibid

Sciences neceſſaires  
à l'eſtat. 46. preſera-  
bles à la vaillance.  
139. n'empêche pas la  
valeur. ibid.

Schytes deſont Cy-  
rus. 84. préſent que les  
ſciences nuſent à la  
generoſité. 139

Secrétaire pour ad-  
uertir le prince de ceux  
qui ſont dignes de ſes  
liberalitez. 133

Sedition puniſſable  
entre tous autres cri-  
mes. 94. Diuerſitez de  
ſedition. 94. Moyens  
de la reprimer. 110. Se-  
dition contre Juſtiniã  
à Byzance. ibid.

Simonet Camertin  
Hermite accorde les  
Venitiens avec Fran-  
çois Sforce. 222

Soldats ſe glorifient  
de peu de choſe. 5. de  
tout temps ont eſté  
plus eſtimez que le re-  
ſte des hommes. 4. Se-  
uere commande à ſes  
enſans de les enrichir.  
ibid. font peu de pro-  
fit en guerre. 13. impa-  
tiens de repos. 19. Ne  
doiuent eſtre trop ho-  
norez. 21. Soldats des  
gardes à Rome maſ-  
ſacroient leurs Em-  
pereurs. ibid. Probe  
Empereur eſt reſo-  
lu de ſe paſſer de



# T A B L E

<p>Soldats. 22. Exercice des soldats Romains en temps de paix. 25. Soldats doiuent estre employez contre les voleurs, pirates, &amp; sauuages. 26. Meritent quelques priuileges. 27. sont necessaires au Prince pour la seureté ib. doiuent estre payez. ibid.</p>	<p>depuis 400. ans. 75 Tybere faict mourir celuy qui auoit inuenté le moyen de rendre le verre malleable. 141 Timars fiefs en Turquie. 146 Timidité empesche beaucoup de belles actions. 80 Trafic est honorable. 29</p>
--	--

Suisses remonstrēt au Duc de Bourgogne qu'il ne gaignera rien en la cōqueste de leur pays. 85. mal traitez par les Lieutenans de l'Empereur. 106. se bandēt contre le Duc de Bourgogne pour le tort faict à vn de leurs Bourgeois. 192

T

**T**Ailles doiuent estre reelles. 169 Tartares cogneus

Tuer & nuire sont choses faciles. 5

Turcs se sont esueillez depuis l'Empereur Basile. 75. se maintiennent mieux que les chrestiens. 14. l'Empereur des Turcs a mieux faict son profit en guerre que les autres Princes. 13. Depuis quelques annees il ne conqueste plus. ibid. Les Turcs estans d'accord avec les Chrestiens, on peur

# DES MATIERES.

auoir aysemēt la paix  
vniuerselle. 14. Turcs  
endurent toute sorte  
de religion. 59

V

**V** Aillance vulgai-  
re ne merite pas  
grand honneur. 7. En  
quoy consiste la vraye  
vaillance. ibid.

Venise est vn lieu  
propre pour tenir l'as-  
semblee generale des

Ambassadeurs de tous  
Souuerains. 61

Villes pleines de fau-  
neants. 28. deux villes  
au nouveau monde  
bien differentes. 189

Voluptez dignes de  
l'homme, quelles. 178

X

**X** Erxe decernoit  
vn prix aux in-  
uenteurs de nouueaux  
plaisirs. 14









B.

in

~~1: 93.~~

K H

